

金光明經文句記

宋四明沙門釋知禮述



清刻龍藏佛說法變相圖

金光明經文句記卷第一上

溪一

宋四明沙門釋知禮述

吾先師昔居寶雲嘗講斯典其徒繁會競錄
所聞而竊形卷軸況筆寄他手反羈乎曠遠
之旨至於援證經論辭多舛謬予每一臨文
不能無慨近因講次憶其所領大義撰成記
文仍採孤山索隱中俗書故實用為禪助庶
覽者不以事相之闕情但思理觀之為益時
天聖五祀臘月三日記

釋題二初正標題目金等四字即所釋也文
句二字是能釋也所釋經題委在玄義能釋
文句者文即經文文句謂章句亦句逗也即以
章句節其經文令其詮旨各有分齊故荆谿
云以由釋題大義委悉故至經文但粗分章
段題云文句良由於此然立此二字蓋謙辭

耳若觀釋經大義非少又解諸經皆稱文句
乃是通稱故以經題簡之令別二能說師號
住處得名如常所辨二入文二初定三分二
初的指所傳異於真諦所譯七軸二十二品
故指四卷十八品也世有足囑累爲十九品
者謬也以諸譯本皆無此品故二正判三分
二初引諸師判二初總舉不同盈者進也縮
者退也蓋言諸師分割三分進退不同也二
江北下正明初判三初江北師以四王等各
於佛前發願擁護說聽之者故云大誓護經
流水長者除病救魚薩埵太子捨身飼虎等
爲大悲接物此師之意與下真諦新舊雖異
大意是同二江南師與今分節三分似同但
昧壽量半品屬序耳三真諦師二初判文真
諦三藏於梁世重譯此經名金光明帝王經

漢一

二

更加四品謂三身分別品滅業障品陀羅尼
淨地品依空滿願品足識本十八凡二十二
品而出疏解釋故云新文等也二真諦下明
義仍斥江南以授記除病悉在流通故云後
師弟因果等也合云師因弟果現文似倒二
今師下示今師意二初約理破諸師二初總
斥人情正斥真諦義兼江北以此二師判師
弟因果並在正宗意謂序分全未辨說修證
之道至流通分道味已歇微末而已故總斥
云是義不然二夫三下別示經意二初立意
二初明三分互通杜塞也三分共成一經感
應豈得義理互不相兼如初序分敘述發起
若不關於下之二分何名正通之序正是序
中所發所述復是流通所宣流布不爾何名
一經正說流通一段若捨序正爲通何法是

故三分各具三義上中下語即七善中時節善也妙經云初中後善若其杜絕何名善耶二又衆下衆機徧益經所被機益有遲速不必皆在正宗悟入故云根性不定何容序分全無法味通中法味歇滅微末耶既其不然於流通中說流水因及信相果復何所妨彌益也督率也勸勵也二又法下引經師即釋迦也達多品中明佛往劫以國王身事阿私仙求大乘法故曰師因持品授記波闍耶輸等成佛劫國即弟子果古諸法師判法華經自法師品後皆屬流通而人共許此與江南判今流通有師弟因果其意齊也故云於義無妨然不可定執故云與奪由人二今下據義分今部二初分經二初定三分文今分三分大同江南但序盈半品故引三師但破真

諦二序者下示三分義二初正示將者當也正宗流通在序分後今序當有三分之二益故云將有利益正當機者當是對義即正對機緣辨說常果懺讚之道也筌魚筍也筌兔置也筌筌喻言教魚兔喻義理欲使言教流至將來正像末時常令羣生取於義理故云不墮於來世也二經曰下引經二疑者下釋難二初立難既稱序分合齊序品安得復入正宗壽量半品餘耶二衆經下釋通三初引他部例淨名經以佛國因果以爲正宗既無序品諸師乃將佛國半品而爲序分若大品般若序品中云佛知衆會已集告舍利弗菩薩欲以一切種智知一切法當習行般若波羅蜜等如此說者已是正宗而文在序分若涅槃經常壽爲正既無序品乃以壽命品中集

衆爲序此約北本也若南本者謝公治定乃取壽命集衆之文題爲序品此等三經或序入正或正入序諸師分解不以爲疑安得獨疑今判序分入壽量中耶二斯乃下明此經意斯乃出自集經者節品之意蓋以若將壽量品題於天龍集信相室後安者則令四佛斷疑之文孤然而起故云漸絕漸鋤銜切漸巖山貌若文孤起則如山巖之險絕不相連屬也爲此之故安壽量題於序段中也三今從下約今意結品雖屬正義當序分豈順標題令義失耶二序有下至釋經三分也初釋序分二初釋品題二初釋序二初標三義經之序分義合有三諸部之中或祇一二蓋闕略也今經與法華等諸大部中皆具此三二次緒下釋三義緒謂繭之緒也凡繭之抽絲

先抽其緒緒盡方見其絲今以五事在初如絲之緒也冠去聲呼敘方將述當益蓋言敘述當時有正宗流通之益故此序述下一十七品也發謂開發物機之信也起謂興起聖應之教也此序即以現瑞駭動物情令信心顯顯教必深益二品者下釋品二初舉梵翻名二品是下就名釋義二初正釋此中文句俱在經也以能詮教皆用四法謂聲名句文此有二種佛世滅後若約佛世八音四辯梵音聲相此一是實名句文身但是聲上屈曲建立此三是假聲屬色法名句文身屬第三聚不相應行毗曇十四成論十七瑜伽二十四種此則大小二宗所立有異名句文者唯識云名詮自性句詮差別文即是字爲二所依若約滅後諸聖結集彼土貝葉此方黃卷

其中所載名句文者皆依形顯色法建立也
今略舉此二具足應四氣類相從者如以四
法同明發起等義故節爲序品乃至同明讚
佛之義故節爲讚品今雖釋序而品義貫下
二引例律論二藏文句氣類咸有篇聚捷度
之節段猶經之品類篇聚者謂五篇六聚一
波羅夷二僧殘三波逸提四提舍尼五突吉
羅此謂五篇也於僧殘之下加偷蘭遮即名
六聚若於吉羅更開惡說復爲七聚毗曇者
具云阿毗曇此云無比法即論藏也捷度此
云法聚亦以氣類相從之法聚爲一段也如
八捷度論謂一業捷度明三業二使捷度明
百八煩惱三智四定五根六大七見八雜思
之可見二從如下釋經文二初分三序此雖
分三至下消文但束爲通別二序二釋三序

三初釋次序二初泛論名數二初明數不同
二初正明數開合地人者弘地論師也六事
者一所聞法體二能持人三聞持和合四說
教主五依止處六聞持伴或七則離於我聞
或五則合於佛處二兼示衆是非此經正談
常壽之宗在信相室故諸天龍及諸菩薩於
此集聽說竟四佛不現理合其衆退散靈山
說序夢中金鼓時處既異故皆不聞約聽常
壽得是同聞不預夢等故非同聞以說此經
時處不定故同聞衆不如諸經安布次比也
若義淨新譯最勝王經列同聞衆不異諸經
大師懸知梵本將至故注云云二此之下立
名多種二初列釋異名凡有六名皆上句標
名下句釋義印定義者以如是等文如世符
印見此冠首知是佛經故大論云非但我法

如_一是三世佛經初亦然爲通名作本者金口所談皆安如是故通名經經後序者結集時在說經後故經前序者以佛遺囑令安經首故大論云佛將涅槃阿難問佛一切經首當作何語佛答阿難應云如是我聞一時佛在某方某國與某大衆破邪序者以一切外經皆以阿漚二字冠首阿之言無漚之言有以其所計此二爲本顯於部內不出有無故立如是對破邪執不如不是證信序者大論云何以不直說般若而說住王舍城答說時方人令人信故二天台_二下結歸四悉天台師者章安對彼舊解故稱智者爲天台師四悉檀者悉是華音以徧爲義檀是梵語此翻爲施諸佛聖人常以歡喜生善破惡入理四種之益徧施衆生斯是感應之通相也此之次序

金口令安即是應也即被滅後一切機緣即是感也而其一序有六名義其意如何今以四種悉檀收之則一一名義皆有所歸也故初二二名是世界益施衆生也三四二名屬於爲人第五破邪是對治法第六信理屬第一義此四既未判於深淺即當四教各具四也二舊解下正釋經文二初依經釋五義二明闕同聞意此依地論師六事分文故若依五事現文唯四就初爲五初釋法體二初舊解二初引諸師釋四初舊解二肇師三真諦四龍樹其四文義皆悉可見至判四悉方定深淺二此之下以四悉判今明聖法若多若少若總若別無非感應感應不出四種悉檀前判次序六種名義是總是多今判六事一感應是別是少故如是二字諸師異釋今

天台師用四悉檀而會釋之各得如來感應
一意豈同世諍是一非諸舊解二字雖對文
理不分大小其語通總又無生善三益之相
但得授受不謬之益故屬世界也肇師雖有
會理之言亦不簡真俗但生信順資稟之善
故屬爲人真諦文理亦未分別而論決定離
增減惡故成對治龍樹信順雖同肇師而言
信者言是事如是此則能彰三諦之義是事
即俗諦如即真諦是即中諦此於一句巧示
三諦當第一義也注云云者令如向辨二今
作下今釋二初約教二觀心此之二釋即教
觀二意雙美而談迫出諸宗功由此也初文
分二初通約說約傳明如約解約受明是此
既通釋貫下別釋必該四教故知法相是四
所詮佛是宣說四教之主阿難是四聞持之

漢一

人當分而言四皆海量二別釋三初迭明破
立四即是四教一一破前不如不是方立本
教如是之義初破邪立正破外道邪顯三藏
正二初破邪阿漚稱吉者百論明外道問內
弟子云佛說何法答云略說二種惡止善行
外曰汝經有過初說惡故是不吉我師經法
初說吉故如廣主經等初皆言吉以初吉故
中後亦吉故曰阿漚稱吉也文乖等者以正
破邪不如不是經初標吉而部內所詮唯是
邪見此文乖理非如也邪見即不吉豈稱阿
漚此理異文非是也故百論破云是吉是不
吉此是邪見氣也二文如下立正三藏教中
文理相稱以無常生滅之談稱無常生滅之
理曰如此理稱文曰是二今謂下破異立同
二初破異欲彰衍理先斥藏非實有之俗而

爲能詮不即真諦故非如也所詮之真不舍
中理淺故非是二摩下明同通談幻有當體
即空不異名如即空之真能舍中道不同三
藏析空定淺故理名是通教必通別圓二教
故文標云摩訶衍也三今謂三下破淺明深

二初破淺欲明別理先斥通非通教三乘同
聞即空而鈍菩薩同二乘解利根聞空不但
空有兼能空空既此各解望別非如空中兩
證證空尤劣比中非是二明深別教不通二
乘修學雖復廣攝微塵之衆唯菩薩根皆聞

淺一

九

佛性次第修入既無異解故得稱如無不證
中故稱爲是四今謂離下破離立中二初破
離欲明圓理先斥別非別雖談中中唯佛界
雖復變造九界因果九非性具須緣中道次
第斷盡方成佛界佛與九異故不名如初觀

出俗次觀出真至第三觀雙出二諦方證中
道中不即邊故非是義二文字下明中能詮
文字性本忘離與理不異故稱爲如唯空唯
有唯色唯心一一皆中無非佛法故名爲是
文如理是義究竟成二初破下結成四教問

前釋四教通真舍中得名理深今結四教別
教乃云破淺明深豈可通教真中俱淺答通
理雖深爲攝二乘及鈍菩薩故兼淺理今結
別教獨菩薩法唯談深理故以唯深破於兼
淺與前列釋義不相違三此經下示部具四
二觀心以圓三觀觀於陰等修惡之心即是
性惡名惡法界無法不收體是三德復名三
諦稱諦而照觀境不異故名爲如境即正觀
者境是本覺起爲始覺雖分新舊覺體不殊
故得名爲境即正觀是義方成若不爾者境

照境等四句豈立經言等者若觀頑境偏小
忘心假立真如等皆名邪觀今茲正觀雖非
約行行人若欲攝事成理即聞而修必須於
所觀心簡於十境陰境常有餘九待發於能
觀觀須識十乘上根修一中根至七下根具
十若自未解摩訶止觀當依師友一一咨詢
明識藥病方可修之勿謂一句修行即足下
去觀解准此應知二我聞下釋聞持二初舊
解三初舊師外人我見故多師心阿難師佛
故唱我聞二真諦我能受持佛所說法故是
器義簡三非器顯成三慧雖未分於四教慧
別然釋我聞尤過舊解三釋謂彼明耳識從
四緣生一空二根三境四作意今云不壞是
根可聞處是境諦聽是作意唯闕空緣下云
因緣和合義可兼之即四緣和合方發耳識

不言耳聞稱我聞者我是耳主故新云耳識
九緣生備於唯識也二師釋下今釋二初約
教釋二初我聞各釋二初明四我此我等
例於大經生生等四句而立然我是假名攬
陰而有陰法既有生生等四我隨實法豈不
然乎如釋生生云大生生小生此乃生滅生
於生滅攬生滅法成生滅我故例生生成於
我我雖是空觀而非體空是故三藏當於初
句又復應知假實生滅衆生本爾而不覺知
今稟此教稱本而觀豈唯此教下三皆爾通
教實法生即不生故陰中我即無我也故屬
次句別人知陰不生而生是故觀於無我而
我蓋由此教元知真我見慢盛故初觀無我
次破無我建立於我後入真我是故此教當
第三句圓人即達現前假實不生不生攬常

住陰而成真我我既即中二諦皆趣故云我無我而不二真我義是故此教當第四句教本被機故四我義配四根性令後說者如上分別故注云云二明四聞我是聞主聞是我用主是假人用是實法然若解生義則聞義自顯但生是總論緣起聞乃別從說聽不無少異從聞因緣而有餘聞故曰聞聞既從緣生終歸壞滅此聞生滅也聞無四性當處無聞故曰聞不聞此聞無生也真雖不聞俗中有聞故曰不聞聞此聞無量也二諦即中故云不聞中亦得復云不聞四十九年不說一字何有中邊而可聞耶此聞無作也注意同前二有四下我聞共釋三初聞者四能三藏教中阿難一身而有四德故受四名典藏出阿含餘三出正法念今演小名對於四教

義與名合阿難梵語歡喜華言佛成道夜生舉國歡喜因以爲名從緣立名符生滅法傳持三藏宜用此名通教所說體事即理異凡俗見宜用賢名別教正談塵沙佛法多所主領宜典藏名圓教始終詮法界理既深且廣宜用海名二歡喜下能承四佛四初三藏此教析法空不舍中故見佛身唯是丈六二賢阿下通教觀既體法顯二種空謂不但鈍根菩薩同二乘人唯見但空無中實故非色心本故佛元由誓扶殘習幻出身智終歸灰滅色有分齊故云丈六若利菩薩受別圓接解不但空空是本覺中實之體是妙色心佛位證得所有身智稱體無邊故名尊特尊崇奇特亦名報身祇一佛身由利鈍機見二種狀故云合身通教佛身須作此辨應了鈍根

見佛縱高十里乃至百億以依但空亦非尊
特有分齊故若利人見丈六八尺既依中道
亦無分齊是故下文金龍尊王偈讚三十二
相文句解云正歎尊特三典下別教此教初
心便聞但中中雖不具九界依正非無佛界
妙色妙心是故見佛唯無分齊尊特身也此
教始終不共二乘及住空菩薩修證故也四
海下圓教此教所說世間相常故一切法無
非中道雖與別人同見尊特彼兼別修此皆
性具故龍女云微妙淨法身具相三十二欲
彰全性是故從勝特名法身故此教人觀性
德苦樂而興與拔以即理毒害爲所消伏修
德三因名性德行報應二身即名法身蓋欲
以性而泯於修苦則即拔無拔毒則即消無
消行乃即修無修佛乃即證無證阿難傳此

無作四諦即說無說是故親承法身佛也三
此下部有四機問上明四教今那但云三乘
說聽答以三乘中聲聞緣覺須論藏通若明
菩薩須該四教三乘總論四教別辨聽既三
乘說必四佛既一音各解亦一身異見前明
合身其意在此二觀下約觀心解以上我聞
各四句義就於行者心觀辨之攀上等者是有
漏禪六行觀也攀上淨妙離厭下苦麤障
約於九地迭論上下我我聞聞是三藏中生
滅俗境前約三乘知解生滅觀之入理今就
凡夫不知而修但成世禪既是俗境知與不
知法本生滅故當生生句今宗解之或從所
化機或約能觀觀析體二觀俗異真同前約
俗異故將析法別對初句今就真同故以析
體共對次句後之二觀不殊前對又前約教

我聞四句可對四人今論修觀須就一人一念而照故釋籤一心三觀於一念心見四諦尚具四趣豈闕世禪故說必次第約人辨相故修無前後唯成圓觀故三一時下明和合二初舊解二初肇師啓開也運謂時運嘉善也會合也即是機應善合之時也二三藏下真諦二初敘彼立義此解同肇以合釋一而但就機論不高下合應之心也若諸衆生心不高下中平之時即是與佛合一時也故云平時即是一時二私下章安釋成言私謂者大師滅後頂師記錄此文句時自加此釋事非公灼故言私也蓋慮後人不解真諦高下之義故爲釋出高謂慢心自恃陵他不能奉行佛之道法故云慢心不行下謂耽戀五欲荒迷不捨何能受道此之二心最爲道障

漢一

十四

欲令今人不耽不慢修於平時即感聖也二師下今釋二初約教二初約因緣總釋感應因緣合一之時也不明感應與誰論一未分三諦淺深之別故當總釋二亦下約諦智別釋二初釋時問諦智但在機感應該生佛雙隻既不同如何論總別答智即是機諦即是應智諦合時名感應一何者佛以三諦而爲其體不以此體應於衆生衆生無由智合於諦如須菩提石室觀空釋迦歎言得見我身豈唯諦理諸善亦然如云若持五戒釋迦如來在汝家中故知佛以三諦諸善而爲體相衆生修善見諦理時即是感應合一時也今明三諦即攝四教如常所辨二而言下釋一即前諦智合一之相也先簡不合謂前思後知此乃覺觀虛妄之心若智發者思覺俱寂

豁爾開悟方與諦一故言一時四教諦智一
相皆然二觀解前約教解是佛會開悟今約
觀心是滅後造修前分四教今在一心文同
意異四明教主二初舊解二初真諦未破無
明名小菩薩若證法身分顯三義故不被異
二乘異外故但一義菩薩雙異外道二乘故
得二義而未平等佛盡能異是故三義具足
究竟二釋論世尊當十故佛第九此就合說
若調御丈夫開爲二號則佛當第十號具
足名世間尊此是能覺其所覺者即世間等
英一
三雙法也初雙約凡聖世則六凡法出世則
十五
四聖法次雙約小大無常則凡小法常則大
乘法後雙約思議不思議六凡三教是數皆
可思議法唯圓非數是不可思議法此等法
門於一心中朗然頓覺故名爲佛二今釋二

初約教佛既翻覺而有三身即是三種覺智
所成若一切智成於三藏丈六佛依道種智
有二佛者此智論於界內外故界內道種成
於通教但空丈六以鈍菩薩爲空出假故界
外道種成於通別但中尊特以二菩薩爲中
出假故一切種智成於圓教及通別教諸法
趣中法身佛也雖被四機祇是三佛此之三
佛不可定一無差即差故不可定異差即無
差故須忘一異是祕密藏故而論一異跨節
當分故二約觀三觀所覺皆云諸法者一一
覺於三諦也故空覺三諦差別情忘名第一
義空故曰一相假覺三諦皆能立法名如來
藏故曰種種相中覺三諦遮照同時名第一
義理故曰無一異相亦一異相前約教釋故
以三智別示三身攝於四教今既約觀須唯

在圓圓觀若成四教三身不求自獲塵去鑑
淨像現隨形令此分別故注云云五住者下
住處二初雙標佛能住人也城山所住處也
人必有法以爲能住如世惡人必以惡法住
於家舍善人善法住舍亦然今云佛住王城
者山豈得不以首楞嚴定爲能住法耶故普
賢觀云釋迦牟尼名毗盧遮那此佛住處名
常寂光牟尼是人寂光是法此之人法自可
分於能住所住若望山城俱爲能住山望寂
光爲所住處處隨法轉其猶還丹點鐵成金
故摩竭提阿蘭若處名寂滅場今之城山豈
其不爾故知不辨能住心法但云色身住於
土石則大小心境之談便成無用是以雙標
能住所住其有旨乎二真諦下雙釋二初明
能住法二初舊解二初真諦此師釋住不但

漢一

十六

色質住於城山故明八種能住之法一住大
千顯能住化廣二住依止顯今能住三住五
分顯於能住無漏五陰五分者謂戒定慧解
脫解脫知見謂無學道共戒滅盡定無生慧
有餘解脫照解脫智眼名爲知見謂自知是
初果乃至四果也是則前三並在於果方名
法身言壽命現在者以入無餘則五分滅故
灰身則戒定有餘解脫滅滅智則慧及知見
滅故壽命現在五分得住四住威儀行住坐
卧皆有法則故能利物五天住住禪定者禪
則四禪定謂四空是色無色二界天法故六
梵住住四等衆生無量我心常等故四禪加
修慈悲喜捨生梵王天故云梵住文無喜捨
略也七聖住住三三昧謂空無相無願此三
聖人所修故云聖住八大處住即常寂光言

漢一

十七

慮已絕故云第一義也此之八義皆是如來能住法也二釋論大品云佛住王舍城龍樹約四義釋能住法謂天梵聖佛也真諦八法不出此四是故大師以四攝之論中天梵與真諦師天梵二住名義全同而言定者四等定也此則以二攝於二也聖住與真諦聖住名義全同而更攝得五分壽命此則以一攝二也佛住與真諦大處住名異義同以一攝一此則論四已攝彼五也而論復云於四住法中住聖住佛住法憐憫衆生故王舍城住今云迹住也此義復攝真諦三住以王城是依止處故王城在大千界內故四威儀不離王城故問佛能住法是首楞嚴論何須說聖梵天三答如來自行實在楞嚴爲利他故住餘三法心若不住梵天等法口豈能說四禪

四等是故妙樂明論四住云從廣之狹將勝攝劣故天攝機寬佛攝最狹中二迭論故云從廣之狹佛住既勝無善不攝故聖等三是凡小善明所攝耳二今釋一初教論明四住其義猶總是故今家明四教佛住於三諦復論兼獨住法明矣三藏所詮析法觀拙故成佛唯丈六身但住真諦通教所詮體法觀巧能證二空故所成佛隨利鈍機一身兩見丈六住真尊特住中別教詮中修次第觀故所成佛唯一尊特以須別修緣了莊嚴故使此佛雙住俗中圓教詮中具諸法因中萬行不修而修果上萬德成無所成故即報應名爲法身唯住中道前三教佛豈離法身今就當分明四差別是故四佛各以住法住於城山二觀於一心中圓修三觀住於三諦以此

住法住所居處若念念不休即觀行佛行住坐卧經云此處皆應起塔即此意也二王下明所住處二初城二初因緣釋此文雖略意亦可見若欲備知當尋彼論二觀行釋上諸觀解皆是附法以如是等不借事義表觀法故此之城山是託事觀也如今王舍借覆蓋義表於五陰託自在義表善惡王故妙樂云以善惡王對無記舍應知無記徧該八識若善惡王唯第六識以此第六通三性故謂善性惡性無記性也此無記性同餘四陰爲所觀境取善惡性爲能觀觀初心修觀莫不用此第六心也以由此心能起忻厭分別名義作善惡因故所言善者對惡得名非究竟善以此王數本由見愛熏習所成圓名字人全未能伏縱起善念不離見愛故十境心皆名

魔障不思議觀方曰善淨若直以此心觀實相理如用藕絲懸須彌也徒增分別絕念無由若體此心是性惡者性惡融通無法不趣自然攝得七八九識同爲妙觀故得名爲境即是觀能所既泯思議乃忘圓妙之觀初心可修故妙樂云忽都未聞性惡之名安能信有性德之行須聞性惡者以知性惡故則修惡本虛三觀十乘無惑可破無理可顯修德功寂是無作行故以性德召此行也此意若昧徒說心王爲能觀觀終非圓觀豈前三教非善惡王爲能觀耶又須了知非獨城山以陰爲境諸事法觀皆須觀陰故妙樂云又諸觀境不出五陰今此山等約陰便故以諸文中直云境智記文既云諸觀之境不出五陰則知託事附法無不觀陰言此山等約陰便

者蓋此山城表陰義便故明言陰諸文不便故直云境智雖爲不便不言五陰而所觀境無不是陰故上句云不出五陰直云境智即諸文云觀一念心即空假中也雖不云陰且一念心非陰是何有人據此執諸觀境不觀陰者違文背義過莫大焉又僻執云唯止觀中從行觀法得簡陰境諸事法觀不得簡陰斯是冒情自立規矩諸文觀法既不出陰簡有何妨況妙樂中觀陰須明方便正修簡境及心簡境豈非去尺就寸簡心豈非去其思議取不思議耶安得固違執不簡陰此人又執諸文託事附法觀心不可修習唯止觀約行觀法方可修之乃引義例論邪師文爲據彼文云十二部觀寄事立名雖有三觀之名十境十乘不列一部名下唯施一句豈此一

洪一

二十

句能伸觀門今人謂事法觀心便可修習不假止觀者豈不全同往代邪師耶今評義例驗此人說全昧荆谿破立意也何者義例論疑本爲邪師錯謂止觀十境十乘是漸圓觀唯頂法師十二部經觀心之文爲頓頓觀修之即得是故荆谿如上諭之其意但是破彼邪師將頂法師十二部下觀心一句具足伸於頓頓觀門也邪師既以止觀十境十乘自是漸圓終不肯用入十二部事觀中修豈得同於正解之師講至城山等觀之時學者欲修即敘止觀方便正修揀境等文成其法行若然豈是十境十乘一向不列耶豈是獨將一句伸觀門耶又何嘗云事法觀心不假止觀便可修習又不云城山等觀是頓頓法那斥全同往代邪師耶又法華玄義示諸文觀

心令即聞即修釋義云隨聞一句攝事成理不待觀境方名修觀先祖垂範昭然可鑒如何固執事法觀門不可修習此人又全不許傳法之師敘於私記教人修觀須自深諳止觀法門方可修於諸文觀心若其然者修觀行人則全不藉教授知識五緣之中善知識緣全無用也四緣寧闕善知識緣最不可捨故大師云自能決了可得獨行妨難未諳不宜捨也經云隨順善師學得見河沙佛又備諳止觀十乘等法是大法師是大禪師豈諸

漢一

三十一

文中事法觀心皆須此人方得修耶作此謬說障傳法者宣示觀門障初心人依師進行所損彌大學者知之二者下山二初因緣釋山峯之勢似鷲之頭或云靈鷲此鳥有靈知人死時故又多仙靈隱其中故說文云鷲黑

色多子二觀行釋若妙經疏先以三字對於五陰次觀三字而爲三德達陰即理也今此文略直以三字表示三德雖不云陰義當體陰而爲三德須知陰是見思報法此乃修惡即是性惡而爲三德其善惡王若非性具何能常住祕藏之處心數塵勞若非性惡何由能得同入其中二此經下明闕同聞意二初正釋時五處四者一者山說序時二室內說壽量時三夢中見金鼓時四夢覺詣耆山說時五列衆至金寶蓋山王佛國讚釋迦時故時有五也以說序說夢俱在耆山故處但四二若爾下釋疑問意者四佛說壽在信相室阿難在靈鷲何稱我聞然雖下答也報恩經中衆令阿難爲佛侍者阿難從佛而求四願一不受故衣二不受別請三不同諸比丘須

見即見四所未聞經重爲我說佛皆許之又
其得佛覺三昧者佛加覺力如佛故名佛覺
能自通達者不待重說也然阿難佛成道夜
生年二十五方爲侍者已前之經准向兩義
尚稱我聞況近在信相室中耶

漢一

二十二

金光明經文句記卷第一上

音釋

裨班廉切 識楚禁切 蘭吉典切 駭下楷切 肇
補益也 取也 籤七廉切 耽都含切 藉慈夜
直紹 切假 借也

金光明經文句記卷第一下

溪二

宋四明沙門釋知禮述

二從是下敘述序亦名別序二初列二名雖是異名亦有長短述齊序品別盡初分以有別序異於衆經故立別名名金光明故知此序是別名本二別義下釋二序二初泛示二序文相二初別相二初明七別二初示七經文二生起下明七次第初入定者大覺頓圓照而常寂今之入定蓋示軌儀令人樂定次敘述者既入妙定見法尊貴即於此定敘述經王言出敘者實未示於出定之相蓋寂不妨照故云出耳佛不出定即說此經意本彰於寂中有照也次懷疑者既敘常法是佛所證信相乃疑能證人壽那不稱法瑞應等次文顯可知二或時下明三別大師有時作此

分別章安兼錄與前七別開合異耳二言敘下述相二初正示敘述敘懷疑者思惟深義必合疑於所證法常能證壽短敘斷疑者佛護本令斷疑生信也敘懺悔品者正爲破惡旁爲生善故敘讚歎品者正爲生善旁爲破惡故敘空品者此品導成生善滅惡今文偏敘滅三障故大梵釋天是散脂主緊那羅等乃是散脂所領部從經舉主敘其品也敘正論善集者正論治國善集聽經此俱是祕藏流出故以祕密敘二品也敘授記者彼由聞經心淨若空故得記莂今云身意無垢穢故敘捨身品者殮太子身既得解脫顯非邪食以活其命故今正命一句敘之敘讚佛品者雖三番菩薩以偈讚佛而此菩薩多是古佛縱是實行亦是當佛故今佛讚行人亦是當

佛故敘其品也彷彿者不分明貌也遠音偉遠也如云不得過自明分也二問下兼示敘人二初問起二答示二初敘舊斥非舊有二師一云阿難斥云是論非經者以佛說名經滅後三乘弟子所作悉名論也經云我今當說懺悔等法豈懺悔法阿難說耶豈非垂文夢中金鼓是佛法身以智扣之故乃隨機說懺悔法須知金鼓是佛真我故云我說也二云信相斥云若是信相玄敘始末不應疑也玄敘者玄與懸同二又非下重問的示二初的示師意二難下難起答通二初難起若是佛說即是正宗那得稱序二此下答通二初以因況果不惟能訓是佛作序兼顯如來定不妨說以法華文驗佛敘述正在定中豈千萬偈局在正宗以況果佛口密赴機豈但正

說不作序通是故結云何所不爲二文下引文證結二初引當文證二大下引大品例彼經序中明佛出廣長舌相放無量光是一一光化成寶華華上皆有化佛說六波羅蜜彼既稱序此豈正經二釋入下的從別序消文七初入定別二初標科欲顯能遊人與所遊法義皆明了故節遊字入其初科須知釋義不類讀文二是下隨釋三初能遊人三初釋是時二初舊解二今下今釋不用古人五種三時但論佛鑒機得道時又得道猶通須約三智冥三諦時方盡如來鑒機之相佛欲等者乃是化儀非謂今日鑒照方知二釋如來二初略示二三藏下解釋二初指他廣解二今言下今從要釋三初約悲智釋二初約義釋法華文句三身各有如義來義今以法報

相冥釋如乃以應身出世釋來但使義成通別無在佛若順智應如祕藏祇爲順悲故來三界二成下引論證能乘即智如實道即理來成即是慈悲垂應二大下約智行釋雖但云來已具如義以約福智來嚴法身所嚴即如也此是大經梵行品中解如來名三釋論下約說證釋二初引論二今明下釋成本有之法妙真俗中而爲其相智稱此解即法報冥故曰如也稱此如說是應身被機故名來也前約悲智其義猶總今明解說三諦法相釋於如來義無不盡三諦法相即三法身法身圓也稱此而解即三般若報身圓也稱此而說即三解脫應身圓也以今望前非無區別三遊者下釋遊字即是如來以究竟智遊入法性也夫所證法性能證果智義立能所

體非相到以始覺究竟即同本覺唯真如智獨存也故若然者其誰能入復何所入住出生學佛入理故示入相爲令衆生稱理而住故示住相甘露乃是不死之藥喻常理也爲衆生說此甘露味亦應言出不出而住出敘經王也法華地涌諸大菩薩於深法性百千三昧不入而入名爲善入住亦然菩薩尚爾果佛可知二無量下明所遊法二初明深廣法性二初直約文釋二初消無量甚深將欲明示佛所遊入先須簡顯其體高廣乃以法界顯其廣中道之法非界爲界此界無外故言無量又以三諦顯其高然真俗二諦雖俱究竟而乃通於二乘及徧菩薩少分而證若其中諦非圓實智莫能證入今明三諦體

非優劣乃是三德祕密之藏即法性底故云
徹到方稱經文甚深之歎深即高義須知法
界與圓三諦無二無別今取二名顯無量甚
深令易見耳顯已次簡若約二乘以圓簡偏
若約菩薩以深簡淺降佛已還皆下地故圓
聖尚簡況三教耶二法下消法性二字上明
高廣是體之德今明法性是德之體釋二字
義顯高廣體所言法者軌則爲義諸佛軌之
萬德成就故涅槃云諸佛所師所謂法也然
此法性三乘六道誰不軌則而成立耶以迷
性具無事用故雖軌而違故成三障其猶七
衆誰不師佛而有違順故分縛脫今就極順
用顯所師故云諸佛所軌名之爲法所言性
者不變爲義謂四德之體無遷易故須知此
四徧一切法下至地獄依正因果一一無非

漢三

五

常樂我淨世間相常斯之謂也二非是下更
取義釋三初取實智所照釋盡智者斷惑已
盡也無生智者惑不更生也故俱舍釋此二
智云謂無學位若正自知我已知苦斷集證
滅修道名盡智若正自知我已知苦不復更
知後三例說名無生智瑜伽論以惑盡名盡
智來報不生名無生智而此二智俱照偏空
略簡二乘意該菩薩至等覺也二乘法性非
中道故淺不具色心故有限如實智者釋論
明十一智前十與二乘共唯如實智則不與
共謂一切法總相別相如實證知無有罣礙
此智所照橫包豎徹是今法性也二又無下
就即事而理釋深廣法性是佛遊處又過菩
薩所行清淨恐不達者謂今凡鄙依正色心
因果之外別有法性是佛所遊故特遮之非

別有法名爲無量及甚深也然一切處言須收三土諸法合當九界因果若遮那佛法唯淨唯善則三土九界染惡須斷云何得名皆是佛法故當了知一切染惡無非性具緣了佛性非專善淨性染性惡全是緣了若此等

法皆佛性者則三土九界修染體虛性德十界是圓覺體無所不徧方曰遮那徧一切處一切諸法皆是佛法有何一念一塵一人非是如來所遊法性故言無量又須了知一切染惡當體幽邃故云甚深實非別有甚深之

溪二

六

法是故名爲即事而真色香中道以色香等迷情謂是色之少分解則無非法界全分以唯色唯聲唯香唯味唯觸故也色外更有微塵許法則不名唯亦非中道中道祕妙思議固窮稱爲甚深也三例如下引論等心類二

初引類二準此下準釋三初明中諦無量論明四等謂慈悲喜捨從心名等從境名無量此衆生緣也就其所緣方隅廣狹得三重名謂廣大無量今類彼說就真俗中而立三名經示遊於無量法性乃彰中道圓融之理非但空之真及偏假之俗二若緣下明中必融攝佛或對機用於權智偏照二諦既不攝中故非遊於無量法性今用實智照中諦理中無不攝故云若緣中道即三智一心等是以中諦稱爲無量三此下結境智相稱如法華云唯佛究盡諸法實相權實之理何有盡極良由佛得無盡之智方能究盡今亦如是二乘下地智有限量是故不測無涯之涯無底之底二諸下釋諸佛行處二初法學者應知本覺爲處始覺爲佛全本爲始始方合本若

不爾者如何各稱無量甚深然初坐道場即已冥合今爲引物故示合相乃云遊於諸佛行處二舉喻舉行處顯能遊蓋也三過下結二初直約文釋二初據義略釋二引文廣釋二初地持九種禪者一自性二一切三難四一切門五善人六一切行七除煩惱八此世他世九清淨淨文中略示初後二禪也其第九禪即從十地轉入妙覺故云一切通別惑累若正若習皆盡自十地已還悉有正習論解華嚴不開等覺十地即等覺也言通別惑累正習皆盡者通即四住別即無明通惑正使圓七信盡習氣至佛同別習盡以今家於小乘習氣分別四四十六門故若別惑者四十二品斷位如常習氣具如淨名疏說圓教始從初住終至法雲圓斷諸見猶有習在

等覺入重玄門千萬億劫重修凡事見理分明習氣猶薄事等微煙彼引地持離一切見清淨淨禪故但明見習若引優婆塞經十地斷愛習十地即等覺豈不入重玄耶故知別惑斷正使外更入重玄斷於習氣文甚分明二淨名佛復自性清淨之心超於一切修得禪定故云心淨已度諸禪定亦是到於一切禪定彼岸故云已度二亦是下重取意釋佛不自高依法故高今明高位意欲顯法性高深矣二是金下敘述別二初明述義異前然前敘諸品豈出五義以十七品唯談三法總明別相及被物教但爲既從經品而敘名等不彰故今明示序品經文備敘五義使學者知此一經始末唯詮名體宗用及教相耳方知釋題搜盡經旨二初十下約文述義

二初分文二解者下述義二初敘四義四初一句敘名二初他解屬體鑛石者說文云鑛銅鐵璞也內外用者光爲內用自顯體故明爲外用鑑他物故此師亦知光明二字屬於宗用金是正體以其體用不相離故雖標三字意在於體也二今明下今定敘名標三顯一非全乖理故云當然其如分文自有次句的以中道而爲經王正是敘體何須初句兼於宗用而敘體耶學者應知敘名之句據上附文釋三字名非從喻立乃是直名深廣法性以佛正遊此之法性便即唱云是金光明諸經之王不名法性是之一字爲指何耶智者深見經之微旨故立附文及當體釋證於附文先引此句云創首標名彌爲可信既前附文特出此意今釋敘名不更顯示二經王

下一句敘體二初指上標今上即玄文重明帝王約攝法門攝教攝位辨經王訖今此更就中道明王二三藏下對他辨正二初明他解二初敘三藏意云經題三字喻於三德乃以三德分對三經涅槃明佛有體解脫正斷二乘灰滅之見般若談空正爲凡夫遺於有著華嚴頓說法身之理被十信三賢故云始行上之三經各談一德各被一機若金光明具顯三德故能通被八位之機解脫被二乘二位也般若被凡夫通指人天爲一位也法身被菩薩信住行向地五位也既無機不被即是經王統攝義也二此下破二初明違教旨涅槃正談深妙三德合被圓機豈唯二乘般若具示三種般若豈異三德況云聽衆非生死人寧止凡夫華嚴三身亦即三德具論

十地豈但被於始行菩薩此解不獨攝機有
限抑亦彰法性非圓二作此下明損行人真
諦此解有識之者知其不當無智之人謂彼
三經劣於此典起謗得罪安可依之二今言
下明今釋三初泛示諸部經王是非二初約
三諦定是非二初示三諦一代教部有取能
詮文字爲經有取所詮義理爲經有取文理
合爲經故一代經不出文理合與不合若不
合者能詮之文但是俗諦不出三種謂三藏
實有俗通教幻有俗別教幻有幻有即空共
俗若所詮理但是真諦亦唯三種謂三藏實
有滅空真通教幻有即空真別教不有不空
真此六之內三種真諦體不具俗但因三俗
而得入真俗終須滅合義不成若文理合者
不出三種謂圓接通圓接別及正圓教此三

真俗其體是中何者圓教本自真俗互趣若
接通別所詮真理既諸法趣局照俗文亦諸
法趣故此三種真俗不二名文理合中道義
成以真即俗故真即非真俗即真故俗即非
俗非真非俗言慮自忘強名中耳問別教復
俗幻有可是能詮之文即空如何亦是文耶
答文謂文相能詮能顯之義也義若在通教
空以忘相爲所詮理今於別教二邊俱相乃
爲能顯顯於雙非是故空有俱爲文也問藏
等七種俱名真俗如何後三得名中道答豈
聞真俗便無中耶如圓當教及接通別此三
真俗既皆名爲不可思議寧非中道如涅槃
疏釋七二諦於中三亦以中道爲名何獨責
此問若取其義別教真諦不空不有何不名
中若離邊之中文理不合初心不得思議頓

忘若望於圓但是複俗所詮真耳故前文句
釋經如是對圓別云破離明中良以所詮不
即能詮不名中道文字性離無非佛法方名
圓教中道如是問何故獨遺別接通耶答今
以真俗對於文理其別接通已在六內何者
若未受接乃當幻有詮於即空若受接後自
屬但中局照複俗故據法體已在前六有何
所遺況復今文不顯標云七種二諦但明一
代取文取理取文理合有三俗經有三真經
有三中經如此明經收於一化罄無不盡有
人祇就金光明名立九種經專據取字以爲
義本謂若取著三字能詮之文名三種俗諦
若取著三字所詮理體名三種真諦若取文
理合謂不偏著二邊爲三種中道如斯說者
豈唯師心解義無乃固違文意前二取字作

漢二

十一

取著釋後一取字作不偏著解是何言歟大
師爲解諸經之王故立九種收一代經此經
既說中道之王故於九種而得自在名諸經
王何緣九種但在三字乃是金光明自爲金
光明經之王也既闕諸經全非統王乖反至
多且言此二二若說下定是非若諸部內有
說前三能詮俗諦有說前三所詮真諦體不
合者皆名餘諦但得是經不名經王以其不
明真理具俗是故俗諦不即真諦真俗俱無
統王之義故非王也若諸部內有說三種具
俗之真全真之俗二諦不二名爲中道此中
道外更無少法如此經云無量甚深法性又
云不思議智境又云安住一切法如性於一
切法含受一切法則所詮外更無能詮能詮
之外豈有所詮文理既合中道斯圓故得是

經復是王也乃於三俗三真三中九種經中而得自在問三種中經體已是王何故復云於九自在答上辨九種乃是通約三俗三真三中示一代經有偏有圓也今判諸部隨有一處說圓中道即是經王能於通示九種自在於三中經即是異名其體既同故得自在若餘六經乃是圓中所用方便如王於臣豈不自在二但經下就中道顯尊極三初明諸部圓體爲王中道經王其體是一隨物宜樂立乎異名故向文云若說中道是經是王何經說耶即華嚴等四味之內作法身等說經體也然須簡別四味之內是王非王如華嚴部有三種經其正圓中及接別中是經是王正別教中是經非王是故法身須簡別中三藏但空實有二諦是經非王方等部內具九

種經正圓教中圓接別中圓接通中三是經王故實相名通此三種餘六是經不得是王般若部內無三藏二有七種經亦同方等三是經王得名佛母餘四非王法華一圓是經是王以開權故解髻與珠涅槃九種皆知圓中無非經王一切衆生悉當成佛其誰不以正因爲師故諸大部中道經王有此盈縮祇一法性立此異名作諸經體二譬下約歷代人王爲譬諸姓者謂三皇五帝之姓也太昊伏羲氏風姓炎帝神農氏姜姓黃帝有熊氏公孫姓此三皇也少昊金天氏顓頊高陽氏帝嚳高辛氏皆姬姓帝堯陶唐氏伊祁姓帝舜有虞氏姚姓此五帝也故云諸姓也應運迭興者應天五行相生之運也伏羲應木運神農火運黃帝土運五帝依次推之龍師者

伏羲初立有龍瑞故以龍紀官故左傳曰太
昊氏以龍紀故爲龍師而爲龍名鳥官者少
昊始立有鳳瑞故以鳥紀官故左傳曰少昊
摯之立也鳳適至故爲鳥師而鳥名隨時霸
立者謂應運王天下也百代雖異謂紀號不

漢三

十三

同也統王是一皆天下主也三法性下示隨
部立名合譬名雖興廢體非增減是故法身
乃至佛師一一皆於九種經中而得自在即
前論云百代雖異而統王是一二法性爲下
的明此典經王體性以文理合中道爲體斯
蓋通辨若例諸部經體別名此經的以法性
之王爲經體也以佛遊於深廣法性便即唱
云是金光明諸經之王豈非的指所遊法性
爲金光明名下之體此體自在是諸經王問
三種經王皆得爲於大乘經體此經之體的

屬何王答文詮法性雖在於圓而許三乘依
此懺悔是故大師就圓釋體判教屬通義當
圓教入通中道以爲經王也問淨名玄云若
理內三種俗諦非此經體三種真諦是法性
實相得爲經體今云若取文理合爲經即是
三種中道且文理既合則真俗俱中是則俗
諦得爲經體將非與彼義相違耶答彼此宛
順無相違也良以經體未始離文而文不到
即事而真方爲經體以二諦判體則屬真三
諦判之體當中道斯乃示於心路絕處方爲
經體若藏通別當教亦云體絕言想而皆所
詮不具能詮安得能詮合於所詮故六種經
文理不合望於圓教實無絕理是故大師欲
彰經體示絕想門云文理合是三中道爲四
味教所詮圓體談理具文文方即理理亦即

漢二

十四

文文既即理能詮自忘理既即文所詮匠得能所既絕中體斯彰彼明理內三種真諦皆是圓中故與今文明體不別如妙玄中引地論金剛藏說空有不二不異不盡四句顯體辭異意同釋籤問曰空假如何得爲經體答云既是不思議空假還指空假即中中爲經體中即空假亦指於中彼之四句不出三諦以圓融故三諦各三是則四句句三諦所以得名辭異意同句句具中故皆爲體究論空假得爲體者由具於中故云還指空假即中中爲經體是故中諦雖具空假空假非體故云中即空假亦指於中問何不但云中是經體空假非體於義已足何故先明三諦各三皆得爲體復於三諦各揀空假唯取於中而爲經體豈非繁重答祇爲單說圓義不成

作此融談方彰妙體何者蓋以空假是其修二即經宗用中是一性即經體也若但云中是經體者則宗用外別有於體體狹不周故須三諦無非經體若不於三各揀空假唯取中體則不能顯體非智斷如此辨體不即宗用不離宗用思議泯淨妙體天然中爲經體圓妙既然以例空假宗用亦妙以空徧三諦此宗不狹假徧三諦此用彌廣仍須三諦各揀假中顯宗是智亦須三諦各揀空中顯用是斷各對二明不即不離故皆稱爲不思議也若然豈獨體是經王宗用亦王名總三王教辨四王以一名一體一宗一用一教無非中道故也故玄義云文號經王教攝衆典教尚稱王名等可見既法法皆中無非經體復須簡顯名是能詮宗是自證用是化他教能

分別唯有經體是所取也收無不盡簡無所遺與金剛藏四句皆體釋籤於四唯取於中其意混合三若作下特彰今釋契理益機顯圓中道泯絕言思而爲經王止順如來敘體之旨下赴衆生聞經之機既論四味諸大乘經文理合者皆是經王豈有獨尊我經而慢他典此望真諦萬萬相懸三微妙下敘宗二初釋微妙如來既敘金光明名經王之體此乃一經所詮祕藏其有聞者必思此義故云微妙此之二字若因果互闕則非始終常住三法故對古非顯今正義因該博地果極妙覺位分六故深而難見六皆即故不縱不橫因即果故不縱事即理故不橫文解理性與果例云亦復如是若知六即義無不允二四方下釋四佛護持二初約教釋二初正釋二

初釋四方四佛佛唱此言意有所表正敘經宗宗是果智冥法性體體雖是一而開四門謂妙空妙有雙亦雙非如地論明四句顯體以爲四方果智冥之以爲四佛敘宗之意顯然可觀二釋下釋護持二初約五佛體用釋持今經宗在釋尊果智欲彰此智冥四門理是故特從四佛明之良以佛智不分彼此同冥法身不動之性順性名持法性是法體諸佛是報智壽命是應用此三皆常故云無量二信下約信相疑除釋護佛護法性爲令衆生不起倒惑信相但推八十短迹惑於法報常住之本四佛示本令悟八十即是常用故名爲護二此一下揀示指敘宗文名此一句義雖種種不出於三謂體宗用正雖敘宗宗必冥體體必起用是故此句不可獨釋四德

如後二觀下約觀釋上敘經宗義歸果佛當
機聞見惑破理明今之行人若不於心明方
明佛徒聞此教有何益耶故令觀心覺於四
諦及以四德既即我心免數他實此文分二
初約諦約德立圓觀二初約四諦二初總明
境智四門四諦俱通因果門從理開就果爲
便諦有苦集宜對初心行者應知借四方佛
表四諦智此乃託事兼附法相入心成觀是
故四諦即一念心陰心是苦現惑是集即智
是道本寂是滅如實知之名四諦智二東下
別示境智二初觀境四諦法相前果後因今
從修觀始因終果故世出世集道居前苦滅
在後初心觀境欲易研尋宜從近事故順世
俗甲乙五行四季等名令四方義成使四諦
可識務在立觀不拘名教二觀此下發智既

溪三

十七

於一心即觀四諦觀之不已眼智發生任運
持護妙理不失倒惑不起然須深察圓觀四
諦皆稱無作苦集逆修體是性惡即逆是順
道滅無功故云陰入皆如無苦可捨塵勞本
清淨無集可除邊邪皆中正無道可修生死
即涅槃無滅可證見此炳然名發諦智二又
下約四德上四諦觀雖觀一心四教行人皆
可修證今就四德各明三觀初心頓修的屬
圓觀東方對常常破無常塵沙淨也無常破
常見思亡也雙非破二邊無明集寂也說有
前後修在一心三方例此二觀東下約諦約
德示佛名前明覺智但是通明若於觀心不
論別號則觀於經未爲極順今於集諦達即
真常名爲阿闍此翻不動也次於苦諦達即
真樂真樂尊重名爲寶相次於道諦達畢竟

淨常住慧命名無量壽次於滅諦達二我空
所顯真如是祕密藏一音徧滿名微妙聲四
方四佛本是心性即性爲觀觀符於性成四
佛名四我今下敘用二初分文二隨釋四初
能破勝法二初依現文示二初示三法體能
破勝法在境智行如將破賊須身力健次權
謀深次兵器利二依於身故喻於境身須有
謀故喻於智謀要兵助故喻於行此三若備
三障必忘二若相下釋三法相二初別示二
初別教行智理三次第資發修時縱也法報
應三果中齊顯證時橫也良由此教本有法
身爲惑所覆故須別作緣了之功相資顯發
復由此教性具三法而不相收致使功成三
身橫顯二若圓下圓教圓詮諸法無非法界
以法界智導法界行以法界行契法境界法

界無二一外無三故離縱過法界非一修性
宛然故離橫過因中三法修之既然果上三
身顯時亦爾二雖下總結修雖漸頓俱能破
於界內外障是故皆名能破勝法二觀下取
新本示舊文唯有彼於上根第一周法新譯
既廣更有二周其第二周離車王子爲婆羅
門說法身常無舍利事爲中根也其第三周
自有一品分別三身爲下根也此之三周皆
是勝法悉破三障今敘能破既云等法理合
該下三周之法也二次從下所破惡罪二初
重科總判二初科此文正示所破惡罪而言
敘空品者今舉所破罪彰能破用諸能破中
空用爲要故當敘也問前句已明能破之法
今那復有能破之方答前境智行是能治藥
今明三業專聞思修是服藥法妙藥不服服

不依方病何能愈此二相成三障可破二餘
下判二初明轉報異餘經惡報已成今難可
轉亦有經云宿業不轉沉已受報耶然是悉
檀被機異說今明三障若依經修無不寂滅
以法勝故二一徃下明三障由破戒三障之

漢二

十九

由教門異說豈可備陳今就一門由破五戒
五戒之義該深攝廣何法不窮然不礙餘途
故云一徃問祇由煩惱起破戒業豈由破戒
成煩惱障答由破戒業現多貪恚如因謗經
深著邪見姪欲熾盛此等皆從業起煩惱故
知三障逆順相由二今下依科廣釋三初釋
報障二初直約人道釋二初標示因果二諸
下驗果尋因五初明殺生報三初牒經示內
天者說文云夭折也二昔下尋因驗三經下
引經證舊華嚴經也具云殺生之罪能令衆

生墮三惡道後生人道得二果報一多病二
短命十地論云殺得三果一異熟果謂三惡
趣二等流果謂生人中多病短命三增上果
謂感外物皆少光澤不久住故二若貧下明
偷盜報三初牒經示二經下引經證同生同
名天者晉譯華嚴三十七云如人從生有二
種天常隨侍衛一曰同生二曰同名天常見
人人不見天三又下以事驗由破禁戒作諸
不善其二天龍必見棄捨名譽利養因茲散
失三若親下明姪欲報三初牒經示親厚者
謂父母兄弟妻子六親也地論云姪得三果
一異熟果謂墮三惡二等流果謂於人中受
二妻相競及婦不貞良三增上果謂多塵空
今云鬪訟與論符合二引經證人護者女人
志弱故藉三護幼小父母護適人夫壻護夫

漢二

二十

死子息護法護謂受五八等戒也三昔下約理推昔毀他法者令他犯戒故四各下妄語報二初明經脫略例上三報合有兩句二內下約義足釋二初足文示足奇成偶故云一雙念即怒也二昔下約理推五外下明飲酒報二初例加文示二昔下推示因果二初正示搏節亦禮度也由醉故乖聾駭五駭切癡也二引證經亦華嚴也由飲酒故嫌恨彌增故得引證二問下廣約五乘釋二初約五戒違經問以五戒名出小乘律何以釋今經王法相二答下約五乘持戒答一切行法大小俱通隨人智解用之淺深今釋五戒爲五乘法分二初總答以五戒名入一切法或多少異但是開合二提下別示二初約義釋二初以五戒配法體實淺深三初明人天二初引

經天地大忌者忌亦禁也戒也五星謂東木精歲星南火精熒惑西金精太白北水精辰星中土精鎮星五嶽者東嶽泰山屬兗州南嶽衡山屬荊州西嶽華山屬雍州北嶽常山屬并州中嶽嵩山屬豫州五藏謂肝心脾肺腎也以星嶽藏俱配五行但以五行對戒則三義自顯不殺對木木主生長殺則不生不姪對火火主照明邪姪私隱不飲對土土則鎮靜醉則傾搖不盜對金金爲刑殺盜則遭刑不妄對水方圓任器以彰不妄妄則反是配五行則已配五星嶽之與藏祇主五行經云五嶽蓋譯者順此方潤色耳違天等者上對五星犯之則違天下配五嶽犯之則觸地中成五藏犯之則伐身二又對下配法二初別配二初周孔教二初五常趙蕤長短經曰

仁者愛也置刑除害兼愛無私謂之仁也義者宜也明是非立可否謂之義禮者履也進退有度尊卑有分謂之禮智者人之所知也以定乎是非得失之情謂之智信者人之所承也發號施令以一人心謂之信今以不殺對仁殺他是無兼愛也不盜對義者盜則非宜爲也不姪對禮者邪姪則尊卑不分乖禮度也不飲酒對智者昏醉則不能定是非得失也不妄對信者妄語則人不信承也若以五常對五行者鄭康成注禮記中庸篇中云木神則仁金神則義火神則禮水神則信土神則智向以五行對五戒蓋取此義故以不飲對土不妄對水二對五經不殺對尚書者尚書斷自唐虞已下則尊禪讓而鄙殺伐也夫子以周室微弱號令不行乃約魯史而修

春秋以代賞罰使亂臣賊子懼故對不盜戒也禮有五焉周禮大宗伯之職曰以吉禮事邦國之鬼神祇寧謂祀之祭之事之以凶禮哀邦國之憂哀謂救患及災以賓禮親邦國親謂使以軍禮同邦國同謂威其不協及僭差者以嘉禮親萬民嘉善也所以因人心
所善而爲制也邪姪是不以禮交所以用嘉禮以戒邪姪也詩者善則頌惡則刺非妄語也易者窮理盡性之書潔淨精微之教飲酒昏亂者豈能窮其理盡其性乎二又對十下輪王法三初開五對十相二俗下示合七爲二意俗不能護口者以五戒制在家衆故口分四過俗護誠難故但制一飲酒是邪命自活者以酒資身不遵正戒名爲邪命三是爲下結法從人立名五戒雖是如來所制既對十善且從有漏判爲舊法故屬輪王亦名性罪性善

者以十惡法性自是罪十善之法性自是善是故輪王順世俗性說此善惡以化衆生二都下結示世間之善不免輪迴縱生人天復起惡業善尚如此況不善耶故云都是一切罪根二又五下辨二乘四初對五陰爲念處境不殺則色質完具不盜則苦受不生不婬則邪想不起不妄則遷流淳實不飲則了別分明此之善陰豈獨爲境兼資念慧故可於陰開四念處色陰身念處受陰受念處想行二陰法念處識陰心念處二念下從念處具道品三脫大論四念處中四種精進名正勤四種定心名四如意足五善根生名爲根根增長名爲力分別四種處道用名覺四念處安隱道中行名正道三十七品如平坦道空無相無作如城三門涅槃如城三故云下明

三

三

轉陰爲五分法身禁防身口故云色能發戒禪是正受故云受受禪定假想了悟身空故云想慧悟虛文中剎通字諸文所引皆無進趣無怠則至聖果故云行發解脫自識已證名解脫知見也此即轉五陰成五分法身也四當下結五戒爲二乘之法三又五下明大乘三初總標示二提謂下正配法門三初約經配四德以大乘人了知五戒體是心性若受若持一一順性性具四德故五無非常樂我淨此總對也亦可以五別對四德心與衆生性無生滅是故順性持不殺戒是佩長生不死符印此常德也心與衆生性無婬亂故順本性持不婬戒名出入無亂心與衆生念念真實無虛妄間是故順性持不妄語戒名往還無間此二對淨德也心與衆生性非昏

醉故順本性持不飲酒戒名統御一身即我
德也心與衆生性即菩提離貪求苦故順本
性持不盜戒名立道根即樂德也二束下約
事對三業不殺盜淫身業也不妄語口業也
不飲酒意業也持既順性故立戒因成佛三
業佛身口意隨智慧行無有過失名三無失
以無失故不須防護名三不護身業現化名
神通輪口業說法名正教輪意業鑒機名記
心輪三皆摧碾衆生惑業下地不測故名三
密三三軌下約理對三法五戒即理一止一
作皆與圓融三法相契若欲別對其理亦成
不殺衆生順常住理即真性軌不淫則心淨
不飲則慧明即觀照軌不妄則生彼信從不
盜則全他資具即資成軌既即三軌則與一
切三法相冥故知五戒攝法無遺二橫豎下

舉廣結名

金光明經文句記卷第一下

音釋

訓是周切 搜疏鳩切 璞匹角切 復方六切 鑿
苦定切 顛顛顛切 頊顛顛切 璽苦沃切 摯脂利切 巨
盡也切 閼初六切 壻思計切 駢語駢切 熒胡頤切
不可也切 脾頻眉切 肺放吠切 腎時軫切 協胡頤切
也僭子念切 佩蒲昧切
也僭子念切 佩蒲昧切

金光明經文句記卷第二上

溪三

宋四明沙門釋知禮述

二復次下明五戒事理復簡偏圓上雖通示
五戒之義該攝淺深若不委論事理偏圓何
能精識持犯之相此自分五初不殺戒二初
委示二初總示事理持犯欲令行者用理不
殺持事不殺方名初心持具足戒今明體法
須別空中體法即空乃屬偏觀望圓是殺須
體諸法無非中道世相皆常是今所論理不
殺戒欲顯此意故從人天辨至圓極故云因
果種種不同二若作下別明偏圓得失二初
偏二初人天但事二初人持戒功淺須加防
護心如牛馬若非繫勒則見奔逸若無杖策
則犯苗稼喻不作意則於境成犯報百二十
年是上方壽人道諸根但明肉眼餘根可例

二若任下天持戒功成任運成性心如河水
自然注入淨戒海中未論定共唯報六天以
人歲數較第六天當爾許歲唯得肉天無慧
法佛餘根可知若加下三乘加理二初二乘
義攝藏通涅槃經以外道先出喻以舊譬如
來後現喻以客譬佛所制戒名客戒也事戒
之外加修隨道及無著戒此戒位極當教灰
斷不說有報今據大乘生方便土受變易壽
諸文不說此土壽限但因移果易耳今云七
百阿僧祇者必取爾許劫數之後方入實報
也若在此土破塵沙惑亦得法眼今論二乘
初生之者但得慧眼二若下菩薩二初正示
義當別教次第修於三諦道共等常即假觀
是智所讚及自在戒無常即空慧即是隨道
及無著戒前空次假今從語便空慧居次言

溪三

二

等慧者即中慧也乃是隨定及具足戒分得此二當於初地生實報土名華藏海佛眼分顯四眼乃融是故名爲分得五眼諸根亦然壽是慧命已屬意根經云諸根復云壽命故須並說二比下結況此教比佛有於二意若當教者以因比果分滿不同二比圓教別教始終是菩薩法望圓始終皆是佛法故稱不具及損減也二若下圓二初示相二初明得意持二初略示事持即不傷殺衆生身命此同偏小輪王之戒但不殺所以與之永異次文所明理觀是也二又持下廣明理持三初約體明持此理不殺若其不解性具九界但云體達諸法即理全波是水猶濫通別未顯圓修故荊谿云若不談具乃屬別教故須體達假合之身三惑癡愛三科實法皆性本具

性無差別故名一相性非暗縛稱爲明脫既即性具何可毀傷癡愛是子假實是果全體即性性豈生滅如斯妙觀即障是德不待轉除方是持於理不殺戒二成下稱性得報初住已上至于妙覺皆得名爲成就智慧居常寂光此乃分滿依正二報也無生後報但現報故名常壽湛然無損減也五眼具足諸根亦然離不具也若論外用六根互通略舉眼耳根自在也現十界壽或脩或短壽自在也三是下結示因果二又圓下明得意犯二初總示二犯此理犯若其不解性具違用及殺法門但以慈愍能現逆相而解釋此豈前三教菩薩之行不能作耶故普門疏明瞋法門爲成就故常念觀音是知須得性殺之意慈方無緣故云唯殺唯慈名得意犯二如仙

下別示二相二初引人明事殺大經聖行品
佛說本生曾爲國王名曰仙豫愛念大乘時
世無佛十二年事婆羅門爲師後遂勸彼發
菩提心而婆羅門不信謗法王乃殺之而王
不墮獄以無殺罪故至梵行品佛說慈心之
果住一子地迦葉難言若菩薩住一子地云
何佛昔爲王斷婆羅門命耶佛言我以愛念
故斷非惡心也諸婆羅門命終生阿鼻獄即
有三念一自知從人道來二知是地獄三自
知謗法爲王所殺念是事已即信大乘尋時
命終生甘露鼓王世界於彼壽命十劫我於
往昔乃與是十劫壽命云何名殺然須明於
得殺法門令其愛念成無緣慈方合疏文唯
殺唯慈也二又作下據經明理殺二初正釋
前就不斷名持不殺今明有斷故云犯殺圓

教自論斷與不斷二義同時既明六即六故
有斷即故不斷亦可祇就即之一字明於二
義障體即德無障可論斯爲斷義障既即德
障何嘗斷斯不斷義故煩惱即菩提生死即
涅槃斷與不斷妙在其中諸大乘經說圓頓
觀有此兩門今就有斷名爲理殺故云析蕩
累著是業及諸煩惱以爲所斷樹神諭於修
觀之人劫火諭於能斷之智故大論三十云
譬如空澤大樹衆鳥集宿一鴿後至住一枝
上其枝即折澤神問其故樹神荅曰此鳥從
我怨家樹來食彼尼俱類子或當放糞子墮
地者惡樹復生爲害必大是故寧捨一枝所
全者大菩薩亦爾於魔外惑業無如是畏而
畏二乘二乘於菩薩邊亦如彼鳥壞彼大乘
心永滅佛乘心今文但以怨鳥通累著等也

劫火等者亦大論文論第二云二乘雖破三毒氣分不盡如草木薪火燒煙出炭灰不盡火力薄故佛三毒永盡無餘譬如劫火燒須彌山一切地都盡無煙無灰今謂佛智即圓智也斷陰入界生死即涅槃也約即論斷名得意犯理觀斷破名不持戒此爲誠證下諸理犯其義皆成一切塵勞是如來種此是性種亦敵對種惑非性染安名佛種以知即性修染本虛本虛名滅即理殺也二成下得報事理二犯既順性德殺害法門故殺法成就乃得法身垂應九界示命長短現根缺具此自在用真因分得極果究竟二前下結勝先且斥劣人天近事藏通淺理別教次第是故隘塞此等皆非修性不二通達之途唯圓實戒一攝一切宏廣無邊即事而中深遠莫測

卷三

五

凡小之徑必會逆順之異能同十戒之中名畢竟戒二不下結責先結該收後責局小二復次下明不盜戒二初總明事理持犯事盜可見就理論盜據阿含經演小成大人天取有藏通取空別取但中皆他物也非盜是何淨名云無取是菩提捨攀緣故二若下別明偏圓得失二初偏三初人天二初斥事持成犯人天妄樂爲可意也欲成理持乃斥事戒故就所求果報而責有漏之樂猶如糞中有菴羅果有智童子不應求食樂雜見思如世美食雜以毒藥食則害命有觀智人所不應求設得華報心不甘嗜而生歡樂云何凡夫爲欲持戒二貧下約經文明報四姓者毗舍首陀婆羅門刹利人中雖謂二賤二貴既乏聖財四姓三界俱屬貧窮洄轉水也復深水

也漏心持戒求可意果正爲有流洄瀆所困
三有流轉故曰有流非四流中一有漏因果
具足三障能障見佛天中天也亦是障於第
一義天以障隔故義言捨離此乃事持成於
理犯據經招報貧窮困苦諸天捨離也二又
二下二乘二初斥理持成犯二初約有求斥
智舉四諦境唯在苦於身等四觀苦等四流
獸生死苦忻涅槃樂在小名持於大名盜爲
於涅槃生忻求心介爾者微弱也微有心生
即墮四性既有性過乃屬生死無所得中而
生得想成不與取豈非盜耶二即非下引諸
經斥煩惱爲薪智慧爲火成涅槃食不非時
證此斥二乘忽忽取證是非時證不待法華
說於所因於小涅槃思惟取證大根不發如
焦敗種以見苦果故斷除集因以修道品故

造趣滅盡則非大乘即惑成智無斷無修即
生成滅無苦無盡故云非求法也中論云諸
佛說空法爲度著有者若有著空者諸佛所
不度身長三百下引金翅鳥雛以爲喻也二
乘但念空無相無願三種三昧如身長三百
無中假二智如無兩翅墮三無爲坑如鳥墮
地若死等苦成羅漢果也若死苦成辟支果
也苦等於死名死等苦而實未死也或云二
乘方便是死等苦聖位是死苦又學人是死
等苦無學是死苦三無爲者一擇滅二非擇
滅三虛空通舉言三二乘所證蓋擇滅也然
此論本出大品而大論釋之謂金翅身長三
百由旬能從一須彌至一須彌是鳥初出兩
翅未成意欲飛去墮閻浮提受若死若死等
苦中道生悔我欲還天不能自舉本論菩薩

墮二乘地今借諭二乘耳二法下引經明盜報不得大乘法食爲飢餓無大力用爲羸無大功德爲瘦有無善上起見思如瘡癬不見三身一體之佛不聞圓頓之法不入三賢十聖衆數三若下菩薩二初斥次第成犯行學道三對戒定慧言次第者此三皆隨空假中漢三轉三諦縱故從淺至深是故逐一而論取捨生死爲來空中爲去本淪生死已名爲來去已再來建立生死故成兩來破有出界已名爲去捨邊趣中名爲更去故成兩去如此來去豈非屈辱諦觀不殊離二取相今既別修以觀緣諦名不與取二取已下據經明盜報取捨既數即此名爲貧窮困苦盜業之報以別圓教詮變易報不就改生念動是業遷變是苦故起信論云動即有苦果不離因不能

初心頓絕思議故使義天雖近而遠即捨離也二圓二初示相二初明得意持二初讚理持相唯有圓觀乃能究竟離不與取絕取之觀謂五不受即不受四邊及不受不受此五不受若其不以妙理甄之恐濫偏教是故先云圓人觀諸法實相諸法不出佛及衆生依報正報此乃逆順二修之法全修即性一一無非中道實相中實之相非待對相圓人觀此故無四受不獨境絕四句之待亦絕境觀能所之待故不受之觀亦不受也既於初心即依中實修五不受則唯屬圓也五不受故名爲不取是大菩提能障一切有緣之願法法皆中高外無下下外無高何法可取何法可捨二如是下約經明報即以理富顯不貧窮富故不取寧有困苦以不取故思議即絕

第一義天不相違背乃應經文諸天不離二圓人下明得意犯盜法門者所謂性惡佛所師故名之爲法智由茲入故名爲門圓人得門逆順自在能作理盜亦作事盜今文略事例殺例淫合有其相若理盜義文出鴛掘彼經偈云不與者菩提無有授與者不與而自取故我不與取此意乃明究竟不取是究竟取此取得名如海吞流四重檐者鴛掘經云譬如大地荷負重檐一者大水二者大山三者草木四者衆生菩薩亦爾正法住世餘八十年爲一切衆生說如來藏是名初檐重於大山惡人毀罵聞悉能忍是第二檐重於大水無緣得爲國王大臣說如來藏唯爲下劣堪忍演說是第三檐重於衆生窮守邊地惡處豐樂之處不得止住是第四檐重於草木

彼經四檐諭於四事觀今文意似喻四弘二前下結勝淺而且塞者且兼也三不淫戒二初示事理持犯示事理者意在兼持以事扶理以理導事既居末代功在事持乃是涅槃扶律之意理持論於染不染者心觀他境名爲染法即境爲觀方名不染言種種者事隨理觀小大偏圓具如下辨二若闢下明偏圓得失二初偏三初人天二初人持心未淳如猴著鎖擎一油鉢者大經譬如大衆滿二十五里王敕一臣擎一油鉢經由中過勿令傾覆若棄一滴當斷汝命復遣一人拔刀隨之臣受王敕盡心持行雖見五欲心不貪著彼經以二十五諭二十五有拔刀諭無常今文諭凡夫持戒拔刀可諭三塗罪也割捨現麤求未來細如以賤易貴也二若爲下天二初

六欲文舉帝釋意徧六天二若斷下八地以數息法攝五欲心意生四禪受枝林樂極至有頂如冰魚等豈知長壽八難中一攝在味禪不染欲二若憎下二乘二初於小名持知苦斷集如怨如蛇修道證滅如親如寶但自調故直去無悲濟故不迴四方四維謂八方風諭於人天四違四順謂利衰毀譽稱譏苦樂也須彌諭二乘心也二若聞下於大名犯隨嵐此云迅猛壞劫中此風起時能破須彌以界外二土五塵能動二乘也大論中迦葉聞甄迦羅琴不能自安即云八方風不能動須彌隨嵐風至破如腐草三界五欲我已斷竟不能動心此是菩薩淨妙五欲吾於此事不能自安三菩薩此別菩薩望圓成犯緣但中道而生順愛若入十行退不取小不進

求圓如墮山頂故名頂墮旃陀羅者此云嚴懺乃是西土屠殺之輩以惡業自嚴行時搖鈴持竹以爲標懺故以爲名今斤但中解者於圓菩薩猶如人中屠膾惡類也既無即中二觀方便乃被教道中慧所縛既與無明怨讎共住何能勝之別修之慧無無作利望畢竟淨是染欲法凡斤別教多是住行及十信人以迴向位能圓修故二圓二初示相二初明得意持二初約義示三初示能淨諦觀一心者見思心也觀此染心即是淨性性非淺狹極三諦源全諦發觀即空假中即空故不染於染即假故不染於淨即雙遮故不染二邊即雙照故不染中道三諦三觀祇一刹那能所不殊中邊俱淨二即空故下示所淨愛見上之諦觀俱爲能淨今明見愛方是所淨

須知所淨該於通別佛菩提等是順道愛深
觀即中其愛自泯三三下示三諦名淨淨是
空義畢竟空者須空三諦以驗能空不少三
觀能空亦空故是淨亦淨於通不塞也二經
下引經證二初引經文二圓下會經意經就
位論持唯在果今約圓觀初心即能頓持佛
戒以觀實相因果無殊若不爾者云何能以
如來莊嚴而自莊嚴二圓下明得意犯二初
引諸經事既得本性染愛法門故能行於事
染之行亦能示於理染之觀染觀可例取菩
提義故今略之但依華嚴出事染相行不汙
戒者菩薩名也先以欲鉤牽者愛欲如鉤能
牽於人然後令彼達欲法界名入佛道二斯
乃下明用犯意指上三人久住性染無染法
門能現修染故得名爲非欲之欲而令衆生

法三

十一

即欲悟性故得名爲以欲止欲諭以屑者字
應作楬又作楔同說文云楔櫟也櫟子林切
出前櫟者必假後櫟故云以楔出楔也將聲
止聲者大論第七云譬如執事比丘舉手唱
言衆皆寂靜是爲以聲遮聲非求聲也二前
下結勝四復次下明不妄語戒二初示事理
問事中妄語重者乃是未得聖法言知言見
今法門解於未證得謂已證得與事何別答
蓋第四戒自知未得上人之法誑他言得故
此妄語除增上慢若理妄語內心實謂已得
已證此心增上而慢於他是增上慢故法華
云比丘比丘尼自謂究竟便不志求無上菩
提當知此是增上慢人今未解圓理於人天
三教各自謂實名爲妄語亦是上慢二諸下
明偏圓二初偏三初人天二初人二初妄語

相二初愛下苦者輕苦也三塗苦重人間苦輕凡夫不覺計之爲樂以苦爲樂故曰橫生樂想也猶如世人罪合當死而以千罰放命罰實是苦以得全命罰罰之下皆生樂想又如病者恐死加之針灸針灸實苦言除病故皆生樂想八苦交煎妄謂爲樂事亦如是二豎下見廣如大經凡夫外道慢心自高論之豎懂口宣慢言論之打鼓於五陰上各起四見文中略示色陰餘之四陰可以例作次句應云離色是我今云我即是色者文之誤也

漢三

十二

色中有我即色大我小也我中有色即我大色小也起六十二者五陰各起四見共成二十歷三世成六十而其所計不出斷常二見故有六十二也所說無實其猶諧謔故云戲論由斯戲論不見真空故破慧眼二備口下

結示口過見是妄情須生轉計即兩舌也宣邪惡理即惡口也巧飾邪言即綺語也諸見本邪以邪爲正而誑於人故標妄語其實備四二三十下天大經嬰兒行品云如彼嬰兒啼哭之時父母即以楊樹黃葉而語之言莫啼莫啼我與汝金嬰兒見已生真金想便止不啼然此楊葉實非金也木牛木馬木男木女嬰兒見已亦復生於男女等想即止不啼如來亦爾衆生造惡爲說三十三天常樂我淨端正自恣於妙宮殿受五欲樂衆生聞已心生貪樂止不作惡勤作善業三十三天實是生死無常樂我淨爲度衆生方便說有章安釋云此合天上四德楊葉諭妄淨色鮮明故楊樹諭妄常體柔輒故木牛木馬諭妄樂可戲故木男木女諭妄我似人故非想細煩

惱者彼有十種細心數法一受謂識受二想謂識想三行謂法行四觸謂意觸五思謂法思六欲謂欲入出定七解脫謂行法解八念謂念於三昧九定謂心如法住十慧謂慧根慧力二二乘二初出行相競執瓦礫者用大

漢三

十三

經春池失珠諭也春池譬衆生塵欲耽湎之境失珠譬圓解潛昏信小乘教如入水修觀如求珠但見偏真謂爲究竟如得瓦礫便謂真珠生滅度安隱之想猶如歡喜持出也生實未盡者猶受變易故所作未辦者佛道未修故離毒說脫乃一小脫即毒明脫名一切脫大涅槃也佛爲上慢執著三毒便爲解脫是故說離聲聞住此謂究竟脫其實未得一切解脫此以淨名對法華文出妄語相也二未得下結成妄語三佛下菩薩二初示其行

相佛說四門意詮一實別人根鈍各執一門彼此隔礙二夫下結爲妄語諸法實相離言說相離心緣相以法法體徧多少性融豈可定以空有等言一二等數此教言思既垂實理非妄是何二圓二初示相二初明得意持二初總標心口圓人根利聞空有等皆知性具性具四門豈有隔礙一門具三三門皆爾稱性而觀稱性而說既皆稱性性絕言思故觀即無觀說即無說是故觀說皆云如實二如下別釋心口二初明心離諸相而觀所非內外或約自他或約根塵或約心法或約法性對於無明此等內外雙亦雙非皆成四相妙觀得脫皆離此四亦不以無四相觀而得解脫性空非四相空非無此之二空名濫通教須就圓理揀彼偏空圓理者何謂諸四相

漢三

十四

不出本覺全本爲始即境是觀豈更偏著四種之性及無四之相非此二空下名解脫二如實下口稱四實而說二初約法示實等四句亦乃不出本覺之性以此覺性真空畢竟故名爲實具足緣起故名不實二不相礙故成雙亦二無二相故即雙非覺性無偏四皆全分實攝三句乃一實一切實不實攝三餘二亦爾是故四句皆云一切其圓解者雖談一句一外無餘何有一言不稱本覺真實之性是故四句皆得名爲如實說也二經下引經證初心圓說與果無殊故引法華本佛作證佛施權迹及開實本皆稱真如有何一句而非實耶似位妙音髣髴同佛口密之相開小成大能以佛聲如實而說令諸衆生聞皆入實二圓下明得意犯二初約果人示雖就

果示意顯始行故云圓人妄語法門者乃是性德權巧妙門也稱妄語者無而說有也謂十界冥合本是一乘無有三乘差別之相佛爲機故分別說三令諸衆生各爲究竟自求趣證速出生死如無三車說有三車令諸樂著嬉戲之子爭出火宅天無常樂說有常樂如以黃葉止彼啼兒此皆巧用妄語法門而爲利益也二經下引經證諸法無行經中文殊說不動相法門已空中萬天子讚言世尊文殊名爲無礙尸利不二尸利等文殊語天子言止止天子汝等勿取相分別我不見諸法是上中下我是貪欲尸利等具如今疏天子唯以性善法門而讚文殊且別教但中豈非性善須斷九界然後證得斯乃於法見上中下文殊欲顯圓頓之理具足善惡無非法

界特以三毒而自立稱然三毒等雖俱性具
不異而異是即實之權皆是祕妙方便之法
故一一句望實言非成妄語義雖是妄語而
皆是性本具法門今宗講者纔聞權假便謂
非性吾知其人未生圓解二將下明犯意同
於前文以楔出楔也二前下結勝五復次下
明不飲酒戒二初示事理二夫下明偏圓二
初偏三初人天二初人中事酒二初據教明
過三十六失出沙彌戒經大論唯三十五失
結爲頌曰

財虛招病諍	三	裸露醜名彰	二
無智得者失	二	說匿廢事業	二
醒愁身少力	二	色壞慢父母	二
沙門婆羅門	二	及伯叔尊長	二
不敬佛法僧	三	黨惡遠賢善	二

破戒無慚愧 二 不守情縱色 二
人憎親屬棄 二 行惡捨善法 二
智人所不信 一 遠涅槃狂癡 一
命終墮惡道 一 若得人常駭 一
酒失三十五 十六 大論之所明
漢三 五百世無手者梵網經云若佛子若自身手
過酒器與人飲酒者五百世無手何況自飲
伏匿皆隱也自說私隱故云發出也二過下
斥人好尚引滿者晉左思蜀都賦云合樽促
席引滿相罰樂飲今夕一醉累月注云酒將
闌故合併其樽促近其席引持也持滿以相
罰酒厚樂極故醉累月三國志魏尚書郎徐
邈私飲至沈醉時科禁酒校尉趙達問以曹
事邈曰中聖人達白之太祖太祖甚怒度遼
將軍鮮于輔進曰醉客謂酒清者爲聖人濁

者爲賢人邈性修慎偶醉言耳竟免刑晉畢卓爲吏部郎比舍釀酒熟卓醉後夜至甕下盜飲之掌酒者縛之明旦乃畢吏部也自署爲酒徒者以酒徒自號也如唐元結自號酒徒皮日休自號醉士之類也三國志吳太中

大夫鄭泉字文淵陳郡人博學有奇志性嗜酒臨卒謂同類曰必葬我於陶家側庶百年後化成士卒見取爲酒壺竹帛載之者謂史志皆書其事也古皆記言事於竹簡繒帛以未有紙也後代稱其故實故謂史籍爲竹帛也古今歌之者古今之人不斥其失往往爲歌詩以稱美之也不應作而作者引滿中聖酒徒酒壺之事皆耽酒荒恣其失大矣尚書酒誥誠之甚明而四賢反爲之是君子所不應作之事而作之也不應歌而歌者古今之

漢三

十七

賢當貶其失而反作歌詩以美之也若作若歌非酒之過失而是何耶二釋下三界惑酒二初別示二初引論明見醉釋論第八文也王即南天竺王也偈張爾雅云偈張狂也偈字張由切二又下約論明愛醉二三下總結二二乘二初斷通從別以明能醉九十八使者見惑有八十八思惑有十也四住者三界見合爲見住地三界思分爲三住地無明未吐者以酒論惑也半瘡人者四住已除無明尚在半安半病其猶瘡疾此亦大經中論二兼凡斥小以明所迷引醉歸之者謂佛引醉論歸還二乘也按哀歎品中諸比丘說醉論以諭凡夫流轉無常見常如醉小乘修無常想故如醒佛即引醉論於二乘謂於真常而見無常是醉義也故云引醉歸之文人合作

文世間下文辭從省四倒四德各舉其二影
互相顯三菩薩二初約教道觀中皆名不了
三初法別教至極但破無明一十二品故於
佛性見不了了又從初心不知五住即是法
界不名佛法是菩薩行故於佛性見不了了

二如下論凡舉五事悉論見性不得了了船
者大船也論出大經然彼十論並論於圓以
分揀極故云見不了了今論別者有二意一
者別教極果祇齊圓教第二行故見不了了
二者二教理同得意具德失意但中今就失
意故以論別如來藏經十論亦爾止觀在別
十六觀疏而顯於圓三如下合二故下明自
圓解外皆名邪見未得圓中正見故也二圓
二初示相二初明示行相二初得意持二初
稱性觀故得名醒悟此段文意乃將果德頓

爲始行苟不了知第六識心是性惡者何能
初心修如來行即觀祕藏肉眼即佛永不改
觀而見牟尼與妙德等荊谿的示須聞性惡
方修性行不可欺也二是下以圓伏故名除
酒法五住正習同居一念即惑爲觀觀外無
境如翻大地草木寧存亦如日光不與暗共
有何酒法而不除耶此人事戒輕重等持與
上理戒念念兼行方名究竟二圓下得意犯
二初明具大智故能理醉何名大智謂了性
具九界因果是故名爲飲酒法門真空實相
如起信論一真如性有二種德一如實空與
過河沙煩惱不相應故二如實不空體具河
沙功德無有所少故護一切失故空如瓶德
用無礙故不空如酒然河沙性德即十法界
圓融法門九界即佛成前持相佛界即九成

今犯相故犯相云變化五道宣揚哮吼其猶
酗酒之用也二波下明具大悲故能事醉波
斯匿此云和悅若飲酒後應死判生故曰多
恩末利即匿王正后也王嘗嗔怒欲殺厨人
諸臣共議國中唯有此人殺已無人知厨稱

漢三

十九

王意者時末利后即辦好酒美肉沐浴名香
莊嚴身體將諸妓女來至王所王見后已嗔
心乃息后即遣人詐傳王敕勿殺厨人匿王
後以此事問佛后持五戒月行六齋一日之
中犯酒妄二戒八戒之中則犯其五謂過中
食服香花作倡妓高廣牀飲酒妄語也破戒
之罪輕耶重耶佛言如是犯者得大功德何
以故爲利益故出未曾有經下卷入于酒肆
即淨名居士此上三人皆是高位皆住性惡
權巧法門故於持犯得大自在不可祇將慈

念而解若無性染慈豈無緣二夫下結得斤
失若得性具善惡之門則逆順俱當失茲要
柄則持犯俱非如把刃自害得失之要不可
不窮二前下結勝若善惡分歧豈醉醒不二
諸佛究盡寧有所偏二上觀下觀心釋圓論
理戒豈不觀心但爲前文是約教釋正爲開
解今撮五戒入一念心成於圓觀正爲立行
即聞而修修發之門說者應授若不爾者數
實何爲分二初附上諦智問上觀四諦各發
覺智乃言四佛今明五戒亦可觀之成五佛
不問意如此二觀五下據今戒體答若觀五
戒是實相者所發覺智豈非五佛然五實相
是所觀境五境發智名爲五佛實相無相尚
叵言一豈定五耶由附五戒各見實理故似
分五實理者何所謂本覺此之覺體是無緣

漢三

二十

慈故名不殺無取故不盜無染故不婬真實故不妄明了故不飲今圓行人以妙三觀順性修慈乃至三觀順性修智說之如此修乃同時故得名爲觀五實相觀之不已本覺全體發成始覺名爲五佛名字觀五觀行已去皆得稱發二次下釋煩惱障三初節示經文二上下對上下辨二初對上下定體二初對上報論義便報多約色惑唯在心故云義便二報下與下業論體別二初問起以十惡中貪嗔癡業名同煩惱如何分別二數下釋通二初引數人釋二俱數起但以輕重分於惑業二今師釋二初約心尅示貪等決定發動身口招報名業以異煩惱非決定故二若下因示生疑二初疑若決定心發動身口名爲業者下惡星等自是外境何名業障二此下

釋星等乃是業之前相表於責報故屬業障今示作業體下明宿業相若論作起時豈非心色二若下對上下論轉二障在因是故易轉報障已受是故難轉難者若轉易者必去三通下約文示相二初通別通論可見若別論者見惑執我愛但著事此之二惑皆具三毒執我三毒若其不遂則多愁憂著事三毒既不執我但恐不遂必無愁憂二今下指廣章安記錄不能廣陳見思之相今後說者委而示之故註云云三三破下釋業障二初節

深三

三

經二釋義三初定文是業已作之業將感惡報故有異相表發其事驗知此句明於業障二惡下略釋經文別有客星者以五星二十八宿常現則非惡星亦是下約常星失其行度躔次亦名惡星一方有七者角亢氐房心

尾箕東方蒼龍七宿南斗牽牛須女虛危營
室壁北方玄武七星奎婁胃昂畢觜參西方
白虎七宿東井鬼柳七星張翼軫南方朱鳥
七宿凡四方之宿皆逆數宿音秀失其分野
者周官云天星皆有州國分野角亢氐亢州
房心豫州尾箕幽州斗牽牛婺女揚州虛危
青州營室東壁井州奎婁胃徐州昂畢冀州
觜參益州東井與鬼雍州柳七星張三河
翼軫荊州熒惑火星也漢書音義云妖星曰
孛星彗星長星亦曰攬搶釋名云星光稍稍
似彗言其孛孛然似掃彗也又類散麻故云
麻彗左傳凡人火曰火天火曰災今但取風
雨雪霜乖候者皆名災法邪謂外道經書蠱
道者事釋乃是他鬼毒害於人蠱工戶切聲
類作弋者切蠱物害人也說文蠱腹中蠱也

楞嚴云貪恨爲罪是人罪畢遇蟲成形名蠱
毒鬼理解乃是自心三毒名之爲蠱此蠱能
害百千萬身法身慧命永爲所害比夫毒鬼
爲害至微矣醜惡形聲見聞爲怪不適意者
適悅也三夫下勸令正信二初明相見表五
罪二初約現文表示親離即親厚聞訟幽厄
即王法所加幽謂幽禁二其下例餘相亦然
二行下誠行者問邪師禮記曰龜謂之卜著
謂之筮卜筮者所以決嫌疑定猶豫也今云
折箴箴謂竹箴謂揲著取卦折竹箴爲文也
管公明者槐人也名輅字公明善卜筮所向
皆驗應知惡報由罪結罪由心苟正于心罪
報自蕩不修內德卜筮何爲吳氏春秋云宋
景公時熒惑在心公召子韋問焉子韋曰禍
當君雖然可移於宰相公曰宰相所以與理

金光明經文句記卷第二

音釋

析先的切 翅施智切 鵯愁朱切 幟昌志切 礫
 郎狄切 濫盧瞰切 髻髮如兩切 髻猶依倫切
 小石也 汎濫也 髮髻 猶依倫也
 樽租昆切 釀女亮切 瘡魚約切 酉沈醕切
 酒器也 醕也 亮切 瘡病也 酉醕也
 躔所呈切 鵯鵯星名也 攬搶攬初銜切
 所呈切 鵯星名也 攬搶攬初銜切

漢三
 二十三

蠱 果五切著升脂切萬屬
 巫蠱也 箴竹箴也

金光明經文句記卷第二下

溪四

宋四明沙門釋知禮述

從諸根不具下敘空品文爲二初三行半明所破之惡即三障文也次二行半明能破之方即今文也而釋一行半訖復依初開章以

溪四

後一行為四結成然取義成分章從便分三初節經立意以順重科云能空也二前下據意釋經三初立意禳謝也又除殃祭也二洗下釋經二初釋前三句欲知智在說故以聽經而爲般若又聽經發智慧故心有染故用不自在今既清淨能成解脫二前令下釋後三句至心之境即甚深行處不念此處安名至心三夫下勸信二初約身陳類今之三業表法之身本是血肉不淨之物次舉二喻梅檀香木伊蘭臭樹大經明闍王造逆後既見

佛罪除乃自敘云我見世間從伊蘭子生伊蘭樹不見伊蘭生梅檀樹我今始見從伊蘭子生梅檀樹伊蘭子者我身是也梅檀樹者即是我心無根信也二今下約行可期三業雖近三德雖遠修得規矩即近成遠規圓矩方孟子曰大匠訓人必以規矩三洗下行成破障若於浴等無三德觀如何能禳三障惡罪四從是下結成三初節示經文二能下正釋經義三寂下深明經意四初據今文示法寂滅華音涅槃梵語涅槃之名召三德體故知寂滅是三德成二前下約行成德顯三業既修金光明行成則契於三德之理修在名字觀行相似至分真位皆得名爲轉障成德不爾豈曰行方等經三報下明轉障成德四前寄下明經巧難知五敘流通明教相疏略

溪四

指上三明疑念序二初釋壽量品題二初正
釋二初約三佛難思以釋二初佛本無三不
唯法佛無身壽量報應亦乃不可說三以一
切法離於名字言說相故二隨順下隨世俱
立衆生若有得益因緣即須隨世立諸名相
非唯應佛立身壽量法報亦乃可論此三須
知無三不滅一法雖立三三不增一法良以
有無皆法界故故真無俗有真有俗無皆是
悉檀令於三身得四益也此文分二初列三
身各三二釋三佛三義二初約義分別二據
理融即分別且從修二性一令義易明法是
本覺報是始覺始本一合方有應用一徃似
縱說者應以次融即文非縱非橫妙會此義
令其聞者識圓三身分三初法身下法佛
二初別釋三初身始覺報智依本覺成故以

法性而爲師軌究論始本唯是一覺故云還
以法性爲身是故馬鳴歸命三寶即以佛身
及體相等而爲法實此身等者非分段變易
色質心智三科所攝乃是常住五陰等法聚
以爲身此法無相不可說示爲衆生故彊名
法身二法性下明壽色心和合乃有報得連
持壽命身既非陰豈有命根爲物彊指不遷
爲壽三此壽下明量量依身壽故同彊指二
此即下總釋身壽量上言非無不者若據次
文義當難非以其法體離於二邊及超報應
彊於此理立身壽量三種名字令物忘情也
二報身下明報佛二初稱法有報二初引經
此從順修稱理事說修行所感釋報義也法
華文證智德之報以彼經云慧光照無量故
涅槃文證斷德之報以云大般涅槃故二如

如下釋義修行所感二種之報乃是始覺與本覺合即以始本而為境智此二不異故名曰如各二如者智如如境境如如智故也復以菩提名如如智為能應真法性名於如如之境為所應真以函蓋合先喻應義函蓋雖合猶存際畔復以水乳喻其相冥此乃泯然而成一相始覺本覺義二體一正同於此二法身下明就報立三即身壽量也三中一言法身者報智所冥離法無報故初身言非身者非應佛有分齊身非不身者非報佛無分齊身又非身則非有非不身則非空中道法身乃本覺體始覺冥此能冥亦忘為成觀故彊名報智二壽三量稱本雙非為物彊指義皆同身三應身下明應佛三初明應物有三初身二壽三量皆如谷響大小隨聲是故

此三悉云應同二智與下明依二有應三初法不覺忘處始本一如故云智與體冥覺體自在故云能起大用二如水下喻真金上色須水銀和方能塗去聲物闕此一緣金無塗用三功德下合報智功德以合水銀法身合金處處應現合塗色像三能為下明應徧三土二初雙明報應二有量下單示應身初義者上所說報但論真法即自受用也今明垂應以他受用常住之應對於生身無常之應示二迹用是故雙明身非身等身即生身有分齊相故名為身非身是報無分齊相故曰非身小般若云佛說非身是名大身大身者乃他受用身也無分齊身其壽則常故無量也有分齊身壽則無常故有量也此二應用乃依真中二理而住機依事業二識而見住理

廣如序品疏文辨之二識委在起信論明論
意要在事識見則取色分齊故名應佛業識
見則離分齊相故是報身行者應知常身無
量通應三土無常有量但應同居所以者何
蓋實報機分證論見他受用身方便土人唯
稟別圓所見佛相雖小優降然匪生身悉是
報佛若同居土具四教機稟別圓者能觀報
佛故法華明常在靈山華嚴說法盡未來際
及諸大乘即於應相見是法性尊特之身故
知常身徧應三土若無常身唯應同居逗藏
通機及凡夫衆也次義分二初明有量二義
上之所說自受用外垂三土身皆名爲應其
他受用雖就對機名之爲應而是實因之所
感尅復名爲報非是差別逗機之用若論逐
物隨緣參差長短身壽量者須就同居無常

漢四

五

用說故今別示應身之相但於有量開出兩
量而此兩量依於事識但空見故唯屬無常
若依業識不空見者即此無常全體是常則
常無常二用相即二鳥雙遊也若上二土機
息應轉亦是無常以非八相故且言常七百
等者首楞嚴三昧經云堅首菩薩問佛壽幾
何佛令往東方過三萬二千佛土於莊嚴國
問照明莊嚴自在王佛彼佛答云如釋迦壽
我亦如是汝欲知者我壽七百阿僧祇劫堅
首迴此白佛阿難云彼佛乃是釋迦異名雖
機勝見長而七百猶可數故亦是有量之量
若阿彌陀人天莫數故是有量之無量也二
應佛下結應佛皆然佛佛既皆三身圓證應
身被物物壽長短豈不隨順各示兩量故彌
陀現長亦能現短釋迦現短亦能現長故大

論第三十六云當知釋迦文佛更有清淨國土如阿彌陀佛國阿彌陀佛亦有不嚴淨國如釋迦文佛國又三十八云此間閻浮惡故釋迦壽應短餘處好故佛壽應長故涅槃十二云西方去此三十二河沙有無勝國所有莊嚴如安樂世界我於彼土出現於世斯皆隨逐物機也二然此下據理融即二初約理融上之三身三皆在性則並二從修有則別不分修性則一三不互融則異別異故縱並一故橫是則乖於所詮法體若能妙達祇一法性而能成就一性二修名即一而三也修性雖成而其三身一性本具名即三而一也此乃得云全性成修全修在性性無所移修常宛爾方合能詮玄妙之文矣二故下下引文證經文具云若入是經即入法性如深

法性即於是典金光明中而得見我釋迦牟尼此乃以理而為經也金等三字即法報應三身異名與一法性即一而三即三而一若知此理即是三身三不縱橫名為得見釋迦牟尼故大經中明於三德不縱不橫名大涅槃我今安住如是三法為衆生故言入涅槃故知不達三身三一融妙不名見佛今解三佛既此融即方會此典玄妙文也二但信下明二字標題之巧二初委明其意二初從應佛融三釋二初明因偏疑見圓體偏疑八十是應有量四佛舉喻明應無量無量既破有量之疑即達法報非量非無量此因偏疑見於圓體二若從下明從圓體不偏題二初指偏題相二而今下示圓論意以不偏題故三壽量二字能詮二取意下就報佛融三釋三

初明報佛體圓上約品題壽量二字不偏有無則收二應能顯法報就文便也若義便者今經既以果德爲宗合以報身釋於品目以報身上冥下應則三身義任運成就是故二字正在報身二量疑下明因疑達圓報身義顯良由四佛以長壽應釋短壽疑故使信相達於報智圓具三身三經家下明從圓題品題稱壽量正在報身此從信相圓解所見蔽猶當也舉報身一當三身諸也二從此下結示立題二又一下明重解三初示異解時大師非止一迴講說故於一時別立名義章安既聞是故兼錄二亦作下明異解相二初標列章門玄義者文選云睿哲玄覽注云玄通也謂離文通示其義故曰玄義引證者義雖妙悟而與經會故引文證令人生信還源者

品題是派經目爲源所約三身明於壽量不離法性金光明源攝還此源令義究竟二玄義下依章解釋三初玄義二初直示三身壽量三初應身三初壽二延促下量三此釋下結因緣者感應更互而爲因緣二又壽下報身三初壽智外無境界外無智名相盛受既絕能所故無分別由蓋絕待當體名大二量者下釋量境智俱徧名爲相應此之相應實無際畔義言於量三此釋下結三又壽下法身三初壽法性不變無去來今是真久義約此久義釋法身壽二量者下量銓猶度也常久之壽實叵度量彊以雙非而度量也非多等者出度量相初非多少數次非知不知三非說不說此顯法壽是不思議境故大論云不思議者不決定也若離可說而謂法壽定

不可說是名決定非不思議上二雙非其意亦爾如此銓量是常久量又多少數銓量法壽非長短用盡知不盡知銓量法壽非分滿報可說不可說銓量法壽體非說默三此釋下結二初番下更作三雙顯示蓋前直以延促境智及雙非義示三壽量恐猶難解故今各以二義銓量欲令行人識三佛相文分爲三初番應佛二義第二番報佛二義境無分別非謂頑境全無覺知乃指心體本來離念名境無分別此離念心全體覺悟名智有分別此之境智究竟相稱智外無境境有分別境外無智智無分別是則境照於境智寂於智以此二義顯報身相第三番法佛二義體本無相故不可說依言顯德是故可說二引證二初引今文三初引二文證應身二義二

引三文證報身二義虛空喻通前取不壞喻無量應今取無相證境無念三引三文證法身二義問前云四喻皆喻應壽能爲無量今何引之證報證法答非全法報爲應身者應必斷滅安能延促不曾休廢今欲顯示三身融妙故即以應而證法報若昧此意諸大乘對機之身莫能深識二引新本二初別證應身二義彼憍陳如婆羅門欲得如來舍利如芥粟許此乃知佛九旬當滅故願求之可證應爲八十有量也王子下即栗毗王子答婆羅門也雖即法報且從福報以證勝應二總證法報四義智即報身境即法身具知不知說不說四但略舉一以等餘三四皆絕慮故可總用難思難解而證之也今述此意故注云云三還源三初總明意然法報應與金光

明皆是法性當體之名本無優劣以此經正用金等顯於法性故佛首唱而爲經目故金光明得爲宗源一切三法便成流派今解壽量須約三身恐作別解故示復宗二初番下示還相三初應還明勝劣二應全是法性能多利益也二第二下報還光報必冥法故於句句法報雙陳此舉所冥智全是法性寂而常照也三第三下法還金說時常默然時常說圓妙四德有何損益全是法性可尊可重也合論融即例前故略三夫解下例一切若解體金光明義豈止三身義歸三字一切法相皆還此源故得于從不即萬惑三既是下明兼錄意二時之說俱彰妙理後之學人隨何開悟欲示此意故注云云二此品下正明疑念二初序入正品指上說二從王下還從

序意釋此文二初節經文二隨文釋二初出人四初出處事釋如通序觀解見出名二菩薩下明位翻名道心復能化人故道心大此行雖該前之三教今位在圓三信相下出名二初約教釋名三初直就相似釋二初約名釋信通真似既言信相信則非真以其似信是其真證前相故也別教三賢是似信位初地已上方得真信圓教登住便得真信即以十信名爲似信言鐵輪者本業瓔珞經以六種輪譬六因位鐵輪十信銅輪十住銀輪十行金輪十向瑠璃輪十地摩尼輪等覺信斷見思得是鐵輪二下文下以相驗枹鼓杖也或作桴二又真下明似通上位二初明位位有似已證名真未證名似普賢等覺聖極名似故立賢名二信相下明高下難測三難者

下設難覈實二初高位無疑難二初難二此亦下釋二初約權實釋爲他發起是權示疑未了佛地是實行疑二法華下引二經證法華本迹皆是彌勒懷疑起問大集菩薩菩提未極故云未了本性菩提熏心起疑疑故求了故云菩提爲我作名二難者下斷見無疑難二初難二答通疑障真別疑障中中道未極安得不疑二觀解下就處辨觀今出人名觀那就處良由觀法皆從陰起以王舍城約陰便故就處明以善惡王觀無記舍能所不二人法俱空二空所顯即大涅槃防五住非禦二死敵城豈過此名字初心觀陰涅槃妙覺後心涅槃究竟今意正辨初心住處明後心者示此妙觀同果智也四歎德二初科判二初正科經二重判位植種也媿慚也云

溪四

十一

云者令準歎德判同普賢二供養下隨釋二初外供養佛二初約財法釋大經云諸供養中法供養最爲第一財供養則有窮盡法供養者則無窮盡二約觀行釋無明一念全體覺了此之覺心名之爲佛緣因資了是供佛義三喻可見二種善下內種善根四初直明種善義體本覺心名法性地觀性始覺名爲種子下種種久其義可知五善根者於本法性生不動信進念定慧五皆不動名爲五根此根生者相似位高故名增長二增長下以值佛釋成二初舉三事譬二風譬下以三輪合身輪現通駭動其心意輪鑒機智光照也口輪演教法水潤也三楞嚴下明三因增長楞嚴是定緣因也般若是慧了因也法性是理正因也二修一性照發互資由修照性由

性發修此三增長轉似入真於真增道並得名爲倍明轉顯四植種下結二成德三從是下正明疑念序二初節經二由有下隨釋二初生疑之由三初正出疑由遠則由於九十一日前告魔期滅也此經乃是方等後分也近則由在靈山聞佛定中唱序既起思惟故生疑念雖有二由無本誓擊此疑不生二何因下釋何因緣二初約三性分因緣通論三種即正緣了名爲三因同在理性以修緣了各三爲緣今文略云何因何緣須合性三但名爲正以當於因修中緣了合六爲二以對因故合二爲緣以當於緣就此因緣而生疑念二正因下約因緣疑壽命正因常久爲所顯理理境既常全境發智以爲能顯豈可無常能顯兼福而智爲正故但云智此境此智俱

感常壽故疑八十是何因緣三方八下釋方八十三初通示世壽三方二下方下特示中方爲表應化之事皆依理現是故外事悉內表理豈中方壽不表四德佛意雖密今智者師據後四佛約應顯常故以所顯驗其能表則知佛意三信相下不知表意故疑信相若達上之表意即見三身是圓四德豈疑應迹定是短促而反疑云何因何緣耶二正生疑二初約理教互疑二初執教疑理二執理惑教佛之所說是能詮教長壽因果是所詮理即道理也互執成疑文義可見二有二下約經文廣示二初釋有二因緣二初對前辨異前即經云何因何緣也前釋既以正性爲因乃以修中緣了爲緣今云長壽有二因緣既是佛修止行二善各具緣了即是前文能顯

之緣今於前緣自作因緣是故與前因緣異也二十善下就今解釋二初約十善略釋二初正示因緣三初於十善各論止行二初標示二不殺下釋相二初約殺盜釋二初約行相合具二今經下明今經互舉二若備下例

溪四

十三

八各論止行二善有三差別謂自他共一自行者如文云不殺是止放生是行不盜是止施食是行二化他止行如文云若不遮奪名止方便勸修名行若備論十種止行者不殺不盜如疏已明其八種即不姪梵行不妄言誠實語不綺語質直語不兩舌和合諍訟不惡口常行軟語不貪不淨觀不瞋慈心觀不癡因緣觀皆自修止行也自他共明者自不作十惡名止勸他不作十惡名行二今就下於止行各論因緣二初標二夫命下釋二初

就不殺示四二初止善因緣因是善本緣是資助爲成慈心故除殺具二夫食下行善因緣準止可知二不殺下例九善皆爾三總有下結示止行因緣數二此等下結成疑念二此約下就五乘廣釋二初結上起今若其但說十善因果斯乃淺近一塗之說於方等經未爲允愜此結上也今當更約世出世間漸頓止行方是佛因此起今也二人天下明今廣示二初明教義二初不殺二初明行相二初示相二初正示二初總示五乘命殺若但不殺報得命根斯善甚淺今辨五乘修因之命義乃該深梵云魔羅此云殺者以能害人世出世善故斷下諸命皆是魔業也二若遮下別明修者止行七初人天此事即戒善也二三藏二乘三事度菩薩以不能達三輪體

溪四

十四

空故行六度皆名事也四通教二乘五通教菩薩說法之過名非廢令勿學曰撥體空字下應云六度方異二乘或脫或略六別教菩薩七圓教菩薩二初順行亦斷佛命者此教初心即佛界故二圓人下逆行二初明二逆了順逆修即逆順性性非差別故名一相故仙豫事殺果佛理殺以即性故皆長壽因仙豫緣如前釋五戒中二此皆下明順理前三教人皆小行者以別初心行亦同小故皆不能即逆而順二如上下結廣始從人天終至圓教所有止行若無因緣善不成就然且約不殺須歷餘九及一切法皆須論於止行因緣故云若海二故大下引證不作上說豈一一度能施衆生無量壽命邪二而我下成疑念二明施食二初明行相二初明事法權實

二初明事法食體二初明事食輕重依報食輕正報食重二經言下明法食權實經是此經流水品云未來當施法食也世間人天也出世三教也上上圓融也二菩薩下明菩薩施相三初總明迴邪入正者令正信因果也萌始也種子之始剖也卉草之都名也鞠養也大論二十二云如國王子在高危處立不可救護欲自投地王乃使人數厚繒褥墮地不死一授以下別示四初授人天食二已持下授三藏食三已入下施通別食四設飢下溪四施圓教食無大乘法食故名飢國圓頓之法十五如王者之膳非衆人之食也膳善也謂美食也煩惱下觀惑即智如薪助火智因惑緣故能成於四德之食令四十一位弟子皆悉分得甘嗜三如是下結示二一法下結止行

因緣二此諸下成疑念二示觀行的明已心
無明貪愛能生一切煩惱子孫故名父母若
不能體二是性惡則須斷破乃名殺逆若觀
即性則不離癡愛全體明淨能觀所觀皆不
可得既如虛空癡愛則寂故名止善以即寂
觀歷諸心數皆令明淨復名行善此乃觀心
見一切法常豈得不感三身常果二已身下
釋已身骨髓二初明行相二初簡事從法二
初所簡事身事論已身人誰不解故今簡之
智推九界皆非已身況人報質二已身下所
取法身所取既深驗前所簡非獨人報然若
能解色心法界而捨事身乃今所取也今簡
不能解法界捨名非已身須知實相爲已身
者且是總說若依釋論於實相身論戒定慧
及妙善心爲皮血骨髓雖分戒等一一皆是

實相全分二爲他下就法明施二初施實身
五初施皮爲他宣說實相之戒遮二邊罪修
中道福此戒無相持尚叵得豈存於犯體既
雙忘名尸彼岸如此說戒方名布施法身之
皮血等例爾二說諸下施血諸禪定者九種
禪也亦是有漏漢四無漏一切禪定皆達實相皆
成無記化化神通故於滅定現十界身名諸
威儀例前合云非定非亂三說無下施骨能
照功忘故云非智全惑成智故曰非愚此智
起說無說可得能說既妙故使所說皆到智
地智地者智即是地本覺智也智所依地始
覺智也修性合一二義俱成四檀忍下例應
施肉論但三學及所顯理大師義加檀忍進
三成六度義以消今經骨髓血肉義方整足
說者應例前之三學明雙非相五說甚下施

隨前說戒等既皆雙非豈不斷於言思之道
然是談行今是說理雖皆實相而須分別能
契所契六度乃是全濕之波微妙善心是波
中濕也二將此下明施權身三初結實標權
以圓法食充七方便飢餓衆生圓頓之外所
有法門皆悉名爲餘飲食以勝況劣也二即
是下正明施相文略不語三教菩薩別教六
度可爲餘食髓是中道必在已身是故餘髓
但在真諦三引法華證示教利喜者大論五
十九云示者示人生死涅槃三乘六度教者
教言汝應捨惡行善利者未得善法味故心
則退沒爲說法利引導令出喜者隨其所行
而讚歎之令其心喜以此四事嚴說法二
如來下成疑念隨他意語施權飲食隨自施
實二從大下明現瑞序二初結前開後二初

溪四

十七

節經二至心下釋意二初結前二初明至心
至猶極也心佛同源今欲念佛故須徹至已
心實際二觀心下明念佛觀心既極故能盡
念佛不殺等種種功德皆等虛空以深觀故
乃成疑念二明開後妙機關應瑞相乃興二
正明現瑞二初敘意分文三初敘意二初正
敘爲爾者爾汝也表發信相增分真因感究
竟果二問下料簡作者二初問二答二揀感
者二初問二答二初簡通從別二雖然下益
本在他信相既爲發起之人乃同諸佛而爲
能應故知能感本在衆機故應一人是應衆
多也二分文三別相下判相二初正判二初
約十因一果判二又別下約十地一地判二
問下料簡二初約經宗簡二初問二答二約
似位簡二初問前判似位有二種意一約十

信似於分真二例普賢似於妙覺若今瑞相
定表十地豈令十信便登法雲豈使普賢倒
入初地二若須知二往一一地中具諸地功
德十信發真獲十功德等覺亦進後心十德
此則前後皆霑十益故約橫豎從容而判二
別相下隨文釋相二初節文示十相二約表
發釋相二初牒示誠勸疊尾音斐疊者文貌
意謂止可以經十段文彩準擬評議倣似之
耳不可備具論其行相故云不可責其備悉
二其室下約相表德二初豎表十地功德十
初此地初開者大凡小聖無明所覆境界局
狹今破此惑故以廣博表之二此對戒者準
於華嚴十度對地則初地當檀文略不言既
諸地互具則十度皆融三唯辱而忍增者不
逢屈辱寧彰忍力四督出衆行者督率也衆

行諸度也率諸行至于極果故以高座表精
進也五六七八九皆可見十隨階而圓者行
以智導故隨階位諸行分圓其猶根具注云
云者應明六度十度開合之相然六通大小
十唯在大十度者於禪中有願智力故開願
度有禪通力開出力度根本定禪守本禪度
般若有道種智開出方便度有一切種智開
出智度一切智守本受般若名二復次下橫
表一地功德二初總表一地功德二初約初
地三初通示二其下別表十初室淨表智二
初明了陰功能室能覆蓋故表五陰欲彰智
相須明了陰於陰達中故雙非二邊不爲下
釋自然中智不被二邊所作良由此智不作
二邊故本來覺性任運現前不得下釋廣博
微有所得即當局狹非直下釋嚴事小智無

常離過而已終歸灰滅大覺本有過河沙德
自然莊嚴二嚴事即下明三智體相其室表
一心自然廣博嚴事六字表三智始行圓修
今日頓發二天紺下寶間表境二初直表三
諦二一地兼表融即室中一地有此三相

溪四

十九

可表妙境三一相即行者應知諦智名別其
體不殊欲彰修證彊立能所三有妙下妙香
表慈悲一心境智普能與拔即名慈悲境智
高廣與拔稱之故使慈悲豎高橫闊三無差
別故能徧滿一切衆生三科之內四其室下
高座表四德常我是法身樂即解脫淨即般
若三德互具故一一具四不可思議名祕密
藏是佛究竟棲依之處故以座表五有四下
佛坐表覺智本有四德即是三諦以爲所坐
修得四德即是三智以爲能坐故用佛表六

放大下放光表自他以照此土光即能照他
土可表以自行而化諸衆生七雨諸下雨華
表四辯解一切衆生語言陀羅尼用法義辭
及樂說辯一多融談慈注無盡聞無不喜以
華表之文字性離故雨於空此辯方能詮示
妙理八作天下天樂表四攝布施愛語利行
同事此四攝物其猶雅樂悅樂於人九受天
下受樂表法喜一心三智即寂而照無法不
知此曰澄神受義天樂十根缺下根具表互
具用業轉現識已分破故見聞覺知根根皆
具三初地下總歎法性功德不可窮盡此地
能稱法性顯德故使諸佛不能盡說止十相
者經家略舉也梗介者介應作槩聲之誤也
云梗槩粗略也二初地下例餘地此去九地
地地皆然將橫入豎無豎不橫二復次下別

溪四

二十

表一地自他二初約初地二初略示自行功德即自行因果化他功德即化他能所此與法華十妙意同二其室下正表二初前五表自行若以此文配十妙者法身境界妙般若智妙解脫行妙因成位妙成佛三法妙此自行因果也若境智行對理性等住前三即此乃從疆約修別對若論法體真位無缺二後五表化他意輪鑒機即感應妙口輪說法妙身輪神通妙又表下以受天樂根缺具足既皆轉障可通對於眷屬利益二種妙也此即化他能所二初地下例餘地二從一下總現相二初迷意總表言意略者止在十義故意廣者以一切之言無所不該故二一切下依文別表該包也十法界者心佛衆生三人皆具具雖不異迷悟且殊佛已證悟心生在迷全

迷則曰理性十界信說則曰名字十界念念體達名觀行十六根徧照名相似十證十起應名分真十今表極果乃究竟十已心合佛十界體用亦見衆生十界同佛是今表果十界之義不作此解徒云一切該十法界三世間者假實依報也攬實成假名字不同即衆生世間所攬實法色心間隔即五陰世間正報所依依報差別即國土世間未曾有者分證十本分垂十迹雖得圓融若望極果明昧尤別如華嚴說灌頂菩薩所得功德如一塊土妙覺功德如四洲土故因圓理顯若自若他三十世間一一究竟清淨自在未曾有也國土下以三世間配三德且從義便也國土等者迷時假實既依國土果上智斷全依法身故於國土明實相滿衆生等者釋論云衆

生無上者佛是佛翻爲覺始覺人空終覺法空故於衆生世間明般若滿五陰等者釋論云法無上者涅槃是因滅是色獲得常色受想行識亦復如是二執既盡五陰自在故於五陰世間明解脫滿以三對三須知其意良以三德舉一即三顯三世間一一圓徧互融互攝新伊天目類之可知實相是要者實相無相極果俱是究竟忘相故稱實相自他圓滿也五從信下默念騰疑序二初分文二歡喜下隨釋二初見相歡喜二從至下默念陳疑三初明騰疑意積疑不騰恐成疑蓋二念釋下正騰所疑一切功德依壽得住其壽既促衆德奚爲故皆不疑但念壽短此覆不騰莫能決了三而不下明默念意威尊故默求決故念承前可見六從爾下止疑序二初分

文二疑蓋下隨釋二初正止疑三初止疑意疑蓋覆心者五蓋中疑能覆禪慧須預止者何哉若未解理心合致疑既覩威尊是決疑地儻堅執疑念則觀慧莫開故須止之令諦心受法例如等者疑是見惑能障真諦斷疑見道方進真修信相騰疑或權或實佛止則令自他獲益二從汝下正止疑三初大用不應八十之壽是法界全體起應物大用故不應以定短致疑二法性不應釋尊所證性海淵深豈以長短心慮測度三智度不應真信真智二皆具是能知能證汝今未具不應度量此三不應是約三身而成止意亦可前二約所思止後一約能思止三釋論下引證結佛所有法皆悉無量若以有量心慮量之必當覆溺於疑惑海是故四佛以三不應止其

疑念二何以下釋止疑三初釋法性不應二
初明八衆攝菩薩經列八衆雖已分明但闕
菩薩故約生法權實示之法性土者方便實
報也既不居此故不在言二若凡下明皆不
應測性如來所遊深廣法性尚過菩薩所行
清淨況復凡小而能思筭二唯除下釋智度
不應二初正釋降佛難測唯佛與佛乃能究
盡因智那知二舊用下兼示佛所知法二初
古釋可知故無常言此語者唯除如來句也
壽量既爲智之所知是可思法驗是無常二
天台下明今釋常智知常無量常智者究竟
無知方具足知此知稱性以全本智成佛智
故既知本性性豈無常古師不解故以有知
而爲佛智乃以所知是無常法三智性下令
比知大用無知之智既冥法性法性本用具

溪四

手三

足發現現長現短皆名常壽以全性故經釋
智性略大用者以可解故七從時下集衆序
二初正釋經文二初對他經前後二時者下
約今經解釋三初正明此室衆二初略釋時
衆二信相下明集衆意即八十壽顯三身常
豈益信相一人而已故以神力攝諸有緣令
聞圓常得四悉益言益處多者豈止一室此
衆聞後在處宣布耳二衆有下兼明一經衆
正明此室具四種衆傍兼諸品皆有四衆句
三初明此經具四衆影響衆者古往諸佛法
身大士隱其圓極助佛揚化爲伴奉主如影
隨質似響答聲四衆名義具法華疏二此經
下明衆與諸經同此中集天龍與華嚴何異
此品新本既云無量婆羅門衆又懺悔品信
相出城與無量無邊百千衆生俱往靈鷲豈

皆鬼神驗知集衆與諸經同三相承下止常情偏局解豈以此品舊譯文略便云止集天龍衆耶三總瑞下明經部法益二初異法華屬方等一切世間合該十界未曾有事悉具出現合於十界皆顯三德而且未授二乘佛記驗知未可同法華部但就通教對利根者明三身常辨圓法性與其二酥談圓不異既其首題不標般若部內二處稱方等名故今判教屬於方等而此部中得圓益者自於十界妙證新伊亦得稱爲未曾有事悉具出現

法四

二五

隨定具足以此六種雖名爲戒體是三觀自屬乘耳乘論五乘不取人天以其二種雖名爲乘不動不出體是漏善事戒所攝唯取三乘以此三乘該於四教是入理智雖分深淺皆動煩惱出生死故得名乘也今以四戒而對三乘論於緩急以成四句乘戒俱急者今之人天來聞法者是其俱緩者惡道苦縛莫預此會乘急戒緩者今諸龍鬼同集者是乘緩戒急著樂諸天嗜欲人等不預此者皆是其類復須了知集今會者雖云乘急乘有權實宿世修習藏通急者今在室中覩於四佛佛身不同但見應化縱聞長壽須歸灰滅滅已不生若其宿修別圓急者今覩四佛同尊特身一身一智聞山斤等雖是應壽知即法報三一難思名見常身權實等者此四緩急

衆生之中有實行者有權示者權能引實作
種熟脫久近因緣故云等事別記者即法華
淨名疏及止觀也今依彼說故注云云三齊
此下判屬序段

金光明經文句記卷第二下

音釋

銓 旦綠切 度也 繒慈陵切 得獨欲切
梗 梗古杏切 槩居代切 膳時戰切
槩 切 槩大畧也

金光明經文句記卷第三上

溪五

宋四明沙門知禮述

二從爾時下大段正宗分二初總示文義二
初示經文起盡懺悔讚歎空品三品全及此
壽量半品同是正說二凡三下辨三章大義
二初叙他師二初正明他義三初叙初師二
二云下叙次師二初叙二此乃下章安破以
今不云師及天台知是私破空雖是中乃是
因位用中破執且非果上所顯中體法雖不
異用顯義殊古既昧此故今不用三三藏下
叙真諦二初叙虛空等者新經三身分別品
云虛空藏菩薩白佛云何菩薩於諸如來甚
深祕密如法修行指此爲叙也二直是下章
安破諸經節節皆有發問豈盡稱叙故云義
弱二師云下今師去取彼虛空藏雖約因問

佛答乃云一切如來等有三身豈非果義故
去三藏取初家次師可知二新舊下明今意
三初就新經明宗體三初四佛說迹以顯本
拂八十之短疑明海滴之長應既聞應化能
長能短則達法報非滅非生本迹既融思議
乃絕上根之者祇聞其迹亦悟本源當第一
周也二若未下王子示本令悟迹新經壽量
品四佛說壽益物事訖有憍陳如婆羅門欲
生天故求佛舍利如芥菓許犂車毘王子說
偈答云假使蚊蚋脚可以作城樓如來寂靜
身無有舍利事兔角爲梯墜從地得升天邪
思佛舍利功德無是處鼠登兔角梯食月除
修羅依舍利盡惑解脫無是處中根直聞法
身理本不生滅乃悟報應能常無常理事既
融思議即絕當第二周也三若未下釋迦雙

溪五

二

論令俱解下根既鈍偏談本迹不能懸解互融之意是故釋迦具演三身所謂法身應身化身如依空有電依電有光法身是理應身是智智既應理即起化身三身冥一一不定一三身宛然是故品題三身分別法應是本化身是迹一時俱說則生妙解思議乃絕當第三周此之三番皆說如來常宗顯體意令聞者發智證理二懺品下判三品俱用佛智之宗顯法性體此即名為經宗經體一切衆生以此宗體而為本心若能懺歎及修二空故佛妙用全體而起令此衆生滅惡生善及發空用導成二用故云三品俱是經用三今之下明此本略二番以其二番皆顯三身今此一番所顯不別是故識師順好略機不翻後二二文為下分文解釋四初文二初分

文二解釋四初四佛說偈二初經家叙二四佛說喻二初料簡身說二初問二答二初明說本稱機宜共別無在二見亦下明身釋題判教此經屬通此教明佛丈六尊特一身異見故名合身今此室中有三乘衆三中菩薩利根之者能深觀空見不空理不空理者乃是生佛同一覺性故雖見佛佛非外來隨大隨小皆無邊際故云四佛同尊特身身智應用是一是常豈唯諸佛無二無別與其弟子亦復不異故云衆一雖未開廢利人見同若三鈍菩薩及二乘人既但見空乃覩四佛自外而來取色分齊但是應化佛尚各異弟子豈同三乘差別故云衆多二分八下分文解義二初叙二家分文二舊云下從初師釋義四初四偈立譬二初斥古二初叙二是義下斥

諸佛說法三時不謬故上中下善能詮有法故其言巧妙所詮離情故其義深遠若齊無意寧悟常宗故知古師全迷經旨二且作下今釋二初開章叙意二初開章大師所解其義無窮稱機釋文且示三意二四諦下叙意二初明三因果四諦是理因果通依四念是行修之在因四德本有證之在果非此三義莫顯常宗二若論下明三相由討果由因因果由諦欲成因果解諦居先二上以下依章釋義三初約四諦釋二初用四諦釋偈二初懸說諦義二初明四諦義三初對上明境智上明能說人宜對於智今明所說法合對於理二舊讀下斤古唯齊事言讀文者大論第三解十號正偏知文也故論問云云何正偏知答知苦如苦相等舊讀此文雖以如字爲

不異解而昧三藏以知事稱理爲不異摩訶衍中以知事即理爲不異致使解義唯齊於事全不顯理又復此文解正偏知正知於真偏知於俗三今明下明今師正義二初約二諦二約三諦二解意者以苦等四是世出世因果之境於此四境若其不了即真即俗及空假中則不名諦仍了二諦以中爲真三論空假意在諦中欲於迷悟十界因果一一見中法法無作方得名爲世相常住其理不爾將何以拂信相之疑二句皆初約苦諦釋二例餘諦結二明識下明對諦意二一切下以諦釋文四約因前果後以水山地空對集苦道滅例皆分三初牒示二引證三釋結苦諦中引小般若者金剛般若也對大品等稱之爲小以文爲小理同大部彼以須彌喻於佛

身今證苦者積聚義同非集所感然用佛報證生報者彰苦無作陰入皆如無苦可捨即生成滅故盤峙盤迴峙立也或作磐字誤也道諦中引法華智地者以地喻地既到智地道之中也水陸兩途者陸途但到海之此岸可喻三乘通修道品未度變易猶在此岸水途能到海之彼岸可喻一乘別修道品能即二死到三德岸滅諦中引法華者以空喻空此空畢竟故曰終歸五翳者煙雲塵霧修羅手也三光者日月星也常住滅理本來不翳今亦非淨問若以山喻佛身道以地喻智地滅以空喻妙空此三既有即理之教則可論於所證法身若初集諦引證釋結但論煩惱豈可亦得名法身耶答無作四諦一一皆中若非一切咸趣煩惱那名即中以即中故苦

卷五

五

名法身道是智地滅名妙空故知直以煩惱釋集示於法身其意最妙行者知之二明四諦釋疑二初示理明疑斷二初示理明相上釋總瑞一切世間未曾有事悉具出現以表十界假實依報皆顯三德今明十界假實依報一一四諦諦諦三德是理徧相名為法身知此名報起用名應應有長短二信相下示斷疑相三初所斷疑二四佛下能斷法四種之喻本曉應長大師特以四諦解之若非應壽全是法身三身一體何以妙會疏之兩說故先示云其言巧妙其義深遠若定喻一身言豈巧耶三若並別義豈深耶三舉應下歎意巧文喻應長意彰報法信相得意疑暗豁明二釋此下歎釋妙勸思四佛巧喻斷信相疑智者妙釋發行人解今既得遇豈不審思

二四偈下約四念釋念者即空假中三妙觀也處者身受心法四妙境也非此觀境三身不顯豈曰談常此釋分三初以偈對法三初捨別從通身受心法但是五陰故知四念本在苦諦然念處觀修通四教今唯約圓謂觀身淨不淨非淨非不淨乃至觀法我無我非我非無我皆成三諦二一切下從通對釋想行念處者祇是法念合此二陰今欲配地故存陰名想取行行者想取相貌行乃遷流故云行行下行字平聲三若觀下對偈所以常壽因果非圓念處無由得成故用對偈二若觀下以法釋疑二初明念處因果二初修因相四枯即空四榮即假雙非即中說有次第修無前後乃一心三觀也故佛於其四枯四榮雙樹中間般涅槃者正表於此二成五下

得果相三初明三德融即相即枯即榮即非枯榮一刹那修刹那刹那圓念不息歷於五品發似證真至果位時三惑盡淨百界五陰自在無礙名五解脫百界五陰清淨如空名五般若百界五陰究竟難思名五法身智冥五陰理是所冥故稱之爲理體雖是一不分而分般若能冥法身所冥以相冥故起解脫用雖三下明秘藏義如常所說二仁王下明五陰常住相性名不改即百界五陰八相莫遷十方周徧然非事底別有性陰祇善惡陰穢汚陰等當體常住名法性陰慎勿別求三陰之下明三身體用相法報雙非全體起用能常無常常用則長等者長則四喻短則八十既皆應壽悉是無常今以長短分常無常者由山斤等能顯於常若非體常安令應用

人天莫數是故信相聞八十滅疑壽無常聞
四喻長悟常住體故云常用則長無常用則
短二信相下將果用釋疑三初所破之疑二
四佛下能破之法三信相下得解之相此三
興向四諦釋疑其意不別然須深究三四偈
下約四德釋二初以偈對德碎地爲塵尚無
淨相豈存於穢故對淨德喻於理淨淨於淨
穢也二四德下以德釋疑二初顯德用常等
四德學者須揀名同體別一凡夫所著常樂
我淨體是見思二菩薩建立常樂我淨體是
無明三佛之所證常樂我淨體是中道今四
皆中是故皆以雙非顯之理須非於十二倒
也今此常等與其非常非無常等名異體同
四德雙非即法身也四能冥智即報身也法
報既冥則能應物起常無常至淨不淨自在

應用二信相下除疑念三初所破之疑二四
佛下能破之法三信相下得解之相若知四
諦斷疑之意此三可見二億百下一偈合譬
二初標古解二失二舊云下明今意破古二
初破僻取文二初出古解古祇齊文不知四
佛巧示之意二示今意二初示經深意四喻
有量百千是數誰不知之須達舉量舉數況
於無量無數二汝既下斥古誣經言有縱奪
縱知應化奪迷報法報法乃是應化體本深
文淺解自毀毀他自既招憊令他謗教也二
破偏執義義是所詮化身應身法身此之三
身皆具四句謂常無常雙亦雙非顯乎三一
不可一異而思說之古人迷此化定無常或
聞化身即法故常猶謂法常化是無常良由
不了即字義故起信論云隨其所應常能

住持不毀不失此顯化身二義具足三以是
下二偈斷疑二初牒因釋義二初以事行消
文二初約因緣釋因親緣疎不殺存命爲長
壽因此因親義也施食助命爲長壽緣此緣
疎義也二若作下約二緣釋不殺有二不殺
是止善放生是行善不盜有二不盜是止善
施食是行善是故十善各有止行悉名二緣
經於二善互舉止行一一皆是長壽二緣發
菩提心方名爲因言法性者無作四誓全法
性起是長壽因種種二緣既能資助真正道
心乃會法報非常非無常能起應化常與無
常三身一體斯爲妙常二法食下明法門指
上若就法門明於施食及不殺等如疑念序
疏中具說二修因下據果斷疑以長釋短無
常疑斷常住壽明經是故大士即指如來如

言無上士也故義淨新譯此句云是故大覺
尊四是故汝今下一偈結成二爾時下信相
歡喜二初據所聞釋信相解言本迹者體本
用迹也聞壽無量解迹用能常非長之長也
乃知迹用能短非短而短定八十之疑自茲
而去也深心者悟於報法高深之體也此之
本體妙絕於量及以無量二踊躍下約入位
釋歡喜眞信解發入歡喜位別在初地圓在
初住並破無明名疑惑去此皆內凡而釋似
位十地頂者若不立等覺即第十地破上品
無明之惑升於後心此位名爲衆伏之頂金
剛喻定旣爲最後無明所動故生歡喜及踊
躍也三從說下當機得道上根初悟者即用
新經三周意也陳如求舍利爲中根三身分
別爲下根阿耨多羅三藐三菩提翻無上正

等覺即一切衆生本來覺性非登極果方名無上及此正等此覺心發通於五即今是分真四從時下四佛還本二初因緣釋此信相等一類機緣覺性合與乃感四佛不現而現現爲發心心既已發故不還而還也二觀行釋諦境者三諦一境本覺也覺慧者三智一心始覺也全本起始名之爲發始合於本名曰相應善相應者必雙忘也不忘乃是通中起塞爲表俱寂故不現也二釋懺悔品二初釋題二初明懺悔義二初正明大義四初釋懺悔名三初對他經方等陀羅尼經明四衆懺法普賢觀法經明六根懺法大經闍王懺逆請觀音經銷伏三障諸經觀門皆能滅罪何法非懺然菩薩行爲轉先業作利他緣乃論無生等三種懺法聲聞自度縱明懺悔多

在作法求免三途故今但對大乘諸經明散明專二正釋名五初約伏首釋然懺悔二字乃雙舉二音梵語懺摩華言悔過以由悔過是首伏等五種之義今既華梵二音並列是故大師以首釋懺以伏釋悔乃至慚愧對釋懺悔欲令稟者即於二字修首伏行及慚愧等斯是善巧說法之相故不可以華梵詰訓而爲責也初約首伏釋首音獸自陳罪也欵誠也二約黑白釋企望也尚猶尊尚也三約棄求釋鄙恥也惡鳥路切嫌也四約露斷釋發露過現斷未來續五約慚愧釋二初總釋直以慚愧釋於懺悔未分五種人天之義故名總釋二慚則下別釋乃分人天及以四教事理之別也二初約人天釋人是肉眼但見其顯諸天則有報得天眼故見冥密此人慚

恥愧被名爲懺悔二又人下約四教釋良以此經通三乘懺三乘乃攝四教故也既慚愧義該於四教首伏等四豈不然耶說者據義應細作之又四教賢位皆要加功聖則任運可類三界人天果報作意自然又四教賢聖有修有證四教之理本非造作是故復得名爲人天四初三藏二初賢聖賢則七賢聖則四聖逮及也二又賢下事理二又慚下通教二初賢聖此教菩薩同二乘斷惑故三乘皆聖二又三下事理三又三下別教二初賢聖通教聖位止斷見思別教三賢能斷塵沙又伏無明故云尚非二總此下事理此以但中爲第一義四又三下圓教三初賢聖三十心去皆證法身皆垂八相故判爲聖十信長別苦輪海故故得名賢二總此下事理以具德

漢五

十二

中爲第一義三合十下合十數以慚愧中分於總別總一別五并首伏等四故成十番釋懺悔名二明懺悔處四初明懺須得處懺之所依如器淳朴非砧不成以何爲砧謂一實相無別實相即罪相是得此處者罪無不滅德無不顯此自分二初引經明處二初引諸經二初引大經二文麤言輒語等者七方便教三障須滅衆行須修能所不泯名曰麤言若圓教者一切修惡皆即性惡所破既寂能破自忘無言之言名爲輒語於此麤輒當處寂然思議道絕故曰皆歸第一義也四真諦者二死之苦五住之集以即性故無一可捨萬行之道三德之滅以即性故無修無證而言斷生死者就即論斷無斷之斷斷無不盡亦曰斷於性德之苦此四絕思皆第一義能

如是知名爲得處二引法華二文履歷名行親習名近此二皆須依一實處欲忍衆尋要住理地此地是心更何所行及以分別亦不謂我行不分別若不爾者何名得處寶處在近等者指障即德近豈過此然須觀照故云前進廢執權情名即滅化城體權是實名即至寶所二引此經二初引我即真我離人無法法即所攬常住五陰此陰爲舍普覆衆生闍王說偈解第一義名歸世尊今此經云我作歸處彼惑此應其義泯然二歸依處者下釋經云我作歸處我體如何故以法性諦理妙境佛師祕藏而證釋之十方等者若分若滿聖皆住中即以此處令衆生住初心能住名爲得處二若得下結示須處實相本立則能生於無生妙懺清信之道若其不體諸法

即性乃於中道平坦之地而起八倒名爲顛墜如盲等者四眼無明盲於佛眼入於偏教諸見棘林觸途成礙皆由失處二故普下明得處懺妙二初約妙明懺三初引經示妙端坐者身儀也禪波羅蜜具出坐法須者宜檢念實相者懺罪觀也實相無相當云何念必以無念之念念無相之相以無相相相無念念若於念外別有實相實相之外別有於念則非此經念實相也衆罪等者滅罪所以也前念實相蓋體修惡即是性惡性惡照明斯爲慧日修惡本虛如銷霜露我心等者亦出此經心性本來即空假中離三惑染名曰自空十界罪福二我叵得誰爲主宰如此體達是無生懺故使如來立三種名二無罪下約義明妙以三種名對於三諦其義可知若於

三諦歷別而解乃次第觀非今妙義其義妙者空即三諦假中亦然名即一而三三諦俱空假中亦然即三而一行者應知三一相即爲彰懺處絕乎思議若以此語增於言想則永不識懺悔處也三諸大下約人顯妙大人所學其法豈麤漢五二若識下結名妙懺解見思心即三德藏罪根既寂懺法自忘能所泯然何以名狀強稱此處爲妙上也三大經下明懺妙人尊二初引經書示當念深廣其猶大海就此懺悔名之爲浴萬行皆攝名用諸水此喻懺得般若無始惡業繫屬行人猶如債主見業實相名依投王業隨觀轉名返供養此喻懺得解脫心性無上猶如墻頭初心達性如草依高行位雖卑已能超過七方便頂此喻懺得法身也書云即劉子也二行人下

舉行人結四行人下勸先求懺悔處然懺悔處誰人不具何法暫非但爲本迷滿目不見全心不知故下文云於十力前不識諸佛勸求貧者須親善師須憑妙教勤聽勤問審讀審思若其然者必於能詮識所詮體脩然慮外無以狀名斯乃所求法性道理此理至妙爲懺法所依故名爲處若依此處而立行門方得名爲大乘懺也三次明下明懺悔法此乃示於能懺之法也三初開章此之正助亦名慧行及行行也大約即是緣了二因修德之法也二正法下示相二初正法二初略示上辨處中雖語能觀意乃以觀顯所依處今說能觀意乃以處顯能觀觀法不孤立故須相帶解之不濫方可用心二法性下廣示二初明修觀相二初就內心修觀二初明觀隨

於境法性者諸法實相也名如來藏何德不具雖具此德而本離念今乃稱本絕念而觀是故此觀亦具本性一切功德是故結云觀慧亦爾二境智下明境觀不二二初融境觀二初示相境是本覺智是始覺雖分本始而是一覺境智既爾方曰相冥無二之法故舉此經如如不異如名不異即境不異智智不異境亦云一合其體一故方能冥合二經言下引證經即仁王般若也智是般若處是實相能觀之智與所觀處同是般若智外無境也二皆實相境外無智也境智相冥其狀如是二說如下會說默復由說默二相不異顯於境智一體相冥非由無相境智焉發即默之說非由性離之說莫彰不二境智故境智後須論說默是止觀義例云故不思議境

即是觀是故得云境照境照智智照智智照境照者方照非說可窮照者應說非照可了說者方說非照可窮說者應照非說可了故知彼義與此無殊二以此下用淨心歷法二初例內心泯淨上論妙觀且就內心研於妙境攝一切法觀境若成可以此觀徧歷三科及以業惑自然皆見不思議境故義例云修觀次第必先內心內心若淨將此淨心徧歷諸法任運泯合二故云下引教示融相二初約法示毘盧遮那此方翻爲徧一切處乃以華音彰法體徧體雖本徧迷時不知今以內心妙觀徧歷於一切處皆見遮那此猶總歷復更別歷六作六受行住二作必兼坐卧語默作作是名六作明暗略舉眼受於色合例取聲乃至意法是名六受故總結云六根

所對雖結六受身必六作於此作受常得見
佛佛必三身斯由內心成妙三觀故於作受
常見如來三德三諦是故結云無非佛法二
者婆下引事喻三初以耆婆喻任運破障二
以摩男喻法爾生善三以那律喻自然顯理
此三乃是別示三觀徧歷一切任運能契微
妙三法說有前後照不縱橫二若如下明滅
罪相既於內心復歷緣境諦觀真契乃達十
界罪福無主修惡修善全體即是性惡性善
斯乃名見罪福實相故法華云深達罪福相
徧照於十方十方即是十界十界皆實相相
相宛然一收一切一切皆各收於一切此等
一切無非實相妄想皆實實亦自忘此爲大
懺二助道下助法三初明用助意正助二懺
修逐根緣自有一向修於正道直登圓住或

內外凡自有一向修於助道如南嶽立有相
安樂行不入三昧但誦持故亦能得見上妙
色像此二隨根修入不同若悟理時必兩捨
也自有正助相兼而修或先正後助或先助
後正或同時而修今之所立意在同修耳若
於三句都不攝者則人身牛也二所謂下明
助道法二初喻用助意清水喻正灰等喻助
以垢難去獨水不能灰皁助之水方有用二
略言下示助道法助本助正正觀不開蓋理
惑覆故修助行治於事蔽事蔽若息不資理
惑故令正觀開入理門具論六度略舉三業
其策觀者或以五法策於正觀亦助開門或
策事觀謂五門禪各有對治助開正觀三如
順下明用助功正解如順水正觀如順風可
喻正道能趣妙理篙棹可喻旋禮等善助於

風水船豈不疾三如是下總結四明懺悔位
三初他釋局淺二初叙他二此下略片二故
新下今釋通深二初正釋二初明六凡合懺
二初四趣二初明地獄二初造逆鞠亦養也
撫拍也惟惟憐子之貌也內則六年教之數
與方名注云方名東西殺逆殺或作弒同音
試下殺於上也易曰臣弒君子弒父也天雖
下明天地之不能容其受生故須入地獄也
以五逆罪感五無間二佛爲下二明破戒初
篇四重也後聚吉羅也若論五篇則初後俱
篇六聚則始終俱聚綺文互現故云初篇後
聚也三師謂和尚及羯磨教授二闍黎也七
僧印證戒者此據中國十人也佛海者佛法
如海犯重如屍花園可解言犯重者須出淨
衆二多嗔下明三趣心既多嗔等身口動作

溪五

十七

成於嗔業故墮蛇虺舉本攝末故云多嗔下
多欲等悉可爲例蛇虺者爾雅云蝮虺博三
寸首大如擘郭璞云身廣三寸頭如大擘指
此自一種蛇名蝮虺諂者莊子云希其意而
道其言曰諂餓鬼常飢等者舉果難當須明
懺悔二人中下人天二初人八苦者生老病
死怨憎會愛別離求不得五陰盛二天五衰
者衣裳垢膩頭上花萎身體臭穢腋下汗出
不樂本座四心者受想行識也籠樊者樊藩
也詩云營營青蠅止于樊今衆生處三界中
如在籠藩籬之內不能自出也二苦出下明
四教皆懺四初三藏二初聲聞二初七賢初
五停心謂不淨停食慈悲停嗔因緣停癡數
息停覺觀界方便停著我若貪等五煩惱障
心不得停應須懺悔停下剩心字次四念處

去用對位道品四顛倒者執身淨受樂心常
法我四念治此四倒四正勤者二惡者已起
令滅未起令不起二善者已生令增長未生
令發生四如意足者謂欲精進心思惟五根
者謂信進念定慧五力者名同於根以不動
排障而分兩科法華文句以正勤如意根力
四科對煖頂忍世第一位煖頂與此有不同
者或是文誤或別有意二苦忍下四果苦忍
明發者見道有十六心謂於下欲界四諦各
起法忍法智上色無色二界四諦各起類忍
類智此上下八諦共十六心斷八十八使見
惑也今云苦忍即欲界苦諦下苦法忍也明
發得苦法智也觀欲界苦諦已即觀上界苦
諦得類忍智餘三諦例說雖不下以無見惑
橫起故不墮惡道欲界七生者欲界九品思

惑共潤七生謂上上品潤二生上中上下中
上各潤一生初中中下共潤一生下三品共
潤一生此言初果也雖斷欲下明二果五下
分者身見戒取疑貪嗔貪雖通上不是唯上
嗔一唯下不通於上餘三徧攝一切見惑雖
復通上而能牽下縱斷貪等至無所有處由
身見等還來欲界是故此五名為下分餘三
品在受一生名一往來也雖斷五下名三果
向人也餘一品即第九品也亦名一種子那
含雖斷色下正明三果人也九品已盡不來
欲界而進斷上惑雖入下無學二支佛侵習
未能全盡故須懺悔言亦爾者例上羅漢懺
習氣也菩薩未斷且在入天二若乾下通教
教詮體空異前析滅空舍中道是大乘門利
根方見屬後二教今就二乘及鈍菩薩論懺

悔也支佛不達文字者不能說法化他也然
支佛有部行麟喻之別部行者或能說法今
約麟喻爲言也獨悟孤行喻麟頭之一角故
名麟喻三十信下別教十信但信者信能造
心是佛性故未能稱理者以佛性心別修空
故故使十住偏證空理十行但出建立之事
既其二觀互破互立未能入中十向不偏但
修未證然由漸修登地頓證前前雖顯後後
猶障是故名爲地地有障至等覺尚有未得
無學故此凡聖皆須懺悔四又十下圓教此
機初解中具二邊空假即中故能三智一心
修證不言名字及五品者以高況下也十信
尚懺況爾前耶但是等者法華中說三陀羅
尼雖通初後似位得之其相最顯一旋陀羅
尼旋假入空此齊七信二百千萬億旋陀羅

尼旋空出假此當八信已上三法音方便陀
羅尼以二觀爲方便轉入中道法音當第十
信也匡郭等者此三喻於法身智斷俱未究
盡俱須懺也二齊此下斤局下從造無間業
者上至圓教等覺故云位長位位橫論各有
三障煩惱頭數結業流類苦報等差故云義
廣古人何爲但在凡夫三是故下引經證結
大師本以三昧總持說懺悔位該亘凡聖自
然與彼校計經合寔匪尋經作此安布行者
知之三若人下舉利勸修四初明聞者宿殖
二語其下明聞者得報果報者此懺詣理功
至極果乃與諸佛互相恭敬三直聞下以聞
況修解既稱理修之成行則分滿之果證之
匪遙四已聞下結示歸敬佛恩若此欲報之
者唯當而說而修行之歸命禮佛五悔中一

其四悔法安得不修二正釋品題二初釋二字義二初依字訓釋二初釋懺二初明求鑑惡奴六切慙也二身被下明被鑑二釋悔二初明能廢二明所廢意云十廢者意如君主身口如臣君既克已臣息暴虐故意總十二又法下約法門釋種種二懺悔下明三種懺三初明三種相貌二初列名示列三種名示事通大小二小乘下約相釋二初明小三初作法毘尼此云律二十僧者此約懺僧殘罪也然對治有四法一治覆藏情過謂行波利婆沙此云覆藏或云別住謂別住一房不得與僧同處設入衆中不得談論亦不得答行此法者須滿一百日不憶元覆藏日數故乃以百日爲限二治覆藏罪謂犯已覆藏得吉罪不覆藏得殘罪若覆藏者先懺吉罪後與

別住三治僧殘情過罪謂六夜行摩那埵此云意喜前雖自意歡喜亦使衆僧歡喜由前喜故與其少日即六夜也故名意喜僧衆歡云此人改悔成清淨故云衆僧喜也四治僧殘謂二十僧中以白四羯磨出罪然覆藏不經明相直行摩那埵然後入衆出罪或半月作法者謂行別住時每至半月說戒須白衆僧云我犯僧殘對首作法者懺重吉也責心懺輕吉也摩夷論云故作者對首一說誤作者責心而悔小乘犯夷亦有懺法而疏文不引者以懺已漢五既爲學悔沙彌仍障主聖果故非此中復本清淨義也故荊谿云小學悔已障果仍成重罪未忘二阿舍下取相上明作法但令三業順於佛制法成罪滅尚是散心罪滅猶淺今論取相屬於定心想成相起滅罪

則深故蛇口想成豈唯姪罪得除亦乃欲心不起三亦有下無生言觀空者析法明空也觀造罪心本無主宰念念無常無誰能作無是業報我見若亡諸使永寂此觀若成四趣則除三界須出小乘三懺其相略然二明大三初作法二取相三無生行者應知三種懺法無生是主二爲助緣故前疏云灰汁皁莢助於清水若闕妙觀不名大乘便同外道無益苦行須近善師學懺悔處及懺悔法方可行於道場事儀故於諸事皆用妙觀照而導之使作法等皆順實理悉爲佛因有謂道場所修行法而爲事治須於十乘先修六法後方助開而不思前六在道場中用如今明懺具談三種豈捨事行又有一卷法華三昧別行於世大師制立正爲初心懺障道罪方可

造修諸禪三昧又諸苦行精進之門各隨宜樂初心可修但須皆用圓無生觀爲主爲導使一一行即修是性無修無得則成圓行也豈諸事行妙觀妙境妙修發大心安心等法皆妙修耶若其然者隨自意中歷彼三性全無十乘何名三昧若自未諳當依善友開導策修乃成深益又須了知大乘三懺後一雖可獨修不進則須假前二前二不可暫離無生得此意已方可說行三種懺法初作法八百等者虛空藏經云知法者復教八百日塗廁日日告言汝作不淨事一心塗治一切廁勿令人知塗已洗浴禮三十五佛稱虛空藏名向十二部經五體投地自說罪咎等九十日等者般舟經云有四事疾得是三昧一者不得有世間思想如指相彈頃三月二者不

得卧出三月如指相彈頃三者經行不得休息不得坐三月除其飯食左右四者爲人說經不得望人衣服飲食是爲四般舟此云佛立三昧成時見十方佛在虛空中立故名佛立也灰湯下明上諸行法各淨三業也旋誦下諸法各有製度旋誦之度方等最切旋一百二十市誦袒持呪一百二十徧一旋一呪不徐不疾旋訖却坐思惟中道正空導此軌儀故名作法二取相十二夢王者方等陀羅尼經云先求好夢凡十二種隨得一相則許懺悔梵網經云若犯十戒者應教懺悔要見好相好相者佛來摩頂見光見華等便得罪滅唱聲下彼經明行者夢中若坐禪中現此菩薩以摩尼珠印印行者臂作罪滅字或聞罪滅聲得此相起知罪必滅雖不下以在道

漢五

二十三

場非不作法俱從勝立名爲取相言事用者作法也三無生以無念念罪實相念與實相能所名別其體不二如是念之罪相既忘實相亦泯此慧如日銷罪霜露無緣緣畢竟空無中邊相此理無過故名最上雖不下此三種懺同時而修無生是正二爲助緣故云兼兩斯乃正助一合而行如膏益明證理彌速也二作法下明三種功能二初正示功能二初明滅惡二初四番通小釋言通小者以此四番釋三種懺意雖在大而且未彰異小之相故使滅惡於大小說皆無妨故云通小四中初約遮性釋三初作法無作罪者昔受佛戒由作法故發無作體若毀犯者得違逆罪今由作法翻破此罪言性罪者即十惡也不論受與不受犯之性自是罪如犯下論

云斬大草殺畜二罪同懺二種違制之罪俱除而殺畜償命猶存二取相由以定心想成勝相熏修力强能轉惡業是故能滅性遮二罪如伐下枝葉喻性遮罪根本喻無明也心惑既存罪可重作如枝葉續生也既對遮性辨於無明故此無明通界內外此即通小之相也三無生二又下約三學釋作法防非故滅戒罪取相專意故滅定罪無生觀照故滅慧罪事非是戒家罪散亂是定家罪惑暗是慧家罪三又作下除三報釋雖俱報障而有苦樂三惡唯苦違法而得故作法能除人道之報半苦半樂散善所招故取相能滅三界天報望人皆定無苦惟樂三漏所感故無生能滅四又下除三業釋例報可知能感所感而分兩釋也二又作下二番惟大釋前之四

釋通大小乘無生滅惑未簡通別作法或取毘尼之制今之二釋無生的破障中無明通惑不生爲今取相驗知此去惟就大釋二初別煩惱釋怖畏屬思憂愁屬見今作法成位在五品能伏此惑指伏爲破故云亦是取相懺成在七信位故滅四住既見真諦望中名相故名取相無生觀成位登初住所除的根本無明故知此釋別就大乘明三種懺二又三下通三障釋共除報者此乃現報父母生身得六根淨轉報實在正助合行若但理觀雖入真似亦有不得六根淨者故云三懺共除報障取相除業者約出假說能挾宿世無量業種作度生緣業不能障於業自在名除業障以其未是真出假位故見俗諦猶名取相無生除惑其義可知二又作下明生善

仍約喻顯五石者謂白瑛紫瑛石膏鍾乳石
脂五芝者謂五色靈芝也薑桂且喻小乘作
法故未生善若大作法生善非少五石五芝
通喻小大生事理善二如是下勸人修學言
須知者謂須知小大皆能滅惡生善須知此
三修方有益說而不行為罪所得也于五三今文
下明經具三懺二初示經有三文二結懺為
經用

金光明經文句記卷第三上

音釋

隆丁鄧切 識楚禁切 峙火里切 憊起虔
陟之道 企去繼切 蔽乃版切 叵普火切 虺許偉
同 蝮音於危切 剩石澄切



清刻龍藏佛說法變相圖

金光明經文句記卷第三下

溪六

宋 四明沙門知禮述

二從此下釋文二初對判分文二初對判明
經力用通指三品也今品下乃以此品對讚
歎品論於傍正耳二此品下分文二夢者下

溪六

依文釋義二初明夢中見聞二初夢見金鼓
三初正見金鼓二初釋夢疏中前釋信相菩
薩在其似位或是鄰極之似或是鄰真之似
於此位中夢見金鼓豈是博地昏惑之夢故
以二義釋於夢字初謂三昧名為如夢由達
性具修德無功因辦果事如夢勤加是故名
為如夢三昧次又入下乃以凡人有夢有覺
喻法性觀有入有出此以說默而為出入二
釋皆示夢是觀智初釋稍親問夢是顛倒迷
真之法觀是覺智悟理之法經文云夢疏中

那以觀智釋之迷解天殊如何融會耶答佛地迷盡凡夫未解皆不論觀於迷能解得言觀智故起信論云依業識故說見佛若離業識則無所見今明似解照法性故名爲入觀依業識故名之爲夢智解未極安得非夢照法性夢豈非觀智不得此意此文莫銷二法性即下釋鼓二初正釋二初直表三德能觀之智既以夢示夢必見相故以金鼓表於所觀即法性也蓋由鼓體具圓空鳴可表三德其狀殊大復彰三德無量甚深二殊大下三皆深廣以此三德一一皆是法性全體趣舉一德皆能具二得名三身三智三脫若不爾者那得三種皆無量甚深耶二此下結示即鼓之三德對光祇是所照法身即此法身攝報攝應爲上三德故云觀一而見三佛也

二從其下見鼓光全所照理起能照智故法性德皆成智德鼓圓空鳴光豈不爾鼓三殊大光亦合然須知法性體是本覺智是始覺祇是一覺由不覺故分本始殊既成大果已離不覺故始冥本稱法報合豈始覺得異於本耶所引新本同體同意同事者既法報合故與諸佛無二無別此即下此見鼓光正表報智此智冥法法具三故故報亦三亦是此報上能冥法下能垂應故云具三三復於下見光中佛二初約文表義言光從等者對上二身此總表應故云同事應不孤立必具三身瑠璃下法佛坐下報大眾下應二此即下結義歸圓二初別結此三以全法報爲應身故是故經文具表三佛二觀此下通結上義言三佛者即鼓表法佛光表報佛明表應佛

既其三佛皆具三義乃顯法法具三略則十種三法廣則一切皆三此諸三法順譬釋則世金光明所譬三法也若就附文當體釋皆是法金光明以一具三可貴可重義寂而常照義能多利益義故其義既爾是故此經名金光明也此所表義乃由大師得旋總持一中解無量無量中解一故釋題消文圖融若此見聞之者當去情著而思修之二從見有下夢見擊鼓二初分文二見有下釋義三初見擊鼓二出大音聲三其聲下聲所詮辨二初鼓是下明似智會法起用上鼓表三光三佛三祇是一三今對信相機智所觀合三爲一但名法身婆羅門表真似淨行既是鄰真故經稱似圓似能伏同體惑染故名淨智以此淨智會本常理乃以甘露相似相應能

以妙音徧三千界滅苦生樂故使經文復以擊鼓表似位三身若不爾者則信相本性與佛天殊佛之應用非信相感也行者應了釋迦信相同興此夢故有懺法利益衆生耳二鼓是下明枹鼓合成三身二從時下覺已說見聞二初分文二時信相下隨釋四初徃佛所二初釋受旦二初約教釋疏存二釋初約入觀出觀此乃就法橫釋次約伏惑斷惑此乃就位豎釋入觀本期登地斷惑故知二釋其意相須也言三十心者借別顯圓也二觀解言觀行位者既對分真即五品十信俱名觀行以未證真似受觀名內外凡位無明眠法全未破故故觀三身如夢所見真位分破於理明了故觀三身猶如已旦出王舍等者變易五陰因位未離如居王舍今出此舍表

至於果既論觀法有入分真及極果分故預表之二往者下釋出往王城靈鷲雖俱是地山爲佛居故表果地信相在城合表因地今以出往表因趣果二爾時下與緣俱三伸敬信首爲貴者佛法大海以信得入信是因人以上求故如首爲貴慈悲爲賤者拔苦與樂乃果人下化故如足爲賤以貴敬賤者以信扣慈也經禮畢右繞表戀慕四從以下述夢二初分文皆言行者古以散說一十七字爲行偈頌二等四五言則四句爲行七言偈則二句爲行所以古師分經悉以行數爲準邇世變亂製度增減字數致損元規豈但使古疏分經參差亦令目錄紙數無準寄語有識當依古製二以其下釋義二初總明夢二初明見金鼓三初見鼓形狀二其光下見鼓光

明三又因下見光中佛此三共是長行所表三身之意鼓雖具三是所證故合爲法身光具鼓三全理是智故合爲報身諸佛境智及以攝機亦具三身對上名應此合九三乃如夢三昧所觀之境三昧是觀二見婆下明見擊鼓上文所表合九之三雖是佛法既與心法及衆生法無差別故爲信相心性之境今於夢中見已似智會性法身起應機用說懺悔偈斯乃信相同於如來起經力用二從是下別明夢二初分文二釋義二初明金鼓有滅惡生善之力二初別分經六初滅世間因果苦前二行滅果諸有者三有也後一行滅因諸惱三惑也二斷衆下生出世間因果樂前二行出世間果斷衆怖者離五怖謂惡道怖惡名怖死怖不活怖大衆威德怖得無所

畏者有四一切智無所畏二漏盡無所畏
三說障道無所畏四說盡苦道無所畏離二
死此岸到三智彼岸後一行出世間因定謂
楞嚴此定具慧即觀不思議境等正道行也
助道即事度等對治行也三是鼓下能令衆
生自他俱備前一行半自行備後二行半化
他備害煩惱是破因除苦是破果下二句釋
上貪瞋癡釋上煩惱等之一字等取諸苦悉
令寂滅是正釋上能害消除義也四若有下
能滅報障兼得宿命以戒緩故處於地獄以
乘急故聞金鼓聲不獨出獄兼知宿命千萬
億生善知此事故正念諸佛復聞諸佛圓妙
法音五是金下能令衆生得諸法門先少得
者且約一種遠惡修善之法也後多得者隨
思隨願皆悉令成就也六若有下能破衆生

八難流轉即經云諸難也八難者三塗爲三
人中有四一盲聾瘡痼二世智辯聰三佛前
佛後四北洲天上一謂無想或長壽天二釋
此下總示義經示六文該益雖徧語猶總略
備解或難是故大師令講解者就此六文一
一委明從苦得樂漏得無漏捨小入大自權
至實從因至果節節皆論破惡生善具辯應
如二十五有皆得果報因花小草中草上草
小樹大樹一實事方便實報十番利益方盡
金鼓所出妙音被物之相具如妙玄及請觀
音疏也二從一下明教詔懺悔之法二初分
文二初正分經文二叙意生起邪倒障理者
於苦果身起八顛倒障四德此言報障也下
二可知聖人下據上釋迦自作叙云我今當
說懺悔等法今云聖人即本師也令達三障

即三德也示其懺悔總示也下三句別示也
示道理報障即法身也示因果煩惱即般若
三觀爲因三智爲果也示善行結業即解脫
也須願指歸者以願導之令至究竟也二自
懺下釋義五初教自說罪過懺悔二初分文
二夫法下釋義三初明法身是依憑對修合
故但名法身而性常離故具三德此三尊重
復名三寶法名不覺佛名爲覺此寂照性本
具諸法故徧一切修德之處以此和義名之
爲僧凡小雖迷而全體即是是故圓教初中
後心一切菩薩無不以此爲歸爲本此本若
立則三智三行三身三脫一切道法任運而
生經言我爲等者衆生性德全是果佛眞如
我也二內本下請佛覆護經兩足之尊者大
經明十號中兩釋一約人天善趣兩足爲貴

於佛天人中尊二約福慧俱備名爲兩足斯
須猶頃刻也扶疏盛也豐鬱茂也說文云扶
疏枝葉四布也二正明懺悔二初分文二釋
義二初總明懺悔二別懺下別明懺悔二初
分文二釋義三初懺煩惱障二初釋文三初
釋不識諸佛十力者一是處非處力二業力
三定力四根力五欲力六性力七至處道力
八宿命力九天眼力十漏盡力此十通名力
者即諸佛所得如實智用通達一切了了分
明無能壞無能勝故名力也大菩薩亦分得
此力但比佛小劣故沒不受名故直名佛爲
十力也此之十力法佛本具報佛證之應佛
用之衆生色心依正因果舉體即是三佛十
力但以迷故全智爲惑名煩惱障而獨頭無
明爲煩惱種蓋由觸處不了法身故喻牛羊

鳥雀之眼不識天子及以繫像以不了故三細六麤熾然而起言繫像者累土木爲佛像也人知畏敬鳥雀不然或引周禮正弓之繫者非此中意二釋及父母恩淨名云善權方便父智度菩薩母一切諸導師無不由之生以其不了獨頭相應全是二智是故法身隱滅不生三釋不解善法助道衆善能辦應身既其不解是故不修二三佛下結示舉不識解顯今識解是妙懺也二自恃下懺報障三初約事釋以姓傲他者以貴傲賤也西土刹利婆羅門姓貴毗舍首陀姓賤餘二可解此二善報若縱恣者爲修道障若不縱者堪能助道二今更約法釋二初約三學乃以事三表於三學由慧得道故如姓貴定能資慧故如財寶戒能制犯故如盛年染此下示爲障

漢六

相大論云自法愛染故毀訾他人法雖持禁戒人不脫地獄苦非求法者法過涅槃尚了如幻豈染自法以慢他人不見已他方名求法也二法華下約三教三中且取盛年一種該於三教窮子除糞至知庫藏歷漸三味二邊心強皆名少壯佛居道後究竟無爲方名衰邁凡人下欲明法壯更舉事壯藏教二乘通教三乘并體雖殊皆以空強而陵有弱別雖三觀共緣無量故恃法眼陵於慧眼此等皆名盛年放逸種姓財寶歷教亦然三著此下結須懺三學三教名報障者此心成就由宿熏感望後在因望前爲果故得名爲於報起障障故須懺三從心下懺業障三初節經示義二初一下隨文略釋十二段如疏列亦是教他者指口作惡業也即自造四過復教

他人行一切惡既隨癡心豈能反照經心生
忿恚者求五欲則忿他不與有五欲則忿他
見侵忿怒也經云親近非聖謂外道也外道
自以爲聖故佛弟子指爲非聖慳吝財也疾
妬賢也私詐曰姦曲媚曰諂由貧窮故而行
詐媚言無佛世敬田者以辟支佛出無佛世
故菩薩歷劫形服不拘故無佛世隨機化物
恩田者田有三種三寶曰敬田父母曰恩田
貧窮曰悲田通名田者皆堪種福故經憍慢
者俱舍云慢對他心舉憍由染自法三造業
下示解釋法約今稟教且人爲始若所懺多
屬四趣通惑所造名有漏業別惑所造名無
漏業大悲不思議等種種之業故等覺來皆
須懺也二從我下明供養諸佛二初立意分
文二依文釋義二初明財供養經我今等者

此乃即法以明財供何者以一大千界中自
有千百億佛況無量無邊大千諸佛財若有
限何能徧供良由了達所奉之供體是法界
出生無盡——一周徧故一切刹一切佛前皆
有六塵妙供養事不獨廣徧亦乃常存盡未
來時施作佛事爲彰次段修行法門故此別
名財供養矣須知二供其體相即爲門不同
故分爲二二法供養二初分文立意化他用
慈是無緣慈不離三智自行順智既是佛智
豈離三慈爲令易解相對說耳法供養第一
者能令佛壽常住不斷妙化無窮故也又有
法則二供俱成無法則財供亦廢是故法供
得稱爲最二依文釋義二初明化他法供養
二初化他令修行二初分文二釋義四初我
當下明化始以大悲拔苦二我當安下勸真

因十地之行三已得下勸真果菩提大覺四爲一下勸精進督使成行二夫衆下初教義二觀行一念心者趣舉一念也以妙三觀調妄即真名真明發或至初住或至六根或成五品皆得名爲成真果也故止觀義例道樹之喻觀陰等境成不思議名爲生芽初品已上皆名生果彼修止觀生芽生果與今觀心真明真果法喻相當調一切等者乃一心觀成歷彼彼心無不成觀與彼義例淨心徧歷任運泯合其意亦同二次四下化他令懺悔二初立意分文二依文釋義三初欲說懺二千釋下正爲說涉時既多造罪復重若了逆罪即金光明全所具理爲能觀觀由此顯出法性金等名拔王難障轉成德何罪能縛故五無間皆解脫相此乃名爲正爲說懺三我

今下說懺已二從我下明自行法供養二初分文立意前自下問譬如下答以譬帶法兼而答之金師譬金鼓釋迦化主也初習譬始發僧那時皓首譬今果後示現從始至今何嘗暫廢說行說懺互燒譬即懺說行互打譬即行說懺智斷亦然器成譬一啻之機自因得果故未得果須數燒打何嫌重說今是下辨異雖數燒打各有其門二我當下依文釋義二初自修行三初標章二珍寶下修因知足者疏存二解初以十地爲果脚足二以十度爲十地脚足言十度者六外更加方便願力智也於餘下釋出十度爲地足意華嚴十地品廣明其相三果中下明成果指經初句爲總餘三行三句爲別功德是福嚴光明是智嚴不離色光而論智光以其色心不二究

竟也三行之中疏不釋者今略列之冀免檢尋法藏須論八萬四千皆秘密故名爲甚深功德乃是六度萬行所成就者略言萬德廣則無量一切種智即中道智中必雙照今三圓極禪謂達禪達根本等皆法界故定謂楞嚴本性健相二是大乘事理二定於一切法皆明靜故泛舉百千根謂五根力謂五力即信進念定慧此五能生一切善法名之爲根力排五障乃以疑怠邪亂癡遮此五故名之爲力與上五根名同用別覺謂七覺分一擇法覺分二精進三喜四除五捨六定七念此七能令定慧均平通名覺分者有到極果覺知之分也道謂八正道一正見二正思惟三正語四正業五正命六正精進七正念八正定八離偏邪通至涅槃故名正道根等道品

修雖在因證皆果德陀羅尼者翻爲遮持遮一切惡持一切善數或五百八萬四千表破煩惱且言其實數一切法能遮能持十力如向記中已列此乃自行始終之相二從諸下自修懺二初分文二釋義二初請佛二後十下明懺二初分文二百劫下釋義五初懺報障二初出報障相百劫受身身作衆惡惡爲因緣即生憂苦能生所生皆是報障良由報得惡五陰故故疏與經對於五陰旣知皆陰非報是何須了五陰造作衆惡方名報障若作衆善豈名障耶二十方下請惡除滅願佛受懺即是除滅若不助正資導成懺佛雖有力何能除障意可見故疏更不釋二懺煩惱障二初分文二釋義二初出相經業垢者業名動作煩惱心動成於垢染亦可煩惱從宿

業生故名業垢二唯願下乞清淨經大悲水者同體之悲方稱爲大此悲爲水洗無不淨悲雖同體非緣不與三懺爲緣不洗而洗也三懺業障二初分文二隨釋三初豎論三世造業二初對報示現前色心名正受者未成報者有繫屬能若修善禪諸無漏道則來責報現諸業相或密爲障不依大乘三種懺法此障不滅二設問釋二初設未有問二明遮起答三初引經論證數家是婆沙論家是成實遮未來者斷相續心若不遮斷音未來必起故新經淨除業障品懺罪文中依三世菩薩皆云已作之罪願得除滅未來之惡更不敢作並遮未來也二今更下引現事例在家例造罪時捨家例修懺時若不遮斷必須更改未有之事至於正有三未來下據義結答

索然猶解散也二橫明現起十惡三遠離下求懺過去業若十惡十善止就三塗人天解釋豈安十住逮十力耶得前五戒持犯之意則今義可解十住十力別圓二教皆可明之持犯之意今義易明故須因位至於後果節漢六節論於十惡十善四明迴向此懺愛著因果之罪他以此國及餘世界是五乘人修善法處約處明人故云隨喜今明我在此土他界所修之善今悉攝取迴向衆生證無上道聲喻諸善角喻迴向近遠可知方便力大者若善迴向成大方便功等太虛然若不了善即法界不名迴向也五釋八下懺善惡二難二初揀示分文次一行半疏釋正取善遮道義二初四下釋二隨文釋義二初指惡爲難六初釋諸有險難二十五有者四趣并四洲六

欲大梵天四禪無想報那舍四空處未絕漏業故同名有釋報障義具於前疏二釋生死險難業爲險難至非非想定報爲險難至有頂天鬱頭藍弗是其例也下之業報險難可知三釋姪欲難四釋輕躁難二初正示輕躁相謂初心在緣名覺細心分別名觀亦尋伺心也此之陰心故屬報法二如羅下引聖凡例二初聖出觀者出定也就無學釋無惑業故驗是報法也二更舉下凡迴轉易轍者如學經未成復欲學律學律未成復欲學論此輕躁人終不成功業也不成業障者障應作者字之誤也五釋近惡友難如移廐者廐音救馬舍也馬之所聚也付法藏傳云親近賢善聽聞正法如昔華氏國有一白象氣力勇健若有罪人令象蹋殺後時象廐爲火所燒

卷六

十四

移近精舍有一比丘誦法句偈曰爲善生天爲惡入淵白象聞之心便柔和後付罪人不害麤舐而已王召智臣共謀此事一臣白王此象繫近精舍必聞妙法是故爾耳今可繫近屠坊彼覩殺害惡心當盛王令繫象屠所象見殺戮惡心猛盛殘害彌甚鄰於哭貨者謂墓學哭鄰市學貨蔡氏貨清經曰貨化也變化易之也故字有化又財也史記曰孟軻考母偏孤居近墓軻乃常戲於墓母曰此非所居去居市傍軻復戲爲商賈母又曰不可居又居學館之傍乃爲揖讓進退有禮母曰此真可以居軻後遂爲大儒著書七篇六釋三毒難疏分科云善惡八難善論四難經疏可了今之惡難經似列七約何云四蓋就三障義有兼獨一兼三獨乃成四難何者六趣

卷六

十四

險難三有險難及輕躁難此雖三難獨在報障婬欲愚癡及三毒難獨屬煩惱近惡友難獨屬業障若生死險難疏有兩解體兼業報故三障惡義當四難然須了知惡是性惡是故此惡即無生觀如此懺之頓消諸難二遇無下指善爲難二初明善惡俱能爲難二初雙明二義二遇無下依善釋文四初釋遇無難難二乘出宅到無畏處無難相顯故舉爲例暫樂人天自謂無難皆當此難二釋修功德難如一等者大論第八云迦葉佛時有兄

溪六

五

供養象種種豐足語此象言我之與汝俱有罪過象即感結三日不食守象人怖求覓道人見而問曰汝作何術令王白象病而不食答此象是我先身時第共於迦葉佛時出家學道我但持戒誦經坐禪不行布施弟但廣求檀越作諸布施故飲食備具種種豐足我但行道不修布施故今雖得道乞食不得妙莊嚴王者法華疏云昔佛末法有四比丘於法華經極生殷重如甘露未霑於是結契入山修道居山日久衣糧殫罄一人云君三人但以命奉道莫慮朝中我捨身力誓給所須三人功圓事辦一人數涉人間偶逢王出愛彼光榮功德熏修報生人天常得爲王三人議云我免籠樊功由於王王耽果報增長有爲方沉火坑宜早開化一人云此王著欲而

復邪見若非愛釣無由可拔一人爲端正婦
二作聰明兒兒婦之言必當從順如宜設化
果獲改邪婦即妙音菩薩也二子即藥王藥
上也王即花德也三釋值好時難如劫初閻
浮人壽八萬歲北洲壽定一千歲俱以壽長

漢六

十六

受樂不樂修道鬱單越此云殊勝勝餘三洲
故四釋值佛亦難興起行經云多舌童女舞
杆起腹至我前曰沙門何不自說家事乃說
他事汝今自樂不知我苦耶汝先共我通使
我有娘今當臨月事須酥油養於小兒盡當
給我天帝化作一鼠入其衣裏隨杆忽然落
地是時地裂旃遮現身墮阿鼻獄涅槃迦葉
品善星是佛菩薩時子出家之後受持解說
十二部經壞欲界結獲得四禪而親近惡友
退失四禪生惡邪見言無佛無法無有涅槃

遙見佛來生惡邪心入阿鼻獄調達是佛堂
弟而自造三逆謂出佛身血破轉法輪僧殺
阿羅漢教阿闍世殺父成就害母加行復以
惡心十爪甲下藏於毒藥欲鳴佛足刺足害
佛將往耆山出城地裂生入泥犁此等值佛
而成大難然上三句體是漏善障修無漏故
名爲難此句造逆似不類上以值三寶最名
爲善逆故成難亦可例上於善障道二若讀
下明平去二聲讀文二初明讀字通平二又
依下據經屬去三從諸下明稱歎二初立意
分文二種供養可對身意既不與言是故未
洩三業不足是故未備今加口業顯而復具
故成次第前雖自他修行修懺而能資益佛
之壽命名供養門今雖稱歎佛之三身而能
成就行人觀法名念佛門法雖互具從增勝

漢六

十七

故立二法門二標諸下隨文釋義三初標歎
報應二修全理之事也法身一性全事之理
也十方三世佛佛三身如此標章何所不攝
我依止者既云法性一體三佛驗知他佛爲
心性佛此依本覺起於始覺亦是三諦發於
三智非此依止不成妙懺故圓初心名修佛
行四眼入佛眼等大論文也十智與如實智
總十一智十智與二乘共如實獨在佛十智
者一法智二比智三他智四世智五苦智六
集智七滅智八道智九盡智十無生智如物
投等者石蜜至甘海水至鹹物投水會皆失
本味體法即性無不妙也此之佛海寧不歸
敬二就正下正歎二初分文二略歎下隨釋
二初寄言歎二初略歎略況二初釋略歎二
初金色相貌二初以他金比色閻浮金者此

是西域河名近閻浮樹其金出彼河中此河
因樹立稱金由河得名二又佛下以照物顯
光二然金下讚金色所以二初明是衆相所
依二金有下明爲四德之譬二猶如下釋略
況二廣歎廣況二初廣歎二初分文二從其
下隨釋言讚應色意彰法報色相是表智證
是裏雖分表裏豈是異體故新本中所明四
德別屬三身謂法具常我應身具淨化身具
樂分圓爲別融別爲圓故圓三身身身四德
其得意者了今應四即法報四當以此意尋
手經疏文四初歎我德二從善下歎淨德三
從功下歎常德經巍巍者高大貌也玻瓈此
云水玉也四從三下歎樂德療音老行水也
稽首者說文云下首也首頭也孔安國云稽
首謂首至地二從如下廣況二初分文二佛

功下隨釋二初廣況此之四句喻前四佛舉
大師釋之或喻應身有量無量或喻法報四
諦四德玄文序中顯金光明佛不能喻良以
三身三一自在是故四喻或別在一或總顯
三此文正同前對四德海無增減故常地體
是淨山形高出如我虛空無礙故樂二合喻
二從一下絕言歎二初分文二一切下隨釋
二初正絕言二更牒下牒喻帖合問疏釋寄
言及以絕言皆離思說同耶異耶答四德祕
密本離心緣今之稱歎爲令衆生入祕藏故
故寄言絕言皆彰離念寄言用四喻於四德
喻既莫數顯德忘緣絕言中四不可爲喻亦
顯四德忘於緣慮大師深達經文妙旨故解
二文皆絕思說也三從相下總結四從我下
明發願二初立意分文如牛無御者謂牧豎

也夫立願者若多若少皆須不失四弘之意
而此四弘須依四諦願不依諦名爲狂願今
就圓論依無作諦雖世出世二種因果皆了
即性無苦可度無集可斷無道可修無滅可
證如是則能徧度盡斷圓修妙證比前三教
願未免狂銷今諸願若失此意非圓行人二
隨文釋義二初正明發願二初自發願二初
願果滿四初我以下願意輪滿大覺圓明故
屬意業三講宣下願口輪滿三摧伏下願身
輪滿陰死天子多約於身煩惱屬意今從多
分四住壽下願慈悲滿非無緣慈住壽不爾
二願因圓二初分文二釋義四初我當下願
有爲功德滿六度成就此約真因破於六蔽
從斷正論是智德故故名有爲二斷諸下願
無爲功德滿此約真位垂形九道調伏衆生

任運不與惑苦相應是斷德故故名無爲故
海東法師云始覺斷障是實斷斷本覺斷障
是不斷斷正與今家智斷二德其義齊也三
我下願宿命念佛滿憶宿命故見過去佛亦
憶諸佛所說正法四我因下願值佛滿因過
去善見未來佛遠惡修善成智斷因二爲他
發願二初分文二一切下釋義二初願作藥
王拔苦二願作珠王與樂此能拔能與是無
緣慈悲所拔所與須論十番所謂果報修因
聲聞支佛四教菩薩方便實報今藥樹王拔
此十種行人之苦珠王合與十種人樂當以
此意銷與拔文初自分四初總拔衆苦二若
有下拔根缺苦三十方下拔病苦四若犯下
拔王難苦次與樂二初分文二上文下隨釋
三初與世間樂果經鼓吹古今注云短簫也

漢六

二十

經優鉢羅此云黛色即青蓮華也常於三時
者晝三時也二從願下與出世樂因二初分
文二人緣下隨釋二初令修行外緣具二初
值三寶二離八難二令修行內因具二初分
文二人因下隨釋二初生尊貴二饒財寶五
礙者一不作梵王二不作帝釋三不作輪王
四不作魔王五不得作佛三從若下結成二
初分文二釋經二初結自二結他二從若此
下約願隨喜二初分文二釋經二初隨喜他
二隨喜自五從若有下結成二初分文二釋
經三初結成斷惡二諸善下結成生善三非
於下結值佛多三釋讚歎品二初釋題二初
約義通釋二初示四悉意二初列二釋四初
世界思疑佛壽者即前經云作是思惟心生
疑惑也一心信解者開悟也即經云信相聞

是四佛宣說壽命深信解也斯人者相信也本事者今之所爲皆由昔願令眾歡喜故屬世界二從下爲人三從滅下對治罪之尤者尤甚也以德勝恩重毀之罪甚口毀曰咎亦訶也四從所下第一義言諸佛極尊甚深無量者圓初住去分以法性爲身體相妙覺盡以深廣法性爲身體相故起信論云諸佛如來皆是法身智相之身第一義諦離於施作今稱讚此令人入理二若欲下釋讚歎名二初分字釋義亦更互分別者以述德爲讚漢六褒喻爲歎但使叙述褒稱義成對字無在二引論證成彼之稱揚可證褒喻也二此品下結示別顯二初約三業別顯雖具三業口業爲正故是別顯二結此下約四悉別顯四義指向能讚人等也此品下別顯也於四悉中

正在生善對前懺品正滅惡故二釋文二初分文二隨釋二初長行二初釋對告人二初約對治釋瑞應云佛告魔王我積功累德今得作佛魔云積功累德誰爲證佛時以手指地云是知我是者謂指地神于時地神涌現爲證二又對下約爲人釋半空已上皆是男天半空已下皆是女天是鬼神報稱爲天者有天然力用故褒之以天召諸鬼神皆以天名不唯此也實智乃是善法之本今讚覺者生人實智宜告善女又別名堅牢宜證往事稱理不懷云云之意也二釋金龍尊金光明法門所依法也金龍尊能契行也若法若行皆性一修二故金爲理能讚爲龍能益故尊斯以證理起用二修對於一性當體名爲金龍尊也二偈頌二初分文二隨釋三初讚三

世佛五初總讚三初約事理明總三世十方
心意識境名之爲事何有一事不從理現經
云寂滅是涅槃義既稱微妙是大滅度則彰
三德非縱非橫名祕密藏密藏圓徧無別世
方世方宛然無非三德不以二相見諸佛土
斯之謂歟以此總讚爲妙何極二總理下約
三法明總法身者明性一也報應者明修二
也全修在性合三爲法名總法身全性成修
合三爲報合三爲應是故名爲總報應也一
切三法莫不然耳又法身總三土以實報等
皆寂光故報身總二土方便同居親尊特故
應身總同居淨穢兩處凡夫二乘見生身故
分別則三身三土勝劣不濫融即則三身三
土局徧相收以此讚佛佛德無遺矣三如是
下約四德明總經云諸佛清淨剋果明德也

果中衆德更無不會舉一淨德必常樂我四
德圓妙舉一全收是故此四乃是三身之德
三身融故四德徧嚴是故三身無非四德總
此爲讚極佛體用也今此點示故注云云二
從色下別讚二初分文立義二初分文大相
謂三十二相小相謂八十種好皆稱海者若
大若小悉無有邊故皆是法界全體顯現故
一一相無非法海據其總讚諸佛清淨微妙
寂滅以總顯別一一相好皆祕密藏大師見
彼得意處故故釋相好皆立海名二所以下
立義二初明能讚智巧二夫下明所讚德深
二初歷教分別二據圓融即此之二意學者
應知括經論之幽文立教觀之深趣彰化迹
之不濫顯圓機之頓照何者以分別故從勝
別示以融即故觸境徧收得後後者必得前

前得前前者不得後後不知後故當分義成能知前故跨節義顯若能了知真中感應二識見佛則今二意收揀無遺矣二識者起信論云佛用有二種一依分別事識凡夫二乘心所見者說名應身以不知轉識現故見從外來取色分齊不能盡知故二者依於業識謂諸菩薩從初發意乃至菩薩究竟地心所見者名爲報身身有無量色色有無量相相有無量好所住依果亦復無量種種莊嚴隨所示現即無有邊不可窮盡離分齊相隨其所應常能住持不毀不失皆因諸波羅蜜無漏行熏及不思議熏之所成就是受樂相說名報身文畢斯乃如來以法界用隨順衆生事業二識現報應身應身是今生身報身是今尊特及法性身依事識者但見應身不能觀

報以其羸淺不窮深故依業識者既觀報身亦能見應以知真如起二用故行者應知真如之用現佛身相大有三品一如華嚴談相好數有十蓮華藏世界微塵二如觀無量壽佛經明八萬四千相好光明三如此經及法華般舟等說三十二相八十種好此三品相既是真如全體之用若多若少皆無邊際故悉稱海無非尊特然有通局以藏塵八萬局業識見其三十二通事識見名生名應若業識見即無有邊不可窮盡離分齊相名爲尊特屬於報身此如今經別所歎相在三十二以金龍尊就佛四德微妙寂滅而爲總讚以總顯別故三十二無非祕藏故一一相離於分齊如空無邊常住不毀疏據此釋三身融即正讚尊特若其不知龍尊總讚是依業識

見應即報豈三十二圓光一尋名尊特耶言
真中感應者良以如來現應化身示住偏真
說於生滅及無生法被藏通機現尊特身住
於中道宣說無量及無作法被別圓機故文
句云丈六身佛住真諦丈六尊特合身佛雙
住真中尊特身佛雙住俗中法身佛住中道
疏有六處明應化尊特皆約真中感應而辨
如法華歎佛經文顯云三十二相八十種好
法身具故嚴法身故是尊特相是故荆谿類
同華嚴一一相好與虛空等又云一一相皆
法界海一一好無非名海疏釋今文大相小
相皆稱為海此大小相全異華嚴九十七名
一一皆與法界次第三十二相八十種好名
目無差又懺悔品讚佛三十二相八十種好
豈龍尊昔讚與今金鼓所讚優劣故知祇就

中道感應稱為尊特非是加添相好之數方
名尊特故華嚴中業報衆生等十種之身皆
盧舍那舍那非報報非尊特耶失此意者勿
議今宗也父母生身丈六身也三藏及通鈍
根所感尊特即是他受用報通教利根及別
所感法性是法身圓人所感此乃如來法界
大用對三類機現三種身故能嚴相亦分三
種三身力用優劣有殊不唯示果身相不同
亦示行因三種差別以今見佛皆是曩世結
緣機也如示迹因論四修相行六度等或示
事修或即空修或次第修或圓頓修示修不
等致令衆機結緣有異今日感見三身不同
二三身下別釋二初釋三身相三初釋生身
相林微尼此云解脫處舉手攀樹者即摩耶
夫人攀無憂樹而太子自右脅而生也阿夷

亦阿私陀此云無比仙人名也披開也太子
既生三日遂裹以白氎王召仙人相之於是
開氎相其形也相相炳明者謂三十二相皆
明顯也決定成佛者即仙人奏王之語謂輪
王雖有三十二相相不明了今觀太子相相
炳明決定作佛不爲輪王也悲不能聲者即
仙人自嗟年老不見太子成佛故泣也無聲
自出淚曰泣今云悲不能聲是泣也此是生
身也者疏雖標云父母生身須解其意豈後
二身全無父母今特云者彰藏通佛住偏真
也以偏真理不具五陰故使佛身從正習造
機緣若盡灰滅淪空永無示現故以父母顯
其有生機盡歸空顯其有滅通雖幻有亦須
求無依教分別相狀如是二如釋下釋尊特
相巍巍高也堂堂明也言尊崇奇特者此別

漢六

二十六

圓機所見身也常身常光者即凡夫二乘所
見身也然高明身相應知兩意有須現起有
不須現皆是如來鑑機進不中道之力於須
現者即爲現之如梵網經云方坐蓮華臺華
嚴藏塵相維摩所說身如須彌映于大海觀
無量壽相好八萬身量無邊此等皆是現起
尊特相也有不須現者但以力加令於劣身
見無分齊作巍巍堂堂而解以不可思議而
觀此如今經讚三十二爲尊特法性之身法
華以三十二相莊嚴法身相相皆與虛空等
量此等機緣悉以業識而見以中智而觀劣
即無邊色即智性故不須現起而稱尊特若
不爾者龍尊所讚三十二相疏云融三正讚
尊特如何和會學人於此當善了之三釋法
性相此乃諸佛第一義諦智相之身凡夫二

乘尚不知名豈能觀見若論極證等覺罔窮
又復初地不知二地是故樹神哀泣兩淚請
佛現身即此身也皆得名爲非下地見唯應
度等者斯是大乘第一義悉檀機扣佛者乃
以此身應之令見即前疏解一時之義一切

種智與中諦一時也無身等者非質礙身是
微妙身非差別相是智淨相一切智是萬行
首故以爲頭第一義諦諸法中最故以爲髻
八萬塵勞轉爲法門數多名髮大悲爲眼見
苦即拔中道白毫^{三六}不偏無染無漏爲鼻^{三七}鼻功

德香十八空舌徧嘗理味不共爲齒四十數
齊大論以十八不共法十力四無畏大慈大
悲三念處等爲四十皆不與下地共故四弘
爲肩荷負不息三三昧止散如腰束衣圓三
三昧祇是三觀空即空觀無相即假觀不得

空相故無願即中觀於二邊不作願求故如
來藏腹含三千故權實智手徧拔衆生定慧
等足究踐理地今第三身與餘處列不無少
異如觀無量壽佛經疏云色相身義當生身
及他受用同爲應身次法門身即今所列種
種法門義當報身乃自受用也三實相身即
以法門所嚴之理爲第三身今則合彼理智
二身爲法性身開彼應身爲生身尊特互有
開合三身不虧又復應知今法性身頭等法
門即是龍尊所讚之相心即色故名前二身
色即心故名爲法門但今歷教就分別門隨
機所見前不見後是故後從勝立名故使
三身有優劣相又復尊特及法性身皆業識
見以尊特相兼於別修故就身相高廣而示
今法性佛即修明性故隱色相從法門說講

者學者宜在精詳二種相下釋三相業此從如來淨佛土時隨彼機緣示修不等故分三種初釋生身業雖通通教今且在藏以其通教是大乘門利人能見後二佛故今就三藏修行事度爲相好因言修百福成一相者論

漢六

二九

存多解今明一種大千衆生遇緣當死一一救之皆得壽命是爲一福此福至百方成一相此指伏惑事度所成令彼衆生效此修之今見生身二若以空下釋尊特業言空慧者良以體法即空之慧三教共修鈍根之者但能空有利人知空非但空有亦能空空今分別門論尊特業雖能雙空且在別教但中之慧導諸相業諸業不出前之六度以知中故非莊嚴莊嚴乃能莊嚴第一義體令彼衆生效此修種今見尊特無分齊身三若以實下

釋法性業實相者中道理也全中實理爲能觀慧名實相慧實相即慧也非別有慧從其所照得實相名導成諸業者諸業豈離前之六度以圓修故一一即性故無非實相一攝一切故無非法界故散脂云安住一切法如性於一切法舍受一切法如是修之絕三教之情名不思議業令彼衆生效此修之今見法佛同虛空相二三身下據圓融即三初正融即圓佛頓證三身三相亦能頓示三種修相若其圓機能於一念修三相業能於一身見三身三相以了三身是祕藏故生身必具尊特法性尊特必具法性生身法性必具生身尊特見身既爾修業亦然如是方祛縱橫一異之情想也常樂我淨微妙寂滅此義方成金龍尊王昔是圓人頓修頓見故於一身

漢六

三九

讚三身相欲彰三相是祕藏故寄言讚後絕
言讚之欲令衆生圓見圓修故也二今經下
明巧讚經之讚辭就三十二即示絕言乃顯
能嚴即非莊嚴嚴第一體尊特身相豈不然
乎亦可得云非生非法而生而法上兼法性

種塵沙法爾不禮藏通之聖法性身佛究竟
圓中法爾不禮分證中道初後既爾中三十
相論用可知然不禮凡聖兼因而說非專果
也別有所出及注云云者指諸廣文解相好
處也

音釋

溪六

三

瘖瘖

瘡瘡於禽切瘡倚下切
瘡瘡口不能言也

敬米

切渠京

些切蔣
幾氏

也
枅

與先析的同切躁安則靜也切不

車可

何

嚙

也
杆

飲雲
器俱
切
豎
之呂
未庚
冠切
者童

僕

些

分齊

切分扶
分齊問
齊限切
量齊才
也

金光明經文句記卷第四上

溪七

宋四明沙門知禮述

二依經釋義六初讚七大相海三十二爲大八十種好爲小一一相好皆是法界無邊無底故稱爲海謂初句是讚第十四金光微妙

溪七

故云上色次一句讚第十五身光三一行讚二十八梵音深遠四一行讚小相中第七十九髮色青珠五行讚二十二四十齒具足六一行讚二十九眼七一行讚二十七舌大薄覆面至髮際八一行讚三十一眉間白毫相此八段中一是小相七是大相二眉細下讚兩小相海初一行讚第三眉如月初次一行讚第二鼻高好孔不現脩揚者脩長也揚舉也即是眉高而長也面門口也三兩句徧讚大相海者既云次第最上即徧讚三十二

也四得味下又讚四大相海初二句讚二十六咽中津液得味中上味二四句讚十三毛向上青色柔軟右旋三脩臂下四句讚第九立手摩膝相四圓光一尋下四句讚第十五身光面各一丈此言一尋是約佛說也手既摩膝即當面各一丈也此既常光驗知諸相皆是常相云讚尊特者故知不須身大相多但是業識依中理見即名尊特學者應知此丈六身若其量度即不得際若不度之所見如故如淨名室但是一丈而能容受百千人天又能容於三萬二千師子之座皆高八萬四千由旬其一丈量初無所改良以三脫不思議力使之然也今即常身數尊特相義豈不然微妙寂滅斯言得矣經文除此四大相外或歎放光拔苦與樂行業之因功德之果

溪七

二

悉如經文但須皆作十番益解其有二小相以文顯故疏不指之即面貌如月乃第四十一面淨如滿月也身無垢穢即十一身淨潔也五臂臚下二句又讚一小相海即第十四指長纖圓也臚丑凶切均也直也又音容六手足下二句復讚一大相海即第四手足柔輒勝餘身分三十二相八十種好具如法界次第龍尊智巧雖略而周三從去下徧類讚三世塵數而言一者過去不滅未來不生現在不住法身平等報應無差一不離多多即是一生佛尚即佛佛豈殊是故讚一類於一切此文復是讚尊特身何者如前疏云若見四佛同尊特身一身一智慧即是常身弟子衆一故若四佛不同即是應化弟子衆多故知祇就一身一智及常住義是尊特相不必

須論現起大身也文殊問般若者問字誤也應作說字今家依二經明常坐三昧一文殊說般若二文殊問菩提今所引文是說般若文也四從設下絕言讚二初分文二而有下隨釋二初絕言令兼例絕心三番者仍就分別門三身優劣不離分別有融即義學者應知五從下迴向一迴事向理即實際二迴自向他即衆生際三迴因向果即菩提際今闕實際菩提兼之謂無上道本性無上故也二從如下發來世願二初分文立意來在不久者即下授記品十千天子從忉利天來者是也二隨經釋義二初佛述二若我下龍尊發來願五初夜夢晝說願二我當下爲他取淨土願不修六度不拔衆生土無由淨當知四修及拔四相令於當世見我三身三奉貢下

同求記荊願以鼓必具圓空鳴義今讚如來一體三身名為金鼓讚佛因緣以此因緣趣向果地名為奉貢不論事相金鼓形也四若有下下化願五我未下上求願此之二願皆明滅惡生善二益在文可見三從信下結會二世事釋空品二初釋題二初正釋題二初約四教詮空示所言空者破相為義故一代教四空不同若不辨之迷名昧理此自分二初約部列四二初正判四空滅色入空者三藏教也且寄色言諸法皆滅謂析破見愛陰乃不生既詮實有滅方入空也即色是空者通教也體乎因果非四性生既詮幻有故即色是空也滅邊入空者別教也中道為空不唯空有亦乃空空然不知中具於空有是故次第滅二邊已方入中空也即邊是空者圓

教也中道具德何邊不中唯假唯空三皆絕待頓破諸相名即邊空二此經下約部須四判教屬通三乘同懺前攝三藏後通別圓導成之空合論四種故四空慧不得不明二而今下定品唯圓二初直示唯圓二初就理示攝機用四此乃通塗品在圓空斯為的旨是故中空即邊而示二何故下引文示諸部般若廣示衍中三教空慧復以三藏為助道觀斯為聞持利根之者廣談空相此空慧機義持雖利聞持根鈍故不廣談四種空相唯說即邊一中空慧二又空下略示圓相中受空名意彰蕩相凡夫執有塊然質礙二乘證無灰滅歸寂中觀絕念空此兩邊令畢竟淨約次不次分於別圓今不次也二直作下約六句對中簡二初明用句意若直說空是中道

義能空三邊其如邪小及以別教皆說雙非空於有無故迷名者謂與今同何能超悟邊即中空又復恐謂若是圓實合談中道但那但名空空唯離有豈此中道雙離二邊爲防此計故作相破相修相即三雙六句而對辨之若諸法相名相濫者無此六句莫辨異同二空破下正用句簡二初列六句雙非是中沒於中名存雙非者以中道名邪小稀立若雙非名處處皆有故特用之對今圓空辨於同異又外道二乘別教空句及雙非句體是思議可破壞法圓教雙非及空若立諸義皆滅是以圓二互破諸二又復諸二互修圓二則二酥中外道菩薩入圓者是二乘初心亦有修義此之兩雙諸二對圓優劣有異第三一雙屬圓當教名別體同是故相即不言修破

漢七

五

二空破下釋句相三初釋相破句二初空破中二初略示以理定詮不遭名惑豈聞雙非便是實理蓋能了知凡邪雙非體是見惑二乘雙非但證偏真別教雙非既存教道未與三融圓空若立前諸雙非須皆銷殞故云破也二凡邪下廣釋三初破凡邪雙非二初泛示見相二初正示復四者復由重也謂於一句更計有無即執有是有執有是無乃至雙非是有雙非是無具足之見其計轉巧故於句句皆生四計二雖單下結過三種四句雖轉巧細以執一爲實餘皆妄語見愛尤盛業苦無涯浩然如海二雖計下正破第四二初示所破邪計雙非是惑不入真中實是虛妄二故爲下明能破圓空二破二乘雙非二初泛明證相二初明證相二乘雙非雖非中實

而離斷常諦於真理未至寶渚已到化城寧不安隱梵行等者無學四智四中但闕我生已盡以滅度等當之乃足由保此故不求徧知二示四門阿毗曇此云無比法詮有門觀法拘鄰五人千二百羅漢皆此門入成實論詮空門觀法須菩提此門入毘勒此云篋

彼論詮於雙亦觀法故大論云若不得般若波羅蜜多入阿毗曇則墮有中若入空門則墮無中若入毘勒則墮有無中那陀等者釋論明佛垂滅阿難問車匿佛答云惡性車匿

漢七

六

吾涅槃後心漸調伏當爲說陀那迦旃延經即雙非門也四門觀法假人本無四門不異而其實法四相不同有門則念念生滅空門則三假浮虛雙亦門則有無從容雙非門則有無俱遣隨依一觀可以發真三藏四門其

意略爾二離斷下正示破中二初示所破假名中中道之名大略有二一離斷常稱爲中道有名無體屬前二教二者佛性稱爲中道此有實體屬後二教今論雙非斷常二見得中道名其實全非妙色妙心故無中體故情想不忘保徧取證此以沙礫謂瑠璃珠也二故爲下示能破畢竟空斯乃今品即邊之空若發此空假名中壞是爲空破非有非無三破別教雙非門三初示迷門起失二初舉意明失二初舉意別人望圓其根名鈍非四說四名爲權巧筏喻者四門意在入理薄筏意在度川若執門起諍如檐筏馳道故筏喻經云法尚應捨何況非法二不得下明失失於融攝是一非三二涅槃下示四門相亦色非色雙亦門也非色非非色雙非門也二若各

下明失故須破此之執諍非即邊空無由可破三新本下引證示失相經談初地被於地前悉有四門者經云初地菩薩欲行有相道即有門於無相法多用功力即空門一意欲入涅槃一意欲入生死即兩亦門微妙秘密之藏修行未足即雙非門大經下明今之得顯前之失前屬別門執諍邪見非是外道邪見也二非有下明中破空二明相修句二初明諸空修圓中凡邪空見二乘空證別教空門既隨二邊若聞圓中皆須即邊而觀中道二諸雙非修圓空若邪小及別教門雖曰雙非皆成取相皆須修於三諦俱空名畢竟空由諸雙非及諸空句非究竟道是九界法是故皆須修於圓教空中妙觀歸秘密藏三釋相即句雖諸經論說空說中名相多少中若

即邊空蕩三諦此則圓教一體異名是相即義不須相破及互修也二初明圓教空中不二初直示不二二般若結實相觀照文字三種般若即三而一故是一法即一而立名何極得此意者一切異名無不相即二而不下明今品略說名空文約義豐空無不盡以被義持根利之者故以略名而標品目二此品下明來意二初導成上品二初正示二初導二用若其不了即邊是空懺非無生破惡不盡讚非稱性生善不深善不深故豈成智德惡不盡故豈成斷德鈍根之者於前未悟故於今品圓談空慧導前懺歎今成二用二亦是下成三章懺歎是用如向說之導成宗者萬行之因以無所得方證三身非究竟空豈無所得是故圓空導於萬行成果德

宗導成體者深廣法性徧一切法二種我故
生死浩然今以二空導一切法顯成經體二
故釋下引證論明一切以體宗用攝無不盡
二又常下開悟鈍根圓空具德一切清淨故
談常宗及顯性體懺歎二用皆是究竟清淨
之法豈有一句暫離圓空如云一切衆生皆
是般若即此意也利根聞上已解空義今爲
鈍根未解之者特論生法境觀皆空俾成上
義二釋文二初分文二隨釋二初釋欲說空
二初釋八初釋餘經廣說二初總示相顯意
二若指下別明指前義二初約部次相違問
大經云從生酥出熟酥譬從方等出摩訶般
若故知般若在方等後此經既屬方等豈得
指般若爲已說耶二約後分至終答二初正
答通二初引教答通二初總立意以此經是

方等後分故信相聞佛入滅唯三月在所以
懷疑故指般若名爲已說二且舉下引三經
三初引阿含二初正引前佛而去者七日前
入滅也均頭沙彌是身子弟子二此下結示
二引方等即方等陀羅尼經先於靈山唯法
華授聲聞佛記二豈非下結示三引大品二
初正引二當知下結示二以此下詳定結年
二此經下示非妨二釋略而解說二初示教
門名義廣略二初示二門二應作下明四句
二初直示三句十八空等者空體唯一徧蕩
諸境隨境立名如火是一隨所燒物乃有異
名名下之義不得不異是故因亡內法乃名
內空因亡外法乃名外空亡十八境名十八
空二十空二十四空亦復如是故名義俱廣
立一空名唯詮泯蕩故名義俱略若法性等

立名衆多但詮本性之義耳二委示第四二
初標示二迄從下證釋祇立二空是名略也
此名召義偏乎十界從凡至佛皆有衆生及
五陰故問位至聲聞生法已空因何釋論至
佛猶有衆生及法豈獨不無又稱無上其義
何耶答小乘談空終歸灰斷故入無餘生法
永絕大乘談空其體常住又非獨一覺性常
住須知生法一切皆常故生法未空則凡鄙
微劣生法若空則高勝廣大是以極果生法
無上斯乃空之究竟也故荊谿云三千果成
咸稱常樂三千闕何生法依報耶二今言下
明今品名略義廣三釋衆生根鈍二初定廣
略利鈍二初約聞持立宜廣爲利宜略爲鈍
二此語下約義持翻身子初遇阿鞞說偈詮
三諦義謂苦集滅令速證故不言道諦身子

一聞即悟初果及其轉爲目連說之再聞方
悟一說是略再說是廣豈非義持略利廣鈍
耶二此經下示今機利鈍二初明經意自就
不能廣持詮空名數故曰鈍根二示今機若
論義持聞略能悟乃稱根利無見經云衆生
根鈍便謂今機不能悟於無量空義^{漢七}於智
慧亦約聞持智也此同起信論說尋於廣論
文多爲煩但樂少文而攝多義者故造此論
又末爲諸佛甚深廣大義我已隨順總持說
此品略說無量空義同彼總持說深廣義也
四釋無量空義二初約真中揀偏真斷滅不
具色心是有量空義中道具足妙色妙心出
生不竭融攝無遺是無量空義二就此經示
既談法性性則不改此乃常德實相者中實
之相此品云求於如來真實法身新本云法

身是常是實實是我德自在何窮既具常我
豈虧樂淨四德彌彰無量空義也五釋異妙
方便六釋起大悲心七釋今我演說八釋知
衆生意皆可見耳二正說空二初分文立意
二初分文二立意二初直示無境等者生法
之境皆妙三諦故曰二空境生法之觀皆妙
三觀故曰二空觀妙境發觀其觀方正妙觀
照境其境方顯具明境觀令正令顯二引證
十番檢境智者境謂十境智謂十乘言十境
者一陰入境二煩惱境三病患境四業相境
五魔事境六禪定境七諸見境八增上慢境
九二乘境十菩薩境陰乃現前九則待發若
現若發一一境界皆須修於十乘觀智言十
乘者一觀不思議境二依境發菩提心三巧
安止觀四破法徧五識通塞六調道品七對

漢七

十二

治助開八知次位九安忍十無法愛此十都
爲十種境絕於思議是故五品得觀行絕十
信乃得相似論絕四十一位分證論絕妙覺
乃能究論絕也下文即是散脂自說名密之
義乃名境智俱不思議新本言法即是境也
如者不異也皆重言者蓋以境智本來不異
以情異故今復不異故東陽大士云一是本
性如是滅結如智不異境故曰如如法境
不異智故曰如如智斯皆明於不思議意也
二明空下隨文釋義二初明空境二初分文
立意二初分文二立意五初直示二相言實
法者對下假想淨爲不淨乃是事觀今於五
陰及以假人皆直觀理故名實法身雖下出
假想義二亦名下示二異名行行者慧行之
上加修事行故名行行助道者以不淨想破

事中會資於正觀破障理惑故名助道三小
乘下明大小皆修二初明小三種解脫不言
無疑解脫以俱脫人達內外典籍得無疑名
今論正助故且明二二明大薩婆若大論翻
一切智遊戲神通以於三界得自在故名遊
戲以修得通多於九想背捨等起故以假想
爲助道也法華大車具度白牛名爲正道儼
從爲助涅槃正慧遠離十相即色聲香味觸
生住壞男相女相能離深故所離非輕又諦
下明助道也想白骨等觀等事禪即用三觀
溪七
於事禪境破三惑障顯出我性成王三昧正
助合修名爲達禪見禪法界也四衆經下明
經論有廣略五明今品二義即俱略也二實
法下隨釋二初明實法境二初分文二隨釋
二初明苦果境三初生空境二初釋是身虛

僞二初體妄計故虛二初計攬陰有身攬陰
成身者五陰和合假名爲身如攬五指故有
拳名凡夫不了執此假名而爲我等廣有十
六一我二衆生三壽者四命者五生者六養
者七衆數八人九作者十使作者十一起者
十二使起者十三受者十四使受者十五知
者十六見者今略云五我者於陰等法中若
即若離計我我所之實人者於陰中妄計我
人衆生者則於陰五衆妄計我生壽者則陰
等法中妄計我受一期報壽命者則於陰等
法中妄計我命根連持不斷以執此故計有
我身名身見得起二若體下體本虛叵得妄
執有生生實不生故生名虛僞既本不生故
見身寂滅叵猶不可也二又檢下檢原由了
僞二初正檢二初檢假名由一念妄想者謂

男託胎時見母爲所取境見父是所競境於母起貪於父起瞋父流謂是已有乘茲妄念故得託胎女人友是委如大經假名始者男女之名由此妄想而爲始也二此赤下檢實法由二初五陰赤白即遺體也三性者謂善

漢七

三

惡無記也二又精下六大五陰六大是所依實法原由若是二觀此下結示身是幻質名是假名既由妄想及從精血以驗所成身名虛僞二釋猶如空聚無明業力業即是行乃無明緣行也或初作業時或託胎時如向所明男女之識於父母起貪瞋以父母流謂是已有乘茲妄念故得託胎體即遺體謂赤白也

二從六下體法空境二初立意分文二初立意二分文二隨釋三初釋六入四初釋六入

三初釋二名二檢其下檢三事命煖識者大集云歌羅邏時即有三事出入息者名爲壽命不臭不爛名之爲煖即是業持火大故地水等色不臭爛也此中心意名之爲識即是剎那覺知心也三法和合從生至長無增無減七日一變者謂在胎也一七名雜穢狀如凝酥二七名疱狀如瘡疱三七日名凝結狀如就血四七名凝厚漸堅硬故五七名形位四支差別故六七名毛髮爪齒位七七名具根位五根圓滿故今云五疱即形位也三結成下明六數五根并前識是意根則六根具足二識依下釋村落三塵從下釋結賊所止由塵起結能害慧命故云結賊四眼見下釋不相知伺候也二從眼釋十二入四初約開辦數開色爲十者五根五塵也少分者法

漢七

十四

入攝二種法一者心法除心王但取相應諸心數也二者非心法即過去未來色法及心不相應諸行及三無爲法也今云少分即非心法中過未色也開心爲二者謂意入也及法入也然於法入亦祇少分謂於法入二種

中但攝心法耳今云二者且舉全數二塵入下明通別名三當一下釋各各自緣四他根下釋不行他緣三從心下釋十八界二初辨數釋名二隨文釋義三初明識徧諸根追緣過去預念未來馳騁猶奔走也如人下舉例也端坐一室而心思天下愛淩塵緣名曰坐馳自非妙空莫息馳想以愚下釋六賊所害也如大經者德王品云譬如有王以四毒蛇盛之一篋令人瞻養若令一蛇生瞋患我當準法戮之都市其人怖畏捨篋逃走王時復

遣五旃陀羅拔刀隨後一人藏刀詐爲親善其人不信投一聚落欲自隱匿既入聚中不見人物即便坐地聞空中聲云今夜當有六大賊來其人恐怖復捨而去路值一河其水漂急即取草木爲筏截流而去既達彼岸安

隱無患菩薩亦爾聞涅槃經觀身如篋四大如蛇五旃陀羅即是五陰詐親即貪愛空聚即六入六賊即外六塵河即煩惱筏即道品到於常樂涅槃彼岸二心常下明識常在根塵即對即覺者對塵便覺也引釋論證即覺

第七

十五

義既云心欲聞則知識在根經隨行平聲三心處下明識常去還乍出乍入者對塵故乍出不對即乍入出入間關者應法師云謂出入也亦設置之貌莊子云小智間間隔礙也啄一捨一者捨一網目復啄一網目隔礙難

出得論常在者以塵對即覺故三從身下結
二境二初標示二身空下牒釋二初釋初二
句結生空境長養即十六中養育見也妄計
我能養育於他又是計我爲父母養育二亦
無下釋後二句結法空境二初超釋無主二
初別檢心主必能制及得自在既爲他惱二
義不成知心非主二或時下互推主四微色
香味觸也大論云地有色香味觸重故自無
所作水少香故動作勝地火少香味故勢勝
於水風少色香味故動作勝火心無等者心
望四大以不藉微勝故爲主若論被惱復不
成主二追釋無諍因緣和合雖成諸法本無
思念有何諍訟皆由情計故四大如蛇六塵
如賊若觀本空則諸法寂爾有誰諍訟故以
無諍結法空境二從諸下明集因境二初分

文對辨二初分文二前三下對辨二初對假
想辨前三者即此集境自立三科謂集起相
等是慧行正觀之境後一即假想是行行助
道觀境此九行經文既相連又俱言四大似
難分別故以前三對於後一而論正助以區
別之又前一者即以集境三中初一對後假
想而論生滅以前一云從諸因緣和合而有
及云地水火風合集成立後一乃云水火風
種散滅壞時豈非四大生滅相耶而言生滅
皆從無明者彰此生滅不離迷妄也故前生
云妄想故起至後滅云散滅壞時此乃死支
合云憂悲苦惱斯是無明之果復是無明之
因故論云老死有果所謂無明無明有因乃
指老死是故生滅皆從無明二若直下對小
乘辨如上所論無明生滅何教不然若欲了

知須論小衍小明四大實從無明生實從無明滅衍明四大而有三教通教四大體本自空故本不生滅由無明故見有生滅如幻之生如幻之滅別教四大體是佛性由無明故四大生滅性無生滅相有生滅圓教四大體亦佛性而性本具九界四大故九四大若生若滅皆是法界是故性相俱不生滅乃不思議論生滅也故法華明世間相常其義既爾則衍三教皆得明於本不生而生本不滅而滅生滅不二而二今非通別的就圓論二從諸下隨文釋義三初明集起相二初通約生法釋三初揀苦從集苦是世間果集是世間因此之因果皆因緣生今之所辨雖然涉苦果其意乃明集之因緣二前三下分句對義三小乘下破小因緣二初叙小俱舍云極微

十七

十七

微金水兔羊牛隙塵等小乘有門謂極微始有十方分故不破鄰虛以此爲因緣也二今明下斥非細塵亦盡者鄰虛亦破二塵既破因緣不成二言因下別約生法釋二初假名因緣三初釋從諸因緣此中宜用起信論說無明爲因生三細境界爲緣生六麤方盡疏意言三細者業相轉相現相即根本不覺熏習具如生三種相故云無明內惑爲因也言六麤者謂智相相續相執取相計名字相起業相業繫苦相即枝末不覺於外境界起智相等生法二執名爲染愛於外觸處染著以二不覺熏二執心成起業相故云無明潤愛集業得起忽都不辨迷一法界爲無明內惑等者豈能顯今中道空慧耶二以業下釋和合而有以業起者即起業相也則有下即業

繫苦相也此云苦果即是攬陰成假名人也
三此一下釋無有堅實由無明愛者二不覺
爲因即能生心也一念託胎是不覺果名所
生心計此因果名爲本末既皆不覺豈是真
實故云都虛無堅實也二妄想下實法因緣
亦是妄想一念託胎與前不異但前成於假
人今則成於實法假實和合成一報身修二
空故破於二執故分二境機關主者如機關
木偶假人轉動主即弄機關人也故以業因
喻所弄木偶以陰果喻之色陰如木偶形質
故云機關具三陰如木偶動作去來識陰如
看人故云以自娛樂也二隨時下明集相吞
噬二初因果對釋四初釋增減殘害豎約十
時者大經云一歌羅邏時異二阿浮陀時異
三閉手時異四齔時異五初生時異六嬰孩

時異七童子時異八年少時異九壯盛時異
十老死時異又念念生滅雖在於心須知四
大亦隨增減又新諸根謂生時故諸根死時
又飲食資益血肉爲新目淚耳瞬等爲故二
譬如下釋四蛇同篋二初明四蛇二初約蛇
報明四相蛇有力敵羸絕等報可譬身有生
老病死增減四相二如此下約蛇因明四分
四分煩惱皆有毒害即是蛇因此因能感四
大四相二初別示四分感報二初明生四大
二瑞應下明致四相經出三相疏以等分例
致生相二總結集業致苦上釋四蛇雖言苦
報意明集因緣故總結云集業相噬令大增
損推功歸集是經正意二明同篋二初約身
爲篋螫知列切又音釋音郝謂行毒也經舉
四蛇以喻四大意彰四分有毒害義一分具

足二萬一千四分共具八萬四千無量劫來
法身慧命喪壞由此大經所明身持四大大
不起集蛇無毒義如鳥在籠者次文再舉疏
粗釋之故注云云二又用下約業爲籠宿業
尚存故四大未散重舉籠鳥以明業篋須知

漢七

十九

今疏舉業持大意顯集因故云心鳥鳥喻四
分外馳六塵常求生死非安法身若人念念
思破戒事乃求地獄永滅五分宿人業謝泥
犁長往三釋其性各異二初約一身釋性別
等者雖云四大和合成身大性既異那可合
成此顯成中當處即壞妄情不了於壞執成
保著生集四大對四方者顯內四大有四方
性四方升降驗大相違對時對維其意皆爾
良由內體與外時方其性本一故依正色心
感召義成是故今經特以四大明乎集業也

二或言下約六根釋以其六根俱是四大造
色故也四釋悉滅無餘比至必利切及也見
人死滅四大分散便謂息風煖氣已歸於上
骨肉血汗必歸於下及至推尋都無去處以
本不來故若有來去非今教境二苦果下結
由集業經舉四大升沈尤甚正明集境善惡
殊塗以其四大不獨是惡亦通漏善也三明
集善惡境三初釋心識學斯宗者要知境觀
若論觀者須明三識謂第九菴摩羅是不動
識當正因佛性可爲中觀第八阿剌耶是無
記無明識無明之性即了因佛性可爲空觀
第七阿陀那是分別識是惑性故當緣因佛
性可爲假觀此之三識既與三德無二無別
是祕密藏何法不收何處不徧修圓觀者必
能了知一心一塵無非三識即是所顯妙理

漢七

二十

金光明經文句記卷第四下

溪八

宋 四明沙門 知禮 述

二若正下明功能二初明破欲助正二初略
示二廣示三初引釋論明助正三解脫者謂
空無相無作從三證果名解脫門解脫涅槃
二名一體道品是開門法者小乘則以十六
行觀爲三脫門今品則以即空假中爲三脫
門欲此門開須以道品調試修之如以念處
四種修於即空假中正勤四種乃至八正調
試修之亦復如是小乘三脫七科調試其義
亦然俱以道品爲開門法九想者一脹想二
壞想三血塗漫四膿爛五青瘀六散七散八
骨九燒若約小乘有二種人一壞法人但求
斷苦即至燒想成慧解脫人二不壞法人來
住骨想不進燒想得溪八有流光等功德具足成

俱解脫人今明菩薩見禪實相名修達禪求
異於小大小雖異俱以不淨助開三解脫於
助開中不淨九想破欲先鋒故名初門二示
進修明力大初修不淨進入八背及大不淨
所言大者但觀自他正報名小不淨即九想
觀若兼觀依報名大不淨所謂舍如丘墓錢
如死蛇羹如屎汁飯如白蟲衣如臭皮山如
肉聚池如膿河園林如枯骨江海如汪穢名
大不淨亦名大背捨背謂背是淨潔五欲捨
謂捨是著心三引大經顯治欲禪得解觀對
治力强速發無漏二此不下明二空助正三
初據義總示二引經別示八色流光者謂地
水火風青黃赤白八種色也法界次第云見
地色如黃白淨潔之地見水色如深淵澄清
之水見火色如無烟清淨之火見風色如無

塵迥淨之風見青色如金精山見黃色如蒼
葡萄花見赤色如春朝霞見白色如珂貝雪三
此就下結成助正爲治欲故修於事禪而以
二空正觀了達不淨境是法界故於骨於光
不見假人及以實法此正助合而修之方是
大乘助開之法二明生法二空觀二初分文
立義二初分文二立義三初明諦緣本大二
初明通大四初約專小問今說圓空那得却
用聲聞四諦支佛因緣二約通大答佛說諦
緣通被大小二乘菩薩通四教故如世大道
羣小同遊不定屬小三重問即通意云何四
字也四涅槃下廣釋二初明四諦通我昔等
者佛與三乘昔在凡時不見四種四諦真理
故又流轉分段生死偈文未畢今具引之故
注云云凡夫有苦無諦者雖遭大苦不以爲

患以不審諦知是苦故聲聞有苦有苦諦此
當三藏不了無生故云有苦能審知故名有
苦諦菩薩等者通等三教俱達如幻俱能解
苦當處無苦而有真諦者章安疏云真是真
實故知即是次第不次第第二種真實也諸佛
等者佛果圓極究竟實也是知四教智雖淺
深皆依四諦所以下更引勝鬘兩種四諦釋
成前意二乘有量者藏通不知如來藏故所
觀四諦終成有量別圓菩薩了藏性故所觀
四諦皆無限量而兼有量者深必知淺故別
人次第觀量無量圓人一念觀四四諦二大
經下明因緣通四智皆觀十二因緣智淺深
故得菩提道四種高下彼經四智意彰四教
故知因緣不局在小二復有下明唯大二初
明獨菩薩法二初引經儒童者儒仁也謂仁

賢童子也習應者謂修習與空相應也四諦因緣各舉初後並略中間故俱云乃至諦緣既是法忍菩薩相應之法驗知理深二乘不及彼通衍三今取圓教諦緣相應成今空慧二當知下結示二明二乘見淺三初明聲聞若望因緣乃以七支總爲一苦仍以五支總爲一集又復苦集不分過未總是現在以根鈍故法相總略二明支佛開聲聞總成別相現在五者謂識名色六入觸受未來二者謂生老死別相苦也過去二者謂無明行現在三者謂愛取有別相集也又開三世不唯現在故云略果及略因由中可比三是則三世皆有十二以福資智故能別觀三雖復下斥淺三初正斥二乘所修三學不爲衆生不成佛法是故名爲自調自度大論云二乘戒名

自調定名自度慧名自淨緣覺雖有少分慈悲不能廣益故同名自二與菩薩下對形菩薩未分權實但是菩薩俱異二乘二今舉下明析體有殊二初約共三乘明析觀二約不共菩薩明體觀諸文所明實有滅空爲析幻有即空名體今明幻有即中爲體乃以實滅及以幻空俱名爲析以其未達諸法實體體義不成由謂諸法終歸無常祇是析義今明諸法一一常住既見法實名爲妙體初義分二初別釋二初約二乘明觀二初生空觀二初舉譬推二我人下就法檢各推無故合之亦無以聚虛空不成色故即陰下更於即離檢今得二雖求下法空觀二初明法存牒前譬顯人亡法存二更須下用觀析二初正明推法空正檢法空先析色陰次前念下析

四陰無想受略於行識二既不下雙結二空智雖空境智須自亡是故境智俱云不得二通菩薩下以菩薩例結前論析觀乃三藏法以對今品體觀屬圓故以通教鈍根菩薩不能體中亦屬析觀故云通菩薩亦然二是爲下總結言自行爲他異者以通教菩薩對兩二乘分別二行也二約不共菩薩明體觀三初總示異前言別菩薩者非是別教乃是圓人異偏小故稱爲別也故云永異二如見下深明觀相四初明妙空體法二初立喻顯然鏡像喻文乍濫通須知圓意通但六界而爲鏡像別圓十界而爲鏡像別雖十界九是修成修成不實故如鏡像圓知十界性德本具以本具故奪修無功故如鏡像不二門云幻因既滿鏡像果圓如此解之故云懸體體祇

溪

五

是解鏡內鏡外者解因緣所成即鏡內拳指不實亦解能成因緣即鏡外拳指不實二衆生下就法觀二初生法雙空二初明觀若假若實皆本不生空則俱空二如大下引證我是假人色是實法二性俱空人法不異是故名如二今世下因果俱寂二初明觀五果既是因緣所生可合鏡內拳指不實二因既是能生因緣可合鏡外拳指不實二下文下引證假實當體即空假中名本性空寂無始強執謂假實生名無明故有既了因寂果那不寂二雖不二下示妙三諦智即空假中而爲空觀以即空故不得六界生法以即假故不得二乘生法以即中故不得菩薩佛生法蕩十界惑是故境智俱名不得而能審諦十界生法故二境二智皆名了了通達境是妙俗

以無相故故無所染智是妙空以無緣故故無所淨非染非淨稱本離念故雙亡二邊正入中道任運雙照三結三諦圓顯三德三諦即念開明舉一即三體非次第顯無前後無覺而覺稱為大覺四與此下與經體相應佛示二空顯法性體不照三諦豈稱法性無量甚深故知今解與性相應此性名為金剛寶藏若偏照之德非具足三是為下約人結示故知今體非獨是體空須體三諦方得名為別體三諸小下斤諸師失意三初正斤失二初斤小乘師毗曇有門說存鄰虛成實空門說破鄰虛若存若破皆為析滅見愛二惑弘者失意各生定計起見起思故屬斷常同彼外人全非正析二斤大乘師般若等經談一切法如幻即空此空畢竟三諦宛然諸師罔

窮作但空解不即假故不能遊戲神通不即中故不能解釋佛之知見非佛知故不得三智一心非佛見故不能五眼具足雖依大教理齊小乘於小乘中同壞法人進修燒想壞滅骨人既其不修觀練熏修無由成就三明六通三明者天眼宿命漏盡也更加天耳他心身如意則成六通願智頂禪以超越禪最高上故故名為頂願欲知三世事隨願則知故名願智頂也二引經示首即經初軸即經末如來法身謂果上法身智斷必具令用二空當念求之無上涅槃體具三德皆與無量甚深法性無二無別故首軸所詮窮深極廣三豈可下結不用世人邪見即是癡空外道斷見也小乘之析雖是正教以無般若方便故墮斷常中大乘之體法雖圓備諸師但作

偏空之體同彼小乘慧解脫觀安能解此即
邊之空耶二善女下依義釋文二初明修因
二空觀二初約苦集明二空觀二初生空二
初分文二釋義三初對告勸發二初釋善女
二初約四悉釋四初世界二又時下爲人三
又男下對治四又佛下第一義二此是下結
成因緣二釋當觀二諸法下指上境二初釋
諸法名目雖略者祇云諸法則能攝上所說
諸境無不徧也二釋如是二初標列三義正
明總觀者下二空觀歷諦緣境別別明修空
假中觀此之三觀盡稱諦境今一如是總示
三觀如三觀如三諦是有三義者列於三
法即當三觀所如之義也二如事下指釋三
義二初指釋謂指經文中上下釋三法相假
想指上餘二指下上下皆是不思議境故皆

指爲所如之法二又事下融即初乃俗即真
中次乃中即真俗後乃真即俗中以妙三德
爲三諦故所以此三不一不異如是之言是
故得名爲正明總觀也以亦一異爲諸法既
以不一不異爲能觀觀乃以亦一亦異爲所
觀境境觀不二卷舒無妨三何處下正作觀
二初通釋四句三初約初二句明空觀二初
釋初句二初就五陰觀言點出者已用如是
總示三觀今以四句明示三觀故皆言點出
今檢無人義當理觀二又果下就因果觀二
人既下例次句二本性下約第三句明中觀
不以本性爲能觀者非中觀也即一切法非
理非事名爲本性非別有也故法華云諸法
從本來常自寂滅相般若讚云平等真法界
佛不度衆生以本無無明豈有衆生本無空

慧豈有於佛既無生佛何度之有非破非立
雙非亦忘名本空寂二無明下約第四句明
假觀二初由迷俱立二初正釋二初直約事
理釋諸法雖即本性空寂由具性染故起事
染由破事染故立空慧欲忘染淨故立即中
此之藥病悉由無明二以有下委就迷悟釋
生法是果成由惑業故云以有無明等也既
有下欲空生法須論三觀助事觀者助道事
想觀也即不淨流溢等是所助正道即二空
契理之觀正助二修爲顯一性故立非事非
理之觀也是事下以今知三驗其無明是事
不知三皆事者以在修故不二門云修雖具
九也二淨名下引證以衆生實病生菩薩權
病示病意者爲明法藥也二若知下由悟俱
忘若知無病用三藥爲此之泯忘空品意也

二但我下別釋初句二初明所破人執二初
總示我相五住之初三界之主若破我者縱
起結使不生四趣故云深重小乘大乘俱實
無我我不復斷四教賢聖入之無路故云大
鄚凡夫下明起我處初徧六作次徧六度二
若攬下別示利鈍二初鈍攬他遺體而起者
是俱生惑與身俱生名俱生惑如諸蠕動實
不推理而舉蠲張鬚怒目自大底小凡劣何
嘗執見行住坐卧常起我心常時自起故名
踈鈍二若執下利二初明密利執法塵起者
是分別惑以對意根故曰法塵因分別生迷
理之惑此名利使藏之初果通之見地別之
初住圓之初信皆斷此惑二明相狀二初略
論十使二初正明使相二初明十爲枝葉執
一法者不問邪正大小徧圓隨執一句即生

十使前五是利後五是鈍乃利中鈍也二十使下明我爲根本二縱令下兼示其人二初明具邪禪慧長爪即拘絺羅身子舅也勤學不暇剪爪時人呼爲長爪梵志根性最利是外道中高著者故舉之鏐腹者金七十論云優樓僧伽外道中有一衆首至金地國頭戴火盆鐵鏐其腹與僧論義難石等者大論二十六云薩遮尼乾子難人乃至樹木瓦石流汗至非想者如鬱頭藍弗已至有頂故云將出却墮飛狸故云復還二如此下明不能破我尚非小乘內凡豈同初果破我二重廣我見謂即色是我離色有我我大色小色在我中色大我小我在色中受想行識亦復如是五陰各四即有二十二若一下明能破空慧二初通明空慧二初就境智明生空二初別

示二初於陰境推還就即陰離陰陰中有我我中有陰四句推之是義不然者能破之觀也據義合須二十徧言以破二十種身見也約外境者望能觀智是其內心故所觀陰得名外境非他身也二而其下明觀智檢所觀五陰既立於五能觀之智任運成五五陰一皆有四智悉應計我故須亦破二十身見二內外下總結以數顯觀令智不漏二毗曇下約大小觀人法三初毗曇我見是共等因者即共業別業合有四句略言共等此有門論陰中求我我空陰有我法兩分故我見思惟前後而起我即衆生思是實法故悟生空未得法空二成實此空門論攬陰成我故我見思惟起不異時是故生法二空同悟三大乘我見即具諸法者俗即真中何法不具我

性如色性生空即法空二破二下別明三觀
既云我見即具諸法合於三諦而破我見是
故用上三句破之二初正破人我三初約理
觀檢二若作下約非事非理檢我見即中豈
存境智四十種執三若作下約事觀檢經文
既云無明故有愛取心強須作不淨助道之
觀觀邪見惡心是穢惡陰若善直心慙於義
天愧於聖人入方便位真理未明是隱沒陰
善惡雖異皆未破見豈有見心不依於色色
須敗壞故云不淨不淨之境何處有人今方
便位義當五品也二若得下更推法我二初
明得悟推法破思觀雖圓修而其麤惑有除
不除若以三觀檢我叵得見惑斷者得入初
信更於三諦修二十觀者乃破法執即思惑
也從二信位進至六信也二若未下明未悟

溪八

十二

推法破見二初轉計實法二初正明度入妙
觀破見見惑未除見雖未除觀已有力能於
假名柔伏愛惑若其我執度入實法二引經
及事屈步蟲者要因前脚得移後足方於假
名伏惑又於實法起見如彼蟲也二須實下
勸更修觀宜於五陰作二十觀顯我本性使
空慧明隨度入處以觀逐之名處處作二明
法空二初約經文釋成三觀二初正釋二初
立意分文我見即具一切諸法豈觀生空不
空實法鈍根未了故今重說二如是下隨文
釋義三初明即法而空二初示境觀二若四
下明修觀二初就法明空二初正明空逐一
推檢不應動等者地動則成風性煖則成火
性史記曰陽伏而不能出陰迫而不能蒸於
是有地震注云蒸升也冬則地中煖故禮云

古者夏則槽巢冬則營窟水堅故成地性波動故成風性貞堅也炭火貞則成地性火焰動則成風性風能持物則成地性觸壁止則成水性二引經證水性不住者不守於濕火從緣生者既賴緣而生則不能守其熱性風性無礙者以無礙故不能守其動一一下四大俱無性故皆入如實之際前之二教以空爲如實後之二教以中爲如實今取圓中實際爲正二上檢下對生辨觀二本自下明即法而中二初二句法本自中二初明性非生滅以元中未三節顯於性是中道元無四大者非謂獨一金無四大以其大陰皆如來藏性體常住本無生相故曰元無既無法生與誰相會而爲和合無和合故無可散滅故不論空如此談中之義顯矣二本自下明非觀

使爾世間之相本來常住豈以觀智息平生滅然後不生滅耶此名即事而理亦曰即邊而中也二三句顯由觀解二初正示性雖本然遣迷由觀言因緣性欲爲因師教爲緣因緣成觀達本三諦諸大即是空假中故從本不生二引證無明轉即變爲明名菩提燈若非感應因緣之力豈滅無明故知成佛全假因緣三和合下明即法而假二初成達理之事二此法下成照性之修此法有故者即迷惑因果也體有下三諦也即空下三觀也境觀悉由迷惑因果和合而有也二三觀下結觀三段經文與三觀合知今宗旨契會佛心豈可不信二更爲下爲鈍根重破法執前釋生空已明度入實法或利根雖曉恐鈍者猶迷是故大師以無緣慈更說其相二初明法

執二初依報起見愛心四初依大陰起四執一切外道四教行人若未伏斷見惑已來皆有此執二四執下因四執生我見四中雖云無及雙非既是執生四皆屬有見既依色合當即離色我我色見依四陰即離亦然三我生下依我見生十使如生空中說四方招下因十使招生死縱依圓教性具大陰關於四門隨執一門生我見者起惑造業招致來苦與彼外人生死不別大師正爲即時行人陳四執過二惑此下指見心名汙穢陰此之五陰皆成執見故悉汙穢禪繫歸有豈名法空二心不下明空觀三初明不依是忘四執心不依陰四教皆然今明圓宗論不依者即穢汙陰爲能觀智何陰可依何執可破誰爲能觀亦無所顯心不依陰今意略言二寂然下

明契理則備衆德三種般若與金光明牟尼三身無二無別若不以此爲三觀者見之無由三行人下明此觀速能復本觀生觀法皆以三觀一念而觀猶如懷璧復金光明法性之理如向本國二三世中可登圓住可以保任二明十二因緣生法二空觀二初分文立意二初分文此十二支而分生法者順此經文初支既名曰無明名即假名故屬生境無明者我執也起信論云計名字相也向下諸文但言行識等既不云名乃是直指色心也以行至老死不出五陰色心故義雖炳然猶恐不信故引釋論逐段證成誰老死者如問云誰則答言我故知誰我悉假名也經云名曰與論冥符論號生空經豈不爾是老死者則直指色心是老死法經不云名與論亦合

二然十下立意二初通辨因緣相貌二初標列二三世下解釋三初三世過去破神常者過去已滅故非常也現在破神我者五果皆五陰和合故無我也未來破神斷者未來有果故非斷滅皆言神者外執身神有斷常等也此三世義世共傳之故云常塗所用二果報以前十因緣屬現在後二因緣屬未來二世合爲十二而文云一期始終且據無明行在一期之始相帶而言遂云始終非謂祇在一世此果報因緣出大集經以在中陰於父母所生貪愛心爲無明出入息風爲行自識支已去義同三世三一念二初所憑教二如眼下明行相二初正釋相二初對塵直釋六處生貪者眼識染故潛牽諸識各有貪情故普賢觀云以貪香故分別諸識處處染著一

日等者一根對塵即起十二六根晝夜數數對塵何念不起十二因緣一一成因皆須感果迴轉如輪纏縛如網二今更下更推因起因緣之觀通三世者意推過去無明爲因生於現果現果之上復起惑因本欲即今無明不起是故今推過現二處起無明相文二初逆推過因從名色起者五果之初故五陰已具故識支未具五陰故不言也過去之因極於無明今觀無明意欲令觀成覺了智而謂無明定是有等則能破智翻爲無明藥乃成病故云四句取者皆是無明無明爲緣豈不生行生識等耶如前說者六入至老死皆如前文直示中明二又觀下順推現果於此受中等者以受支是五果之終故觀至此若生計著還成一念十二因緣或有受等者即是

無明不了之心行識等支一念成就二如此下歎難知逆順推檢雖在一念其十二支宛然具足所以枝條徧滿諸有其猶大樹尚無能識況能伐耶言大樹者婆沙云過去二支爲根現在五支爲質現在三支爲花未來二支爲果布濩者文選注云布濩長多貌從言從水並通漢書云布濩猶布露謂於闕露處皆布也二今經下略示今經觀境二初明經意但舉生法爲境者以假名無明爲生空境以行識色心等爲法空境此因緣二境通四教觀今意在圓二宜以下示境觀二初示境二初立喻二法合著於假名者不達三諦而妄起我見猶如舞燼成輪故云不息輪依火有而假名因實法而有也迷故不達色心即空假中名迷陰入言薪火者即燼也二若知

下示觀二初立喻二輪火下法合觀生觀法皆即空假中乃輪火雙無二空觀也二生空下依義釋文二初出境相二初生空境二初分文二釋義四以前生空三觀釋之故疏無文二行識下法空境例應有三者行即空假中乃至老死即空假中佛言巧略比前可知故二衆苦下出觀相二初據經文示觀二初正示二初指文二衆苦下釋義三初明中觀衆苦行業指上生法當體妙故不可思議若生若法皆非空有如是體達名爲中觀此觀不見生死輪轉有際有息即法界故無際皆常住故不息二本無下明空觀三不善下明假觀前不善思惟即過去二支今不善思惟即現在三支經心行者即上思惟也斯乃舉病必對於藥假觀彰矣二雖名下結勸名徧

義圓名但云空而義乃是即空假中義既必當故明與經任運符契生空法空名義皆爾故勸修者息乎疑情仍須了知全秘密藏爲生爲法是故生法無非三德故觀生法能所皆三境觀名別其體不殊是故能所二即非二此乃今經二空觀也二爲鈍人更說二初特示空觀二別指假中良以初心於假名實法起見愛增強障道事重是故大師特陳空觀不說假中此同釋題觀解三道三道正觀舉名而已但於假實三毒六作委破四性頻示二空蓋爲始行我見彌隆故示真空以爲要術初文二初示二初推人法二初推人若假名下對於實法推無四性今之下四性被推執情稍薄但謂有名還須四性檢今叵得所召之人既無生相能召名字四性亦忘略

俱八

十七

示人空其觀如是二觀法二初橫推以現名色對過去業推無四性羅漢有業者無始所造諸有業因其數何限無惑潤故不受後身故曰不生各有等者如合兩空豈成一色二既不下豎推計法之執如屈步蟲捨一取一生被破故便計無生還是性執雙亦雙非計皆依生既悉無理復計於滅亦成四執八句之上皆云不得即是空觀無滅無生者檢滅檢生俱不可得方乃得名實法無生二無生故下明觀成二初明二執忘攬陰成人實無生故假名則壞於假無我諸見俱亡實既無因安得不壞二既不下舉二喻示不然火喻不執法無煙喻實法不生日中舞喻燼空心秉法是亦無輪喻不生我見二是略下結二中觀下別指中假言別記云云者具如止觀

假中破法行者應知今明三觀圓修二空但爲鈍根見惑偏重故別指空對治此惑此惑若忘二諦自顯故中假別指而已二我斷下明果上二空用二初分文二一切下釋義二初明自行成二初明智德滿二初明人法二觀成二初約人法銷文二初明人空觀成二以智下明法空觀成別明十纏者瞋覆睡眠戲掉無慙無愧慳嫉忿恚曰瞋隱藏自罪曰覆意識昏熟曰睡五情暗冥曰眠嬉遊曰戲三業躁動曰掉屏處起過不自羞曰無慚露處爲非不羞他曰無愧財法不能惠施曰慳他榮心熱惱曰嫉煩惱即思惑也雖見思通名煩惱今別以思惑當之罣繫也二二乘下約大小釋斷二初論大小斷盡不盡二初明二乘斷通餘別界內一切煩惱名數皆通界

外但以所鄣空中分之則知通別淨名室中天女散華聲聞著身菩薩不著故被訶云結習未盡華則著身斯乃斷通未能斷別也二而言下明佛地通別都忘二初正示雖云菩薩能斷別見而斷未盡究竟在佛若至佛地不唯別盡通亦窮邊何者蓋由見思徧十方界六道衆生差別種習之所成就因地乃斷未盡邊涯唯佛究竟故云若通若別究竟在佛二引證性德生法體本無上通別二執捺故成卑妙覺執盡二俱無上故云無上假實佛地所不惑也二經論下明佛地有斷不斷二初明經論異說二初明有斷智以悟極而爲上上惑以迷極而爲上上今迷將盡唯餘微細故名下下故起信論云覺心初起心無初相遠離微細念故心即常住惑微細故難

別難除故上上智方能斷盡下下之惑無明力大者惑雖微細能障妙覺故華嚴明灌頂菩薩所有功德如一塊土妙覺功德如四天下土最後無明所障若斯力豈不大非佛智發此惑不忘一念相應慧者究竟覺也正習

漢八

十九

俱盡者該於通別也二或言下明無斷有上士者等覺也此位須修清淨淨禪斷微細念故名之爲斷無上士者是妙覺位修證既忘更何所斷二斯乃下用悉檀和會此斷不斷各見教文人師執之諍計莫止今以四悉逗機之意而和會之諍無由起國是境域即當世界機所居處隨處樂聞佛智有斷不斷而歡喜者時即對治隨時當有斷不斷義而破惡者人即爲人隨人宜以斷不斷而生善者悟即第一義隨悟斷不斷而入理者爲此四

機說有二義究論佛智不可言思二證無下明正助二道滿無上生法證由二空名無上道事助之行與正合修故得稱爲微妙功德二開甘下明斷德滿二初略釋甘露以命等四如次對於常樂我淨二然此下廣釋諸句四初對華嚴四位二初正對彼雖兼別今取其圓別三十位未得甘露故二下地下釋疑恐後人疑故釋也化他令同我之所得二又通下對般若四智論雖多釋猶通三教今四皆從甘露而說故的在圓以一心三智蕩一切相名道慧開門一心三智立一切法名道種慧示器一心三智雙遮蕩立名一切智入城一心三智雙照蕩立名一切種智處室由此四智住大涅槃令諸衆生得此四智名食味也三對法華大事彼佛知見是今甘露彼

漢八

二十

之開等對今四句唯有悟入與入處少殊其義不別四對涅槃四德前以四德釋甘露義今用四德對開等文有此異也二吹大下明化他成二初分文立意二初分文二餘經下立意二初明智定相成前現通者令重法樂聞後現通者令依法修證故前云開後後云成前二修因下明因果同類二空正道爲智德類二空助道爲斷德類即緣了二因非此二因安尅二果二說法下依義釋文二初明轉法輪化他二初明說法二初總示二吹螺下別釋二初別明螺等二初約教位釋二初釋四句四初明吹螺是故號者大經云吹貝知時是也苦忍凡性者即內凡上忍位中於苦諦下留一行一緣是凡性也聖人正性謂初果也說大乘法者唯以圓教爲大乘也改

凡聖偏性通教六地是聖別教十向圓教十信是內凡以中理未顯悉名偏性通教七地者至此得知圓者皆是改號之位者三人俱破無明見中道圓性也二擊大下明擊鼓誠進者軍陣之法也兵權曰聞鼓則進聞金則止鼓則嚴肅軍衆使前驅也督率也率導引也位在修道者令初果進二果也通教位在八地者前釋改號是七地破無明今進入八地是增道損生別教應言二地圓教應言二住方名進入修道今言十行初住者恐誤也或別有意真修道者即通八地別二地圓二住故云咸進地論以初地爲見道二地至七地名修道八九十地爲無學道彼雖別位例圓可知三釋然炬通教下皆取當教化他位也此言八地不取受接但約當教出假道觀

雙流耳別約十向其意亦爾以內修中觀外亦出假故圓在初住者以百界作佛普門示現故圓從勝說乃取分真止觀名真出假位也皆是下結示三位道謂外化觀謂內行此該三教不同餘文唯就通說四釋兩雨扶踈盛茂也時澤時雨也大恒者苑伽河也二若得下例上四經二此一下以橫豎結豎擬諸經之位者即向四經名字雖殊但是住行向地圓位耳故名爲豎橫論一切諸位者即攝四教凡聖諸位如向消文是也云云者部在方等故此化他必兼四益橫攝諸位旨在其

中二此中下通釋大義前三云大後一云勝勝亦大也故云皆言大也通塗下若取通名唯在大法義並歸圓對於四經其義彌順二我今下明神通二初明摧怨二初明煩惱爲怨二魔爲下明天魔是主二明豎幢高出衆行者即法幢三昧也萬行功德皆爲眷屬莫不歸宗此之三昧故爲衆行之望兵望麾者手指曰麾尚書云左仗黃鉞右秉白旄而麾之兵權曰將軍乃秉旄麾衆而誓之又云聞鼓則進聞金乃止隨其指麾五陣乃理三德下出三昧體其體若非不縱不橫豈出衆行豈摧五住豈壞天魔無記神通體用如是二從度下明四弘誓化他二初牒文示義雖復等者既依四諦而運四弘四諦旣常誓豈休息因人求佛意在利生今遂所求豈忘與拔四弘是下示誓有依誓即無緣慈悲境乃無作四諦無緣無作行相如何衆生誓度生死即涅槃故煩惱誓斷煩惱即菩提故法門誓學即惑成智故佛道誓成即生成滅故不爾

豈能廣度未度二度諸下隨義釋文四初令
度苦諦經未斷三惡即三惡道也須約十番
論度論斷二令斷集諦須明五住燒十界生
三令證滅諦當分而論四種甘露跨節而辨
唯一圓常四令安道諦四初約檀明諦不獨
行檀具於四諦五度皆然五不依諦則不動
不出何度之有復須知今依無作諦二無量
下略釋經文三論云下檀攝六度大論十二
解檀度云若菩薩行檀度能生六度是時名
檀度滿云何布施生檀度有下中上若以飲
食麤物輒心布施名下能以衣服寶物布施
名中檀能以頭目血肉國財妻子布施名上
云何施生尸度菩薩思惟衆生不知布施後
世貧窮故行惡若行布施後世有福無所乏
短則能持戒云何生忍度菩薩施時受者惡

漢八

三

罵若大求索若不時索或不應索而索是時
菩薩思惟我今布施欲求佛道亦無有人使
我布施我自爲故云何生瞋如是思惟已而
行忍辱云何生進度菩薩布施時常行精進
欲行二施勤求財法以求足之云何生禪度
菩薩施時能除慳貪而行一心漸除五蓋是
名禪度又心依布施入於初禪乃至滅定云
何生智度菩薩施時知有果報而不疑惑能
破邪見無明又分別淨不淨施得報不同是
名生智故云檀義攝六也餘之五度亦互相
攝非今文意故且論檀六之首故攝生便故
四捨身下以彼岸結生死爲前際涅槃爲後
際身命及財此三屬事以觀此三及能施心
所施之境三輪當處即空假中是故能等三
德涅槃此以常因而尅常果不然豈得不壞

常住如是行檀名波羅蜜三德甚深故檀豎
高三德無量故檀橫廣此機樂略是以如來
妙說一檀遵修諸行仍須了知既談果後行
檀利物行人豈不即聞而修耶

金光明經文句記卷第四下

音釋

脹知亮切 瘀依據切 蔭蔭之廉切 蔓莫班切 蠕莫班切
乳亮切 蝨亮切 蝨亮切 蝨亮切 蝨亮切 蝨亮切 蝨亮切 蝨亮切
音音增 櫛櫛足切 櫛櫛足切 櫛櫛足切 櫛櫛足切 櫛櫛足切 櫛櫛足切 櫛櫛足切 櫛櫛足切
葉葉類 櫛櫛足切 櫛櫛足切 櫛櫛足切 櫛櫛足切 櫛櫛足切 櫛櫛足切 櫛櫛足切
餘餘古法切 胃胃古法切 塵塵吁為切 鉞鉞三月切 旄旄莫喪切 旄旄莫喪切 旄旄莫喪切 旄旄莫喪切
也也 胃胃古法切 塵塵吁為切 鉞鉞三月切 旄旄莫喪切 旄旄莫喪切 旄旄莫喪切 旄旄莫喪切

金光明經文句記卷第五

溪九

宋四明沙門 知禮 述

大章流通二初釋四天王品題二初因緣釋
二初約處釋人二初明處二十八天皆上升
之趣此當其首天分三界於下界中此復在
初居半須彌者處之所依欲界六天二天依
山忉利居頂四王在半梵語須彌此云妙高
出水八萬四千由旬四寶所成二東黃下出
人持國者護持國土故乾闥婆此云尋香行
天帝俗樂神也富單那此云臭餓鬼中勝者
或云主熱病鬼也增長者今自他善根增長
故鳩槃荼此云甕形頗似冬瓜是厭魅鬼也
薜荔多此云祖父鬼餓鬼中最劣者雜語者
能作種種語故毗舍闍此云噉精氣鬼噉人
及五穀精氣故亦云顛狂鬼也毗沙門此云

多聞福德之名聞四方故夜叉此云輕健飛
空健疾故羅刹此云可畏亦名暴惡二此四
下明品來意二觀行釋三種觀法此當託事
以其境智一一皆借事義而立也須知託事
多兼法相如王舍城而觀五陰者闍崛山而
表三德此之五三何殊四諦然此正是託感
應事明境觀也分二初示觀相四諦四智乃
至諦下各論見思何教不說今釋教義既專
約圓故所明觀不關三教四天須表無作諦
理四王乃表無緣妙智照事即理名護諦境
了縛爲脫名護心數爲他說此名爲護世通
別見思同體爲障名爲鬼神法花指此等者
不無少異彼以鬼神但譬五利乃將蟲鳥而
譬五鈍今則利鈍俱類鬼神但取分同也二
若不下明利益而且先明不觀有損侵害心

溪九

二

王妙智不發也毀損境界諦理不彰也心王
至迸散示迷三德而爲三障雖論三障迷由
煩惱故云俱爲鬼神所惱能觀下正示觀之
有益無明即明爲能觀智此觀觀苦生死即
涅槃也此觀觀集煩惱即菩提也控御等者
不動諸見而修道品不斷癡愛起諸明脫如
斯控御豈獨不被侵害而能顯理備德顯理
故諦境國安備德故心數民寧以轉八萬塵
勞成八萬定慧也自行了達既其若此令他
修證豈不然乎託護世天王之事修觀獲益
其相略爾二釋十三品經文二初立意分章
二初立意季亦末也翳障也二凡爲下分章
三初開流通七章方軌者方法軌範也二天
王下出天神五段以地味膏腴請處說處者
膏腴土田良沃也史記曰東割膏腴之地是

也腴下多味字襍除也又天王下且從增勝
備論一一皆有五能三四天下示此品六番
二正釋經文七初段分五初又分六初述護
國之能二初分文二叙敬下釋義二初四王
白佛二初經家叙先標北方天王者西土以
北方爲上也偏袒者西方之禮弟子詣師必
須偏袒表有執役二正白佛二初分文立義
二法性下用義釋文二初歎經三初歎體佛
所護理無量甚深橫攝法周豎收法盡理若
不爾豈名經王問文詮此理故言經王是則
經文但是能詮王惟在理釋題那云文號經
王教攝衆典指文指理二處不同如何和會
答若前三教文理不合此則爲妨今乃從圓
法皆不二文外無理理外無文釋題舉文若
其孤立豈得稱王今疏指理不攝文者翻屬

前教信文理合是經是王其義秘妙不可情
求今經王歎體與序品不別二約體下歎經
宗約體修行者體是本覺起成始覺方得名
爲約體修行體具佛界因果二嚴全體成修
二嚴無作名非莊嚴而爲莊嚴今以極果二
嚴爲宗世天下經云諸天包此三也然應有
四恐文脫誤或可天王本是生天故疏不出
此四天名義出大經德王品云一者世間天
如諸國王二者生天從四天王乃至非非想
三者淨天謂四果支佛四者義天謂十住菩
薩以見一切法是空義故大論明三種天一
假名天即世天也二生天三清淨天則兼三
乘也三又下下歎經用上至菩薩者經無菩
薩之言既云能滅一切衆生苦惱則通指九
界方名一切經文有四初天趣能與衆生快

樂者天趣衆生也次是經下三惡趣諸河三
趣沈沒猶如大河焦乾枯竭者滅三惡苦也
有經於枯竭上加能令二字者妄也三能除
怖畏去是人趣初言一切怖畏是總次別明
破三障惡三灾是報障怨賊即刀兵也并饑
饉疫病名三灾惡星是業障業來責報故惡
星現也憂惱是煩惱障四舉要下總指九界
衆生也二從世下述能護二初分文二護國
下釋義二初內以法護國四初護國之由二
以法護國即是述其護國所以無法安能護
持國土而其所以有內有外外即世法內即
心法若但行說世間之法則今此經非方等
教天王全是凡夫心口須知文文皆有世間
出世間意但以此句顯內義便故云正與觀
心相應如下散脂鬼神品中諸文且順世法

詮辨及至自述得名之由則全廢事解故云
現見不思議智境不思議智光乃至云我能
安住一切法如性於一切法舍受一切法境
智若是故名爲密方能外現鬼神大將豈非
有理密故乃有事密今文經雖不顯大師得
意乃以行說諦智之法而爲護世安民所以
心數不行等者心心數法全體即是方便般
若心王邪故數行邪境今王既正導令不行
不行而行行深般若到於彼岸三天黨護國
意同向說黨謂徒黨即八部也黨輩也帥黨
者帥音率導引也如轉輪王下是事釋以輪
王降四方喻天王遮惡鬼七寶謂輪象馬女
珠臣兵也四天眼護國以報得天眼者非修
得也受天身則眼必徹障幽暗也燭照也萌
種子初剖也杜塞也謂以天眼徹照防將萌

澤九

五

之禍根塞漸起之惡源也二從若下外以策
護國二初標科叙意二初標科二一若下叙
意三初勸說聽因緣和合二初勸法師爲外
緣日出朝陽者爾雅云山東曰朝陽山西曰
夕陽霽扶文切不祥氣也呂氏春秋曰冬行
夏令則氣霧冥冥春秋元命包曰霧陰陽之
氣也陰陽怒而爲風亂而爲霧今以日出喻
弘經霽霧歇喻三灾息也二次王下勸王者
修內因秉法者秉持也一人謂王也慶善也
王有善則萬方之民恃賴之即尚書曰一人
有慶兆民賴之也故王受是典而致國安經
饑饉者爾雅云五穀不熟曰饑菜蔬不熟曰
饉國邑郡縣者王制曰凡四海之內九州方
千里州建百里之國三十七十里之國六十
五十里之國百有二十凡二百一十國凡九

州千七百七十三國春秋左氏傳曰凡邑有
宗廟先君之主曰都無曰邑又曰上大夫受
縣下大夫受郡二勸供給四眾因緣經優婆
塞此云近事男優婆夷此云近事女以成就
戒者堪何親近承事出家二眾故也流衍者
衍達也三勸能讚所讚因緣先王之德行者
先王道德之行若行之於身即可以儀軌風
俗法言者是出自典誥聖人禮法之言若宣
之於口即可以教人民君既無此故邦民不
從其令鄰國不誅其德今勸下即勸王重道
尊師修功補過也身意恭重謙以自牧即道
德之行也讚歎在口即典誥之法言也夫高
下明謙卑之意王高而民下爲國者以人爲
本基故當勞謙以聚之辯以訥爲師者訥者
內照清淨故外絕矜飾即大辯若訥也故能

爲俗中小辯之師尋常治身理國尚當如此
況今請出世之法祈人民之福豈宜倨慢乎
儒禮以父事三老兄事五更屈王之尊敬卑
爲師儒釋一揆矣羽檄者文心雕龍云檄者
噉也宣露於外噉然明白也或稱露布蓋露
板不封布諸視聽也顏師古注漢書高紀曰
檄以木簡爲書長尺二寸用徵召也其有急
事則加鳥羽插之示速疾也今云羽檄稱歎
者即告之以文辭述具休明也爾雅云顯顯
昂昂君之德靡偃也論語曰君子之德風小
人之德草草上之風必偃草萊者萊藜草也
或作葉或作菜字之誤也二用意銷文三當
以上意對經釋之故云可見二如來述成二
初分文一四王下釋義二初合述歎經四王
所讚經體宗用既合佛證三德妙理故佛述

成諸佛從是法生者體宗用三既是法性豈有一佛不從此生二從於下述能護國二初分文二法護下釋義二初述以法護國四初述護國由發心畢竟者昔種善根是發心今日聞經得益是畢竟二心比較昔種誠難故

漢九

七

佛述成歎其宿種然此發心等語即大經迦葉說偈讚佛故佛初心但用彼語以成今意護世下云云者此與觀心相應義如前述也三從汝下超述天眼護國四從汝下追述天黨護國二從汝下述以智眼護國前云策今云智眼互見其文策即智謀智能鑒照名之爲眼言和合者即前云內因外緣因緣和合然後穰惡云云者前白佛則三段別明今則一番總述以包前別也第二番白佛述護國之事二初分文二一是下釋義二初白佛二

初王奉人法天除怨惠經天律治世者師古治民則天行化罰必當罪賞必當功名天律也二鄰國興兵天今懷退斥逐也經四兵象馬車步也規往討罰者規求也或作親字之誤也討誅也傳例曰有鐘鼓曰伐或作罰者非罰折辱也出金贖罪也軍者萬二千五百人曰軍天子六軍諸侯三軍二佛述成二初標科二從爾下隨釋二初述成物意無鬪訟名僧者無鬪訟即和合也二述成後意二初正以等慈述其懷退豫安也二又勸下兼勸諸國各守本業貪企者企望也佛告帝釋者大經文也經楚撻者楚一名荆可以爲杖撻擊也廣雅沃濕也美也亦柔也壤土也時不越序者四時和也心無貪吝者無貪故不多求無吝故能惠施后妃嫔女者天子一后三

漢九

八

夫人九嬪妃二十七世婦八十一御女風俗通云嫫女者采擇其容色之女也第三番白佛示其軌模二初分文二釋義二初白佛二初出願欲六文如疏列二示軌模六一一如疏對上六願栢梁者漢時殿名天火曰灾漢方法以海中鰲魚尾安殿脊以禳之灾遂息世昧其由謂之鰲吻八紘八方也休美也自勵者勵勉也四海者博物志云天地四方皆海水相通地在其中蓋無幾也七戎六蠻九夷八狄形類不同總而言之謂之四海皆言近於海也次佛下述成二初分文立意二佛告下用意釋文二初別述二初述成六方法六初述成安身方法羽儀者漢書高紀曰紀信乘王車黃屋左纛注云以黃繒爲蓋裏纛毛羽幢也在乘輿車衛左方上注之蔡邕曰

鼉牛尾爲之如斗或在駢頭或在衛以纛是毛羽幢爲天子儀仗故曰羽儀經躬出者躬親也二從復下述成安國方法爾許生死之難者劫數如值佛之數也三述成安妻子方法四述成安王領方法五從常下述成官殿方法六從在下述成上攝福方法二從汝下述成六願欲六段如疏經棘兵器也與戟字同刺殺也二從汝下總述第四白佛要其法利二初分文由第三段末者由前世尊述成云亦當迴此所得最勝功德之分施與汝等及餘眷屬四王因茲遂要法利二釋義二初白佛二初人王運心二人王下天宮相現二初事釋人王至金光者心存即三智金光明也至典即三諦金光明也智諦合即起事用金光明也以色心不二故香隨智徧迴施下

天王意云若以法利迴施我等我等皆得故以光照天宮爲表龍猶屬畜對天并鬼成三法界言法界者今從解脫所燒之香非法界者何能周徧三趣之體非法界者豈能承受二觀釋上之所說雖談諦智猶是約教示經力用未論觀行今之所論的就研心令觀詣理故荆谿云本雖久遠圓頓雖實第一義雖理望觀屬事此乃託事觀心借義成行三智妙解如火能然三諦融心如香離臭起三學行如煙氤氲真本覺照故曰金光行冥真故無礙而照但期觀行契金光明功用自然相周沙界唯務相現內觀不修心緣五塵魔必得便慎之慎之次佛述二初標科二隨釋二初述成香光普徧經摩醯首羅此云大自在金剛密跡者正法念經云昔有國王夫人生

千子欲試當來成佛次第故俱留孫探得第一籌釋迦當第四籌乃至樓至當千籌第二夫人生二子一願爲梵王請千兄轉法輪次願爲密跡金剛神護千兄教法世傳樓至化身非也乃法意王子耳據經唯一人今狀於伽藍之門而爲二像者夫應變無方多亦無咎摩尼跋陀此云威伏行阿耨達此云無熱惱娑竭此云鹹海經百億非非想天者夫百億即大千界也但同一四禪及四無色三禪統中千界以大千言之則有一千三禪也二禪統小千界則有百萬二禪唯四洲至初禪則有百億今非想亦言百億以下望上言之耳又恐翻譯之訛也以義淨重翻則無百億非想之言二從諸下述成施善護讚二初讚因二讚果經勤修下明修苦行善能下壞外

道降魔怨是莊嚴道場也覺了下成正覺善男子下轉法輪此並果上之事如瑞應經廣明第五白佛舉興衰二初分文二釋義二初白佛三初舉興勸四初述弘經四天聽受二大梵下明釋梵八部皆集經釋提桓因者具云釋迦提婆因達羅此云能天帝三世尊下明人王爲善知識四以甘下明得利護國彌勤二次舉衰勸二初分文二隨釋四初明天失法食二明天神捨離三明惡鬼興災經流星者星說曰絕跡而去曰奔星光跡相連曰流星薄蝕者案漢書天文志作日月薄蝕孟康注曰日月無光曰薄韋昭曰氣往迫爲薄虧缺曰蝕京房易傳云日月赤黃爲薄釋名云日月虧曰蝕謂稍侵虧如蟲食草木葉也虹者爾雅云蜺蜺虹也爾雅音義云雙出鮮

漢光

十一

盛者爲雄雄曰虹暗昧者爲雌雌曰蜺蜺或霓江東呼爲絳俗呼爲美人釋名云虹攻也謂純陽攻陰義也四展轉成災三正勸二初分文二隨釋六初欲得現利二天忻法食三出過三論四韋陀者即外人典籍摩蹉伽經云初人名梵天造一韋陀次有仙名白淨變一爲四一名讚誦二名祭祀三名歌詠四名禳災次名弗沙有二十五弟子各一韋陀能廣分別遂成二十五韋陀次名鸚鵡次名善道及其弟子漸漸增廣如是展轉有千二百六韋陀今言四者從其根本爲名皆明梵事出離欲染故云梵天說出欲論也毗伽羅論此名記論婆尼尼造明種種經書并諸雜語又名字本河西云世間文字之根本典籍音聲之論宣通四辯訶責世法讚出家法言辭

清雅義理深邃雖是外論而無邪法將不是善權大士所爲也僧佉此云數論諸法從數起故劫初黃頭仙所造衛世師此云勝論謂諸論中勝故勝人所造故成劫末鵝鷄外道造勒沙婆此云苦行未知出世時節以人名名所造論此三仙所說無漏盡通故唯五通四始終獲利經如來正徧知說者十號中二號也五教主勝故經以大悲力故等者用無緣大悲普覆法界故超梵王四等之心以難思苦行積劫利物故超帝釋十善之因六諸法本故經一切衆生等者世間謂五戒十善十二門禪等出世間者四教法門者三乘修證也國事者禮樂征伐治世育民之事也造世論者如上三論及下正論等也皆因此經者乃教行理三種經也故新本云欲生人天

欲得四果支佛欲得佛皆依此經懺悔滅障方得成就若探取化意即是於一佛乘分別說三但以此經部在方等教猶屬通理就人分未免異趣故欲令等言隨其五乘而得安樂也二佛述二初分文二隨釋二初舉興衰勸二正勸第六說偈頌德二初分文二夫三下釋義三初說偈歎三初歎三身三初依現文別對三身空是法身者經無空字以其日月必依於空又下文云佛真法身猶如虛空是故疏以空日月三對於三身空無明暗日月共依別喻法身體本周徧日能破暗別喻報身三惑盡淨月能盈具別喻應身隨機勝劣此之別對爲下圓融而作張本耳二通意下取喻義通具三身二初取喻顯圓若以三喻別對三身恐謂三身其體隔異故今委取

能喻之事其義不局每喻各自具於三義如日一喻上必依空下必現水此之三義則顯報智圓具三身此則三般若論三身也月喻亦爾可顯應用圓具三身此則三解脫論三身也太虛空是日所依空天日水日當體合

樂九

十三

空此之三空則顯法體圓具三身月亦如是者月所依空天月水月其中含空亦顯法體圓具三身空徧日月兩說三身者乃約雙照中道而示此則三軌而論三身也二依下以結文示此結歎文凡舉三喻謂月焰化此三事義各合具三如月一喻必上依空必下現水此乃應身圓具三身文舉如焰焰必依日必依空此乃報身圓具三身文舉如化化必有術名爲化法術必在人即是化主其變化物名爲化事此乃法身圓具三身三雖復

下復取結文以通融別經既顯云無有障礙若非以法而定於喻一一圓融何稱此中無障礙說當以此意融身相文使一一相皆嚴三身成密藏相二歎身相二初分科釋經二初分科二釋經五初歎上二相二歎智斷者初二句總標有喻有法次四句是別歎二句是智二句是斷淵海也管子曰水出於地而不流曰淵三歎下二相四絕言歎五結歎二夫相下總示身相三初通嚴三身相好不獨在應身報法亦通等者如今所列目齒輪網例於上下二十八相通能莊嚴三種身也以身相是一隨見成三莊嚴父母生身者以藏通人但言偏空所見佛相謂由正習構造而成相非奇特但能少勝輪王而已以不知心現見從外來取色分齊故名生身此乃如來

樂九

十四

曲順凡小示現此身故名爲應莊嚴尊特身者以別教人能信中道妙色妙心隨緣變造所見佛相知從心現無有分齊或現大身十蓮華藏世界塵相或現八萬四千相好或時祇於丈六三十二相令其機緣無分齊見不同藏通分齊之身故名尊特此乃如來修道所得故名爲報莊嚴法門者以圓教人了大小身及多少相皆性本具修德無功相雖是色色即是心故起信論云色性即智說名智身智性即色說名法身今從即智名法門故以八萬四千陀羅尼爲髮乃至定慧爲足以即色故故得名爲法身相好此乃相好隨解而轉故使莊嚴三身相異二此中下別示法門此乃指經智淵無邊而爲智德百千三昧而爲斷德此之二德能收一切莊嚴法門也

學者若於色心分隔而解此義則永不識法身相好也三文下文示圓融上來分別法報應相欲令易解故須就機淺深優劣須了前不知後後須了後後必見前前良以前麤後妙故也今四天王是大菩薩就圓稱歎見三身相與妙三德無二無別應是解脫豈隔二德報法準知欲彰此義是故特云無有障礙若知此意方是深達金光明法門也三偈初下結歎二初直銷經文二初銷文結佛月爲三身者現文唯有空與水月合有天月可深光喻三身言佛化爲四身者法身妙色而爲化十五法報應二身照理鑒機而爲化主曲順機緣現九界身而爲化事今以化事顯具上三故論四身皆具三四者趣舉一身即三即四彼彼皆爾方名無礙二品初下結妙二初明始

末皆三三章是法三身是人攬法爲人人不離法故云辭異其義是同佛月清淨者取偈初句成今三身三歎天辯絕妙初歎三章云金光明微妙經典顯不縱橫今結三身言無障礙亦非縱橫以初以後顯於中間句句無非談祕藏大師歎妙其意在茲二料簡機應上明三身無有障礙其義幽微猶慮學人三相不泯情有分張今明三身及以所被無法界法界無外更何彼此三初一問答明法外無餘言法不作報非報者非報是應難云三身祇一法界豈有能作所作耶而言依法者此同體依依而復即全體之用用還依體二一問答報即法界影是應身非影是化身以現九界非佛像故法界下注云云者更合明於應是法界三同祕藏豈有一身非

法界耶三又並下一問答明機外無應三身一體人或信之其所對機多謂他境故今顯示令泯此疑二初設並顯動譬機生不能觀應不動譬機熟則能觀應水譬正因安樂性者即大涅槃既是三德性必妙融寧非法界故自他不二門云物機無量不出三千能應雖多不出十界物機應契身土無偏同常寂光無非法界若昧此意勿議今宗二又淨下引文證因感出世由生成佛人皆共知四教悉爾今從圓說始窮經意良以自他性本不十六二方有能感及有能資因感出世者即十界機感十界應也以生地獄與佛地獄性不二故方能感見地獄之應乃至感佛亦復如是今宗所論感應皆具十法界者爲顯不二義若不然豈惟衆生不能感佛抑亦十處不成

法界宜深究之宜深究之由生成佛者衆生能作成佛勝緣也若順若違並資佛行而惡逆者其功最強如無達多佛豈成道然若惡法本非佛性何能資助菩薩成佛菩薩不觀生爲法界非同體悲非無作行何能成就大菩提果若其佛外有一衆生非佛法界生外有佛法界不成不作此解未超三藏何況通別二佛以偈答二初立意分文二初立意二初正立法能成佛者諸佛執法方成因果以法常故諸佛得常例樂我淨亦復如是二般若下引證法能成立一切凡聖者以法本具十法界故隨染淨緣起成凡聖凡夫雖迷而其迷中假實依正未始離性須知染緣熏於性染方成染法淨緣熏淨人皆共知性染性淨其體本融全體而起隨染緣則染淨俱染

深究

十七

隨淨緣則染淨俱淨故不二門云三千在理同名無明三千果成咸稱常樂性之染淨是金光明經妙體如來今說爲作淨緣是故稱歎以答天王二分文二用意釋文三初歎經體二十力下歎經宗三以是下歎經用私開爲四初三行通就衆生明生善滅惡二閻浮下十二行半別約人王明生善滅惡三初三行半明願欲二應當下三行半明立行三譬如下五行半明獲益三是金下二行半約上聖護念明生善滅惡四若有下四行半約師弟說聽明生善滅惡三四王歡喜發誓經悲喜者悲昔不聞喜今得聞悲他不聞喜自得聞涕淚橫流者涕音體涕即淚橫謂交橫古本皆作橫流不須改爲交字大經亦爾無識所翻多云橫流也文選王粲登樓賦曰悲舊

鄉之擁隔兮涕橫墜而未禁怡解者怡謂和
悅解謂舒散也二大辯品二初釋題二初釋
大辯二初所住法門二初具明四辯擬於四
教藏不明大但說無漏故名小辯通教出假
說於界內塵沙八門名無量辯別教能說界

內界外二種塵沙故名雙辯圓談十界法法
皆中二邊情泯法法互徧真俗宛然三諦一
諦名爲大辯二此天下明所住法最勝王云
大辯才天女依高山頂葺茅爲室結草爲衣
坐翹一足空假中智一心中得破根本惑莊

嚴法身心既融通說乃自在即自住大辯也

二以自下能用四悉圓辯深妙能談麤淺隨
機而授無有罣礙方名大辯是故疏以悅宜
對悟而論四悉令得四悅乃至四悟此則一
悉明於四教亦是四教各有四益大辯才天

力用如是二對佛下明品意二釋文二初分
文釋義二初分文二初加下釋義三初加法
師加圓四辯自能該三即前四四十六益也
樂說辯者於一字中說一切字於一語中說
一切語於一法中說一切法隨可度者而有
所益也辭辯者種種莊嚴言語善巧也義辯
者知諸法義所歸趣處也法辯者智慧通達
諸法名字也二若有下加化道前加四辯是
能化之道今加其人是所化之機此二和合
化道無窮也三從復下加聽者經技術也二
結示益深第三功德天品二初釋題二初釋
功德於二嚴中此當福德福能資智以嚴本
理智即三般若福即三解脫所顯所嚴即是
三軌若總若別皆金光明一體異名也應知
大辯與功德天咸皆證入金光明法門皆能

徧攝一切法也引物徧好名行不同彼攝一切以智爲首此攝一切以福爲首能攝所攝對智不同故當世界所須不乏能生正念即當爲人思惟深義能破徧淺即當對治能令速悟本性菩提當第一義二此是下明品意

義九

十九

二釋文二初分文二釋義六初誓給四事即經所列衣服飲食卧具醫藥也及餘資產者即四事之外一切資具產生之物也二明福德之由述過去世值佛修證金光明法門故能今日隨弘經處有求皆與寶華等八字別號也如來等通號也無虛妄名如來良福田名應供知法界名正徧知具三明名明行足不還來名善逝知衆生國土名世間解無與等名無上士調他心名調御丈夫爲衆生眼名天人師知三聚名佛具茲十號名世間尊

種諸善根者以照金光明微妙之智爲諸善之根也璧者玉所琢器也周禮云以蒼璧禮天是也珂貝螺屬也三勸示行法二初略勸示二廣勸示私開六初示常所住處經阿尼曼陀此云有財二示稱名供養三明誦持神呪四明歎呪勸持灌頂章句者以法性水灌十地頂受法王職今密談此法故名灌頂必定是般若德吉祥是解脫德真實不虛是法身德以此三德讚灌頂義等行謂具行諸行中善根謂行一行八戒者即在家人一日一夜也於五戒上更加不著華香不觀聽妓樂不止高牀此八是戒不過中食是齋五勸迴向善提此乃奉供及誦密言邀請意也若爲自身受五欲樂希望財寶即輪迴業衆聖所訶尊天寧護令爲已他成菩提故其所尅獲

漢九

二十

非生死因當依此文修今行法六勸嚴處奉待阿蘭若此云無諍以其所居不與世諍即離聚落五里處也又有達摩阿蘭若謂說諸法本來清淨因名其處爲法阿蘭若即華嚴經初於阿蘭若法菩提場是也今經所指該

其一也四誓臨影響五要求同行六別示歸敬問大經中說功德姊主黑暗妹隨有智主人二俱不受今令奉供與彼大違兩經所談如何和會答尊經設法取捨多塗大權垂形表報非一彼對黑闇表生必死四相相隨此對大辯表福資智二嚴互顯也四相是過寧不雙驅二嚴是功理合俱進有智之福生死自亡有福之智菩提可證今爲說聽金光明典故藉天資所須之物須知今用雙亡生死弘經之心感功德天所獲資財離我我所姊

尚不著妹豈能來此爲弘經彼專修觀用捨論益去留豈同又如國王大臣官長法華令離涅槃令近故知設法各有異門豈以彼經難今所說第四堅牢地神品二初解題二初正解名二初所表之智立四悉淨名云智度

菩薩母方便以爲父一切衆導師無不由是生上是天神天是陽故如父此既地神地是陰故如母一義也者父母不同故屬世界天陽上覆地陰下載卉是草之總名木是樹之都稱智度下合喻衆善合卉木也各有下如檀破主慳乃至禪主破散五屬緣因故未亡淺泯智破生法方無名相破惡中最故當對治智度復本破立俱忘故無等無上名第一義此於智度立四悉檀二智度法門下能召之名彰四德堅牢即常德地即樂淨無苦受故

荷持一切離染著故出生無盡神即我德威
德力用悉自在故二此品下明品意二釋文
二初分文二隨釋三初誓涌地味三初明已
身增長二初生起八事二隨事釋經當依生
起次第消之經聚落者落居也人之聚居故
名聚落山澤者下有水曰澤宿衛謂止宿衛
護五果者即經云壽命色力辯安也此之五
果由食而致二從何下明眷屬增長二初生
起五事二隨事釋經五並如生起經縱廣者
南北曰縱東西曰廣三從世下明報恩增長
二初生起六事二隨事釋經亦如生起二佛
述成二初標文二隨釋二初述成展轉增長
一約聞經下爲成展轉義故探取下科爲出
世也日夜受樂在次文耳二述成供養增長
經明供養是在人世也是人下往天世也日

夜下至出世也雖受天樂住樂法界故無所
受是故名爲不可思議微妙快樂三發誓護
經二初分文二釋義三並如分文第五散脂
品二初解題二初釋名并領二初翻梵名二
初翻名二密有下示義密名順世界密行可
爲人密智能對治密理是第一義皆約三法
不縱不橫非偏小凡下所知是故名等悉稱
爲密注云云者旨在於此二蓋此下明屬領
二初明所屬二初正明所屬二餘三下兼明
三將二管領下明所領二初出部數二初就
方維明數六方者四方天地也四維者四隅
也二又說下約五大明數此五各有主執之
神故二巡游下示功能二聞經下明品來意
注云云者雖三天王各有神將散脂爲首故
獨標名令釋此意也二文爲下釋文二初分

文二隨釋四初發誓護持二初經家叙二正發誓二述有能護之德二初分文二釋義三初標經唯然上聲禮對曰唯野對曰阿二述又下述二初節句立意二神既下總別釋義二初總釋三初據名標義大權所爲有本有迹以智證真名之爲本隨情立俗名之爲迹雖分本迹但立一名昔從密本垂於密迹今從密迹顯乎密本垂迹之際此之密名但詮世俗統領神衆有於密謀今對世尊叙護經德宜須顯本此之密名合詮理智非是偏小賢聖所知稱之爲密散脂本迹既於此彰以驗四王諸天神等皆是從本而垂迹化是故今釋委論密義豈獨能顯諸天本迹亦乃能彰經體宗用二智若下依名釋義二初約境智釋二初釋三智即能觀之三智境即所觀

義

三

之三諦正即顯境智之非邪能所互融邪正不二密名顯德其在茲乎初初五句明智密二初揀非淺深階級者別雖三智前空次假後中此可言思何所論密二即一下顯密二初約三智互融不出三也初句即一智是三智妙空智也次句即三智是一智妙假智也後雙非三一雙照三一即妙中智也若指諸法爲一切者未必盡備以空假中爲一切者更無遺餘矣二若得下附文示融五句即三智配釋如下二次五句明境密二初揀非智知即可思口說即可議那成密耶二不可下示密二初正示境非智外豈以偏小智之可知識即是境豈以六凡識之可識此明絕思也境離名字豈以諸法名字名之境離言說豈以四句言說說之此明絕議也二而約下

附文前三智云唯數唯密今雖五句句句皆云不可思議即唯數唯密也三後五句明正密二初揀非介爾對待皆非中正乃顯法密義不成二即邪下示密二初直就理示邪正中邊趣舉其一收法畢盡更欲與誰而論待對欲令解了強言中正二引思益證心通真妄今以分別有無分之言分別者分於邪正別於中邊乃令諸法不正其中其失既然得可知矣二我行下結二又此下約三業釋二初釋言一往者既智境正外傍顯此義故也散脂今就密名顯本本密必三謂身口意漢九若其不爾何能示現神將三業令衆不知故未顯本前非同證者皆不能測此乃三密使之然也二所以下結雖在三業言且不彰復是密義如先陀婆非智臣莫曉三如此下結

前生後二世尊下別釋前以五句共明智密乃至五句共爲正密但以智等彰其密名故當總釋今於初五句分對三觀乃至後五句分對三身故當別釋二初大師用三法釋二初正別釋二初約離釋義二約合對題初三初約五句別對三觀三初牒文示義作觀釋者此出散脂本修之行也二知一下依義釋句二初二句示境能生所生皆言一切法者如十二支皆是能生皆是所生能生所生所生資能生能生名因能資爲緣因緣不盡生法無窮此等即是所觀境也二了一下三句示三觀三初一句空觀了達虛無者悉從因緣無性實故虛離名相故無畢竟叵得名了法二知法下次句明假觀了無性相名曰知空不礙緣起名爲非空以一切道起一

切種名道種智此智分別十界假名海印森羅而有差別而或作無字必誤也

三如法下後句明中觀以二觀等者出安住行相也圓論三觀若非一心觀體則縱若其不以二爲方便中爲真實觀體則橫今論三

漢

主

觀不縱不橫如此修之即能安住十界之法如於本性即修成性功由一心三觀之力也故荊谿云以正觀安故世諦方成不思議也此則雙遮中道也雙照二諦故言舍受遮乃遮情照則照性邊情既泯二諦皆中中既不偏是故空假各舍一切經云於一切法舍受一切法不作雙照中道解之經意莫顯也三若三下結觀名密二初揀非二即一下示密即一而三故不一即三而一故不異縱橫並別非之例知欲知等者兼用口密以結此文

二約次五句別對三脫此明散脂自顯本地已證解脫而兼三諦者得脫由見諦也三初牒文示義二現見下依義釋句三初一句示圓淨實智照不思議真諦者真諦體是性德般若全性起修名爲實智諦非般若寧發實智此諦離縛乃成分滿圓淨解脫當知理果終始一如二三句示方便淨隨機屈曲因果廢興皆是權智照不思議俗諦俗諦體是性德解脫全性起修名爲權智離縛乃成分滿方便淨解脫理果不二準前可知三後一句示性淨前云智光乃至智聚四名但召能照之智唯此智境雖亦標智體是諦理義當所照故疏引經法如如智此智與法如如冥故意彰境智如如不二然而此說人皆知之了解終成二物相合蓋以不曉境智之體故也

欲知境體須簡頑境及偏小妄心假立真如此境安能與智不二今依馬鳴立境體者所謂本覺其智體者所謂始覺故起信論云所言覺義者謂心體離念離念相者等虛空界無所不徧法界一相即是如來常住法身依

溪元

二十六

此法身說名本覺文此覺是性全性起修名為始覺論云始覺者即同本覺既云離念豈有思議既等虛空無所不徧豈有一時一塵一心而非本覺及始覺耶是故得云三世十方生佛依正為所觀境三世一方生佛依正為能觀智境智名別其體不殊是故能所二而不二境照於境境照於智智照於智智照於境此四句說說即無說無說而說此四句照照而無照無照而照不可思議智境斯之謂歟此之智境須論六即今是分真究竟二

位三若三下結脫名密二初簡非二以不下示密俱例前三約後五句別對三身三初牒文示義二正解下依義釋句三初二句示報正解能顯體等者此乃似解能顯真體真體乃是性德般若既得顯發即能觀達根本無明故名正觀而言報身者在心名觀就身名報四十二位皆得論之二得正下二句示應分別約法知藥病也解緣約機知生熟也非此解別則無應身故應身對機未熟而出乃名待時已發後出乃名過時啐啄同時是應機相三一句示法無覺等者此義須對報應簡之祇一大覺而有寂照及非寂照三種之能故名三身覺即照覺能照理故即是報身無覺即寂覺能現形故即是應身今云無覺無不覺者即非照非寂覺能雙亡雙用名究

溪元

三七

竟覺即是法身是故三身名爲三佛三種之
了亦復如是就身名覺就心名了三義宛然
三若此下結身名密二初簡非二非一下示
密可見二約正下約合對題二初合三德對
題上文約正明於三身觀明三觀脫明三脫
三三皆可對金光明此明離也今合三身爲
一法身但對金字合於三觀爲一般若但對
光字合於三脫爲一解脫但對明字諸經諸
論以三德等作修二性一說者圓人解之是
合三義此意至妙學者應知二三德下明五
章皆密三德是佛所證密藏以被機故說金
光明微密之教散脂本因稟此密教而生密
解即聞密名也住理乃是顯於密體也行行
乃是修於密宗也利他乃是起於密用也不
言教者同佛故也二復次下明互通雖作三

身三脫三觀三節解之而十五句一一皆是
金光明海體量高廣故使名義展轉相釋如
涅槃中百句解脫以一一句皆是三德微密
藏故大師釋句句具百成於萬句今舉正解
具十四句能具成十五句合云由正解故正
觀由正解故得正分別由正解故正解於緣
由正解故正能覺了由正解故不思議智光
乃至由正解故於一切法合受一切法以正
解一句爲首既然餘句爲首例亦如是乃成
一百七十五句以體量一貫故名義相成疏
於三五皆舉頭句例於四句皆十五句注云
云今此銷釋也二又作下用五性釋所用五
種皆名佛者是果德故皆稱性者不改義故
若將此五對今三節五句義者能顯散脂本
證圓常迹用周徧護經德妙利人益深此乃

今家對釋意也文二初大師對初五句二初示五性異同二初明三種不異正謂中正緣謂助緣了謂覺了此三名義諸師立同故云不異二又一下明二性出沒二初二家立異二初明異相果性者緣了所尅智斷果也境界者緣了所轉境界即陰等十種境也果及果果者果則別在智德果果者別在斷德智德之上又加斷德故重言果此之二二皆稱性者悉以常住不改爲義境界不改者修惡即性惡故也二若作下明開合沒境界性爲緣因所攝者陰等十境乃是正觀近方便法親發了因故可攝屬緣因也沒果果性爲果性所攝者智斷雖殊俱名果故二雖開下五數不虧二今以下約五句對性二初對初家五性安樂性即正因佛性者安樂乃是涅槃

漢九

三九

之義具足三法今就合說但名正因世出世等者六道是世間因果三乘是出世因果言因佛性者境界之性但齊九界十如是法望佛是因以其佛界十如是法望九稱果皆屬能觀不名境界故起信論但以九相而爲境界是故業相名細中細爲佛境界又云依轉識故說名境界而此證者無有境界可說故知境界是九界法若爾何名佛性良以果人不獨成就佛界十法亦能成就九界十法是故千法衆生雖具體用不彰唯佛究竟圓融自在所以因法是果人性二若作下對次家五性境界既以合入緣因遂取知法分齊之句而爲果性究盡實相名智照分明見無分齊之分齊也如云智度大海佛窮其底豈非無底而爲底耶乃以安住諸法如性一切皆

能含受一切同名果果性此則果後任運求
求雙遮雙照也二若然下章安例兩五句二
初例上合對二師雖下準義須釋五性祇是
開於三法三番五句既其番番對於三法亦
合番番對於五性後之二番大師不釋意云
可見章安恐後學不知故略指云義例應爾
復令講者伸釋其意故云準須釋出等也第
二番中智光是了因性智炬是境界性知境
不濫如炬照物智行是緣因性智聚是果性
智境是正因性若依次師沒境界性者則智
炬是果果性斷德對機不濫也第三番中正
解顯體是了因性正觀體顯既當報身合是
果性正能分別是境界性正解於圓是緣因
性正能覺了是正因性若依次師沒境界性
則以正能分別爲果果性果後應機任運分

漢九

手

明也三世尊以是下結三從世下發誓充益
二初分文示好二依此消文二初益能化經
三初世尊下益口業二眾味下益身業三心
進下益意業二以是下益所化經三初未種
令種二若有下已種令熟三無量下已熟令
脫問既得智聚又攝福聚斯乃真似二種莊
嚴合居方便及實報土經那但云無量千劫
人天受樂答須知十益皆悉不離二十五有
此中乃是人天方便人天實報故仁王般若
云出三界外更有衆生界者此是外道大有
經說須知四土若橫若豎祇在三界一處而
論學者宜審四從南下歸敬三寶一切衆經
初皆歸敬者謂結集經者皆有歸敬在通叙
前此方好略譯人省之亦有存者如薩遮尼
乾子所說經初云歸命大智海毗盧遮那佛

注云外國本一切經首皆有此句諸論下即造論者歸敬也如智度起信等三寶者佛法可知功德大辯即菩薩理和僧也南無此云歸命二正論善集明人王徃日通經二初正論品二初解題二初正釋題二初直釋二字

漢元

季二

世聖者謂輪王也易曰備物致用立功成器以爲天下利莫大乎聖人管子曰聖人若天然無私覆也若地然無私載也此皆言世間聖人出世聖謂三乘果人斷惑證理名聖也覈者說文云考事之實也覈事實則世間正論可治國覈理實則出世正論可以詣道二此品下委明四悉謂世間正論而有四益皆引孝經結成其義文爲四初世界先王舊法即世間事實世不同即世界意也二王行下爲人百穀者楊泉物理論云梁者黍稷之

總名稻者粳糯之總名菽者衆豆之總名三穀各二十爲六十蔬果之實助穀各二十凡爲百穀社稷者孝經緯曰社土地之主也土地闕不可盡敬故封土爲社以報功也稷五穀之長也穀衆不可徧祭故立稷神以祭之禮記曰厲山氏之子厲或作列柱及周棄爲稷厲氏之有天下也其子柱能植百穀共工氏之夏之衰也周棄繼之故祀爲稷神共工氏之子后土爲社共工氏之霸九州也其子曰后土能平九州故祀爲社民

用和穆者人民被服其教自相和睦尊卑上下無相怨者三對治內姦謂亂臣賊子孔安

國曰在內曰姦在外曰宄禍亂下禍者謂善人逢殃亂者謂臣下悖逆作起也灾者天反時風雨不節也害者地反時水旱傷稼也四第一義本金光明者即四王品云所作國事所造世論皆因此經也至德要道者至謂窮

漢元

三十三

理之極要謂以一總衆謂茲正論是先王舊法爲德之極道之要也前之三悉屬於世間且就末辨今此第四兼出世足故雙明本末之義令其聞者解悟兩種第一義故鈍者但得世間要道此從未也利者乃悟出世要道

此從本也增益天德亦須兩分從未者益但生天若從本者益在義天亦兼淨天以金光明屬通教故二此文下明來意冥聖者即諸天是冥聖也故法華三昧云一切真空二釋文二初分文二隨釋二初長行經受灌頂位者華嚴三十九云轉輪聖王所生太子母是正后身相具足其轉輪王令此太子坐白象寶妙金之座張大網幔建大法幢然香散華奏諸音樂取四大海水置金瓶內王執此瓶灌太子頂是時即名受王職位墮在灌頂刹

利之數即能具足行十善道亦得名轉輪聖王二偈頌二初分文二隨釋四初集衆三如分科二次四下發問二初分文二釋義四如分文三結問開答四梵天答二初述意分文二初述意佛經釋天子義此文最顯若儒教則云王者父天母地爲天子之故援神契曰天覆地載謂之天子二分文二隨文釋義二初略答四初許答二答王義經故稱人王者謚法曰德象天地稱帝仁義所生稱王白虎通曰王者往也天下所歸往也三答天下答問天義二初指出三義未入等是一義分德是一義力加是一義二以護下明答三問三初以護胎答第二問未入護者猶在中陰已入護者處在胎藏此之二時多爲鬼害故假天護二以分德答第一問三以力加答三四

問前第三問處王宮殿何故名天四問以人
法治世那得名天故今答中雖處人宮天力
加故自在如天答第三問也遮惡勸善令人
生天答第四問也四從半下重答問王義二
初正明人王三義三初明執樂名王王執此
漢九
樂者謂持禮樂以化民也孝經曰導之以禮
樂而民和睦樂記曰大樂必易大禮必簡樂
至則無怨禮至則不爭揖讓而治天下者禮
樂之謂也使天下去明樂之化成也京房易
候云太平之時十日一雨凡歲三十六雨此

休徵時若之應風土記曰擊壤者以木作之
前廣後銳長尺三四寸其形如履臘節僅少
以爲戲也逸士傳帝堯之時有老人擊壤於
路曰吾日出而作日入而息鑿井而飲耕田
而食帝何力於我哉豈非至聖之德爲而不

宰玄功讚運是以百姓日用不知竹馬兒童
所戲也人王執樂治國故得天下和平老幼
俱樂其性也二明遮惡名王即經云羅刹魁
膾等以能遮暴惡故亦名羅刹魁膾也以亦
名二字貫下如羅刹中魁卒故衆鬼不敢爲
漢九
非也三明父母名王即是王爲民之父母也
誨示禍福等者謂違仁義者致刑罰是禍惡
也錄仁義而授爵祿是福善也制禮以檢其
迹作樂以和其心故樂記曰樂者爲同禮者
爲異同則相親異則相敬民知禁者民知有
禁令也二能爲下兼顯天子三義因中說果
者以禮樂化民必生天上故二從若下廣答
二初分文釋義二初廣明非法失於六義二
廣明正治得於六義此六經文前後相參故
并前段皆不細分講者當以六義得失對文

銷之其理自會二此中下示觀明本二初令
思觀義自思之者稟斯宗人合知三種修觀
之法故疏不示令其自思今恐後學未能別
之不免略說此於三種是託事觀謂託世天
明於諦境託於人王明於妙觀即此一念性
是義天依止此天能令此觀不起邊倒名天
護義中觀也觀合義天同天之德不分而分
名天分德空觀也義天神力加妙觀故能歷
諸境皆得圓融假觀也又託人王修理觀者
全諦起觀中觀雙照即父母義空觀伏惑即
魁膾義假觀立法即執樂義此諦此觀皆離
縱橫祇於一心具茲六義二設問明本二初
設問上四王品云閻浮提內諸國王等所作
國事所造世論皆因此經豈非正論以金光
明而爲其本欲令答示即末之本故與此問

第九

三二七

二天者下答示二初正示方等所說豈有一
事不本於理如向散脂翻爲密者常所稱呼
豈知召於祕妙三法今於此典自叙密名十
五句義斯乃委彰世名之本此之正論是梵
王說梵王之本諸經開爲法身菩薩法身菩
薩隨所住處是常寂光以身例口隨有所說
無非祕藏今之正論既金光明而爲其本豈
可末事暫乖本理水波金器本末同時以金
光明具世間法故即世名而可示本自此爲
二初明末即於本二初就天子三義示本應
先了知此金光明是法非譬以法報應是金
光明異名故也天者第一義大也子者無上
衆生本來人也攬金光明妙三實法爲此假
人此人依止第一義天本離八倒是天護義
此人智光冥法身金德與法同爲分德義此

人應益名之爲明義天之力之所加也二又
父下約人王三義示本此妙假人體是金故
雙具權實能與一切而作父母體是光故照
惑本空即遮惡義體是明故能生衆善即執
樂義二以此下明末從本立如上所示本之
六義因果六位皆即此義此義能作世出世
間一切事本今即此本而談正論其圓教機
聞治國事即達其本乃能頓治四種之國二
如半下例結經於一人而立人天兩種之稱
意顯此論通世出世也釋善集品二初解題
二初正解題二初釋善集得名二初據名廣
集六善海導師謂海中船師善法雖多不出
此六二附文別集檀智二初明攝六檀能攝
六智能導五成就二嚴故舉茲兩二提如下
示經文二初正示經經舉此二其相深廣寶

澤九

三六

滿四洲盡奉三寶興隆事廣合掌而立聽金
光明證悟理深二檀智下例餘行此王心大
集善不輕檀智深廣在文既然驗餘所修皆
非聊爾二此六下用悉檀立品總舉六度名
數不同是世界五度望智且在事善屬爲人
智照五度破取相惡屬對治達六法界絕乎
思議皆到彼岸名第一義此王具集四悉檀
善故以其名立今品目二此品下明來意治
國之論是世正見聽金光明是出世間上上
正見夜睡夢中聞佛功德是感動聖及見比
丘名曰寶寔是感動賢縱入分真望佛名賢
二釋文二初分文釋義二初分文二釋義二
初對告地神二佛以偈說二初通明因地行
檀二別明善集二施謂四天下寶施財也請
說此經令無量衆聞金光明施法也此別爲

六當如分文以義解釋經治政之勢者謂化之勢分極於海際厠雜也填塞也繒帛之總名也曼陀羅此云適意曼殊沙此云柔軟舊小大白小大赤不鼓鼓擊也熙怡悅樂也瓊美石次玉琦玉名耳璫釋名云穿耳施珠曰璫應作珥璫珥如志切蒼頡云珠在耳也二就此下指歸三法言就此品論金光明者就其所說論三法門疏文祇云論金光明驗直就法立此三名實不從譬以前後文悉皆如是講者學者知之知之然以諸句對三字者以此三是深廣法性當體之名法性可尊可貴名金法性寂而常照名光法性能多利益名明與諸三法無二無別若指品內事理依正即此三者乃令行人達乎所詮不縱不橫絕思絕議此典方得名爲經王是知對三深

舉

三十七

有所以此自爲三初就善集論翻波羅密名到彼岸是所歸處故名金般若翻智故名光五度是行故名明此就智行及果爲三對金光明二就寶實論窟是所依名金滿月能照名光讀誦是行名明此約依正對於三法三就二人論寶實依正與王兩寶對於三法行者應知祇一法性名金光明豈可光明暫離於金豈可金光暫離於明今以三名分對依正自他人物爲令了依不離於正自不離他不離物以金光明舉一即三全三是一不縱不橫而高而廣物物皆是金光明海心心皆是三德祕藏若不爾者何名經王耶第三鬼神品二初釋題二初正解題二初正釋鬼神二初釋鬼歸者尸子曰人死曰歸云云者觀佛三昧經云修羅與天帝戰時空中刀輪

而下修羅軍衆身支墮落即便怖畏竄隱竊
絲若依俗釋者鄭玄云聖人之精氣謂之神
賢智之精氣謂之鬼禮記曰明則有禮樂幽
則有鬼神二釋神二此品下對上題品二此
品下明來意二釋文二初分文二釋義二初

溪九

三十八

長行二初正釋義二初列二釋二初舉事別
佛從等者果後慈悲重法現像說法化人此
乃應身被機之佛從本覺如起始覺智合本
真如名報身佛是始覺也一切諸法元是諸
佛所行之處即法身佛是本覺也三佛歷別
者修二性一能起所起能顯所顯條然異故
事供別者四事供養資持應佛萬行功德資
成報佛稱理之智顯發法佛資成顯發皆供
養義三佛既異三供亦別二圓供養前有理
智以歷別故貶之爲事今聽經事以融即故

裏之爲法第一供養者不思議供也能聽所
聽體不二故祇於文字了具三身能說是應
解脫德也能詮是報般若德也所詮是法身
德也不解新伊但論能所豈顯圓佛及圓供
耶文字若非祕密之藏那生諸佛恭敬之心
非祕妙者安能圓供三世佛耶注云云者令
如向釋也二又別下叙重聞二初標示謂四
願一勸也二若欲下釋出二初出四種願欲
問經示行人欲以妙具供三世佛及知他佛
甚深行處大師何故即以知字而爲報佛所
知是法二必垂形是則三身皆屬行者因既
濫果供養義乖此解違經如何取信答前揀
事別正却此情經云欲知豈非行者甚深行
處既是法身能知之心寧非報佛文字之應
現亦唯心若生佛條然能所永異斯出小教

溪九

三十九

何預圓宗今就圓宗解四願欲若迷三世諸佛三身同在剎那法界六塵頓彰妙解是可思議正當違經二聽經下明一事滿四三世諸佛覺智爲命而與衆生同一心性之熏修故即不受供養諸佛壽命不滅而滅以隱爲滅也今以聽經爲供養故即是受供諸佛壽命不生而生以顯爲生也行人應了生佛無差聽經智生即諸佛現以諸如來同一智故觀行相似分真之佛與究竟佛無二無別又了智生即三佛生即一而三不縱不橫此乃欲供欲知三世諸佛祇聽經一事四願俱滿三偈頌二初分文二盡道下隨釋科節並如分文所列經若入是經者一言於經即有三種謂教行理能了此三是妙三法名入是經若不然者安得入經即入法性所入法性無

量甚深三義具足名金光明稱此安住名之爲如即見釋迦三身妙體須論觀行相似分真入經見佛經若百由旬滿中盛火應從中過者爲法亡軀也經文殊師利云妙德彌勒云慈氏經勇捍說文云多力也五舉能致天龍以勸修二初翻現文疏從摩醯去也閻摩羅王或閻摩羅社此云雙王閻摩雙也羅社王也兄及妹皆作地獄主兄治男事妹治女事故曰雙王又苦樂並受亦名爲雙那羅延此云鉤鑠力士難陀此云喜跋難陀此云賢喜兄弟二龍風雨應時能令人喜賢謂性又賢善故毗摩質多此云淨心正法念經翻爲響高亦云穴居正云吠摩質咀利此云綺畫又云寶飾帝釋婦公舍支之父佉羅騫陀此云廣脾二脫因却解初段脫因等者初段文

云能令一切衆生解脫度無量苦諸有大海
 既云一切衆生解脫度諸有海須於界內及
 以界外各脫三障故以因果對於業報諸有
 由惑故當煩惱經優鉢羅華下四句四色蓮
 華優鉢羅是青波頭摩是赤拘物頭是黃芬
 陀利是白

金光明經文句記卷第五

音釋

腴容朱切腹倨居切倨御切皦吉了切顚魚容切
 懷其據切蕞徒沃切釐莫二切駢旁芳切馱微切驂馬微切
 薄蝕薄伯各切蝕實職切怡怡也解怡也蟬蟬也蟬蟬也蟬蟬也蟬蟬也
 唐豆切鵠鵠音鵠鵠音鵠鵠音鵠鵠音鵠鵠音鵠鵠音鵠鵠音鵠鵠音鵠鵠音鵠鵠音
 切胡切實實切舒舒切散散切也也也也也也也也也也也也也也也也也也

廁初吏切瑣姑回切琦渠宜切璫都郎切竄取亂切
 捍侯肝切鑠蘇果切咀呂丘切佉丘迦切竄取亂切

金光明經文句記卷第六上

溪十

宋 四明沙門 知禮 述

釋授記品二初解題二初正解五初明今是二種四種記者首楞嚴三昧經佛告堅意記有四種一者未發心記或有流轉六道生於

溪十

人間好樂佛法過百千萬億劫當發心過百千萬億阿僧祇劫行菩薩道乃至供養佛化衆生皆經若干劫當得菩提二適發心與記者是入久劫種諸善根好樂大法有慈悲心發心即住不退地故發心與記三密記者有菩薩未得記而行六度功德滿足天龍八部皆作是念此菩薩幾時當得菩提劫國弟子衆數如何佛斷此疑即與授記舉衆皆知此菩薩獨不知四無生忍記者於大衆中顯露與記也今是二種者即適發心記及無生

記也二授者下約訓釋二字三此中下明所記之人四亦名下釋記異名五從佛下明授非受二此是下來意昔行經者金龍尊王讚佛發願而爲行經十千枯魚聞法熏修而爲行經以爲因方猶將也今得記蒞將來作佛

證驗今日若親弘經若爲外護不久得記成佛不虛二釋文二初分文二釋義二初與記二初與三大士記二初同緣者集過去同緣此經不說或見彼經二正與記世界轉名淨幢者應論四句者一名轉土不轉轉名淨幢是也二土轉名不轉如往古釋迦取土名娑婆今釋迦亦名娑婆三名土俱轉如觀音補彌陀處四名土俱不轉如今銀光補金幢光照佛處世界名字如本不異此中是一者恐誤合云二也二與十千天子記二初分科二

溪十

釋義二初聞經生解或相似解或分真解經無定判故須從容經心無垢累等如下釋疑疏中明二正與記既云於是世界而無別名即是還名娑婆此乃土轉名不轉一句注云云者今如向釋也二疑記二初分文二釋義

二初疑問三初行淺記深二如餘下約權疑實引錐指地者謂無有容錐之地不是捨身命之處也從假入空非止一世者菩薩性地經於三祇修六度故直行等者歷別漸次其相如是三爲衆發問大權解頓自必無疑爲他故問二佛答二初分文二釋義二初舉現行四初明三事和合二證聽經功德順前三教上求下化亦得名爲修法供養但以偏漸故經多劫一聽此經頓達妙性一攝一切名真法供既生圓覺即三世佛皆受供養能知

諸佛甚深行處三身頓顯今萬天子來此聽經若不能滿四種願欲安得受於成佛記別驗知前品所說不虛三聞記下明稱經悟入無有成佛不具三身三身之果由於今日聞金光明以爲妙因從法性明生慙重心應身因也從法性光起無垢心報身因也從法性金起虛空心法身因也此金光明與其三德無二無別三德爲本無量功德之所莊嚴或似或真顯此三德是故如來授與果記聽經之益其相如是四以隨下指今昔因緣經皆因緣者一聞得記豈無因緣此乃總標有妙善根別標遠因緣以隨相修別標現因緣言因緣者感應也或內心外教而爲因緣何以故下釋出現因緣行隨實相而修者以十乘觀而爲行也不思議境名實相也即境爲觀

此觀順境名隨相修非今宗意此句莫銷然此十觀修有三根上根一觀中根二至七下根具用十今萬天子一坐聞經或但用一或在二三是信行根依言而修入似真位有妙善根下釋出遠因緣善既云妙乃昔聞圓而爲根種故云緣實相而種善根也二從亦下舉遠緣經誓願因緣者流水品云未來之世當施法食也乃以此文對下二品而爲略廣五釋除病流水二初釋除病品二初解題二初來意即廣答遠緣四字是也意通流水文在此中二由醫下釋題方等經王標除病目不止除於果報病苦義合該收惡業煩惱十種之病故下文云治諸衆生所有病苦悉令除差文意含攝十種行人故上正論品疏云半名世論半名出世論今豈不爾又荊谿云

上根即於境種而生於果故文云直聞是言病即除愈爲中下根更須後法是故文云至長者所爲合衆藥故知不獨除果報病二釋文二初通後品分文二就二品釋義五初緣本二從像下遠緣二初分文二釋義六初明父二善女下生子經受性聰敏敏達也孝經云參不敏何足以知之三是時下國人遇病四善女下其子請三初見人遇病二作是下思惟經衰邁說文衰減也損也廣雅邁歸往也謂壯力已往也禮記八十曰耄注云耄昏忘亦亂也顛四支動也掉振也机杖者坐則凭机行則執杖三即至下正問四初問四大增損二問飲食犯觸三問治病醫方四問病動時節五父爲說二初分文釋經二初分文二隨釋四初答四大增損二初佛叙父醫欲

答二正答時節五初釋時節二初依俗法謂孟仲季者孟始也仲中也季末也二依佛法一歲三時以四月爲一時也何故沒秋時耶爲破下凡有二一爲破常計二爲開迦提以秋是收成物皆結實易起保著故不言秋爲開安居者爲後安居人續結令成爲前安居人開迦提月也律中有三種安居謂前中後也四月十六日是前安居十七以去至五月十五日名中安居五月十六是後安居若四月十六日結者至七月十五日夜分盡名夏竟至明相出十六日後至八月十五日以來名迦提月明了論云本言迦絺羅爲存略故但云迦提此翻功德衣以前安居人坐夏有功五利賞德律中受此衣故一畜長財二離衣宿三背請四別衆食五食前後至他家西

漢十

五

域記以迦提翻昂星以昂星直此月故於昂星月中得受功德衣故是知若不沒秋中後安居不名坐夏以後安居人至八月十五方解故二釋若二二說三初依俗法土寄四季者三六九十二月也各十八日者四季共七十二日也祇是陰陽二月者皆以奇數爲陽偶數爲陰也陽土陰土者從冬至一陽生爲陽遁故十二月三月是陽土從夏至一陰生爲陰遁故六月九月是陰土若論下二陽土二陰土亦是二二故加本月足滿六時二依佛法皆起於十六日者彼以十六日爲朔也三又云下復依俗法皆以奇偶之數分陰陽也三釋三三本攝二初正釋二初依俗法二初以孟爲本二又云下約五行說二依佛法三時三月以爲其本各攝一月故云三三本

攝二釋妨既三爲一數是故俗法及以佛法
皆約三論但以俗法本之與攝祇在三中故
名三三本攝若佛法者即以三三爲能攝本
乃以三一爲所攝月亦得名爲三三本攝四
釋隨時消息二初依俗法二依佛法夏之後
分冬之初分隨俗名秋隨此兩間消息斟酌
五釋代謝增損二初通內外釋春動肝病等
者肝藏屬木木春王則可治脾屬土木尅土
故脾難治心藏屬火火夏王則可治肺屬金
火尅金故肺難治肺屬金金秋王則可治金
尅於木故肝難治腎屬水水冬王則可治水
尅於火故心難治二約佛法料簡二初問二
答意者佛所制法非爲養身但爲修心及以
禁足分二初約破常答凡夫四倒常樂我淨
顛倒之計託緣而成故廢秋時令諸弟子不

保常樂二約坐夏答既開後安居免於坐秋
則前安居人得立迦提月廢秋之意爲此二
緣二從有下答犯觸二初正明犯觸其中先
論六事犯觸多行倚者倚立也次若火下四
大動病火少痰多者火減故水增也飲食下
通明六種犯觸過量等者封君達云體欲常
勞食欲常少勞勿過極少勿至虛常去肥濃
節鹹酸減思慮損喜怒除馳逐慎房室苦菜
別示妨食二略明六大白虎通曰府者何謂
也謂大腸小腸胃膀胱三焦膽也府者爲藏
官府也胃者脾之府也膀胱者肺之府也三
焦者腎之府也膽者肝之府也大腸小腸心
之府也疏中兩膀胱唯一藏黃帝脉經云上
焦自頭已下至心中焦自心已下至臍下焦
自臍已下至足廣雅云膀胱脬也脬字匹交

切腹中水府三蒼云盛尿處曰脬三從多下
答病起時節生與起時相不同者微發爲生
動用爲起微著不同也夏日等者四病四時
生起所以也四從有下答治病方法二初分
文二風病下隨釋三初未病藥防二飽食下

譯

七

正以藥治也但舉病發者以病顯藥當用對
病妙藥治也三風踈下病退藥補二此中下
示銷文所出良以真諦善開世術兼有神通
故銷此文全憑彼踈六善女下知已徧治二
初分文事釋二初分文二釋義二初病輕聞
說即差二經善女下病重服藥方除此品事
醫意含法藥除病不一非可卒陳次示觀心
略申其意其文在即故注云云二觀釋者此
品所詮是佛自叙宿命所作淨佛國因文中
雖說除果報病意乃通結四教機緣是故大

師事解之後示觀心法明彼流水結緣之意
如觀音踈釋於七難帖文但在事中火等至
觀行釋方明三障四教今豈不然問既結四
教生土之機何故但約停心方便而論觀心
答語似三藏停心之法意則不然何者以四
分名通界內外數息等四四教行人無不修
證今之觀解約此而論彌顯除病結緣之意
分三初明觀之藥病三毒者謂貪嗔癡偏起
也言等分者謂三毒等起也然貪嗔癡性本
相友終非三心一時並作但是不定雜雜而
生故云等分一分乃有二萬一千四分共成
八萬四千塵勞之門此則十界衆生心病對
前果報身病是外故今四分名爲內病數息
等四對前甜辛種種之藥皆是事治故今四
觀名爲法藥二耳聞下示行之根性自有衆

生聞說四觀四病得差屬信行人自有研心
修此四觀四病方差名法行人信行則是學
讀之人法行則是坐禪人也今明二人皆通
四教三眼是下明對病用藥二初明四分起
相二明四觀治相初四初約五根對時此就
五行對於五藏藏主五根根屬四時眼耳鼻
舌偏屬一時身通四時如常所說二妙好下
明五欲致病以其五欲麤妙偏總對根不同
致令四分增損有異須知五欲徧界內外故
使四分通別天殊迦葉斷通故稱少欲未斷
別故聞琴起舞請觀音云斷除三毒根成佛
道無疑既論三毒寧無等分此四亦由實報
五欲麤妙偏總對根而起也三明三受犯觸
違情苦受順情樂受不違不順平平受此三
偏起也總三起等分名覺觀緣慮紛紜也四

慢時下明四分病因五欲三受既從外境蓋
是四分助發之緣今舉慢等內心惡習乃是
四分親發之因慢心發嗔乃至放逸發於覺
觀并前犯觸通界內外例五欲說二慈心下
明四觀治相前說外緣及以內因起四分心
皆所觀境即是病相今明四觀正明能觀四
種法藥慈心治嗔者嗔既通於界內界外能
治慈觀不獨觀於衆生作父母想與世間樂
觀一切法無性無相能與衆生涅槃之樂觀
一切法無非法界能與衆生究竟之樂以此
治於三種嗔心是故釋論明三種慈也不淨
治貪者不獨修於實想假想破於凡夫依正
之染亦能破於二乘涅槃之染亦破菩薩執
於次第三諦之染故起信論云始覺能破六
種之染因緣治癡者不獨觀於三世無常因

果破於凡夫斷常之癡亦能次第觀於三諦
十二因緣破於二乘有無之癡又能一心觀
於四種十二因緣破於菩薩縱橫之癡是故
大經觀十二因緣具四種智也數息治覺觀
者不獨數息觀於生滅而破凡夫有著散亂
亦能數息修俗諦三昧深入緣起破於二乘
偏空亂意又體數息息息皆中諸法趣息破
於菩薩二邊亂意故請觀音於數息法得三
乘道住首楞嚴身如瑠璃毛孔見佛然此四
治或可四人各修一法以其四法各含三觀
人人自可依次不次而治三惑或可四治祇
對三觀慈心即假觀不淨即空觀因緣即雙
照中觀數息雙遮中觀此三自可約次不次
次復不定或可三人各一或一人前後若不
次者唯是一人一念而進觀音疏中尚以三

毒直對三觀而論次第及不次第沉慧等四
非三觀耶若其圓人四分偏總而發起者即
於一心融妙三觀對病用之即止觀中勝別
意也二流水品二初解題二初兼除病釋名
二初釋流水二初引文標二名二接經釋二
義二初釋二義二初別釋二義二初釋與水
二釋流水初則大慈與樂次則大悲拔苦初
又二初列二水二釋二水今此一類世樂且
在果報之益出世唯明一實之益若論此時
結淨國緣合徧人天及以四教二釋流水二
初列二水流除者流去其水即是除義二流
除下釋二水言業因者於果報外九益皆能
除於業因今十號等乃以能除顯於所除十
二因緣經稱甚深驗三歸十號皆是圓說識
本雖無三歸之文最勝經有真諦所譯必亦

有之授法之儀闕之不可二請父下雙成二
義二既有下單示題二初問二文中下答經
文與題二名互顯巧不過此也二釋長者子
法華疏中具十種德名長者一姓貴二位高
三大富四威猛五智深六年者七行淨八禮
備九上歎十下歸子者下亦如王子公子也
故經云持水大長者家中後生一子名曰流
水二此文下取授記出意二釋文三初明第
三結緣近由二初分文二釋義二初弄引二
初行恩布德二國人稱美二善女下正近由
三初明眷屬二時長者子將下見魚之緣即
禽獸馳奔也三時長者子遂下正救魚私開
爲二初明因緣二初因流水興悲二時有下
緣樹神示數二善女下與水食二初與水四
初取樹枝覆日恃依也二作陰涼已下知水

釋十

十一

源決絕捕捉也決棄其水決音穴廣雅云穿
也說文云下流也周易藩決不羸亦音穴也
三時長下就大王借象廐馬舍也釋名云廐
聚也馬之所聚也二時長下施食二初察魚
飢惱徬徨上扶方切下以章切廣雅徙倚也
又徘徊也二善女天下取食施與二從未下
明第四結緣二初分文二釋義四初發誓願
二復更下思惟說法三作如下正說法先稱
十號次說因緣十號在悟在果因緣在迷在
因迷悟因果其名雖殊而體不異以十號果
是究盡三德十二因緣是本來三德三德不
改因果寧殊故普賢觀云大乘因者諸法實
相大乘果者亦諸法實相諸法是修二實相
是一性此三圓融不縱不橫全體爲因全體
爲果衆生雖迷十號無減諸佛悟極十二不

虧以世間相皆常住故今先唱果果理已顯
今其解生初稱寶勝者乃是別名名於一佛
如來等十乃是通名三世十方佛佛皆具若
以通從別合得名爲寶勝如來寶勝佛寶勝
世尊此三既然例此合云寶勝應供寶勝正

徧知乃至寶勝天人師也此十通號大經大
論出其名天台慈恩出其義相狀已顯今傍
諸釋更約三三及一總結以銷十號今知一
一無非祕藏此義若明則不辱於果人名字
初三旣以如來爲首即法身中三也如來是

漢十

十二

真如屬法身應供利生是解脫正徧知具二
智是般若以其法身必具二德故也次三旣
以明行足爲首即解脫中三也三明之行是
解脫善逝能趣極是般若解三世間一一常
住是法身以其解脫必具二德故也後三旣

以無上士調御丈夫爲首即般若中三也見
性名丈夫故當般若天人師軌訓衆機是解
脫佛是復本大覺是法身以其般若必具二
德故也此九即三此三即一一無一相三九
宛然三千世間九世剎那一多延促究竟自

漢十

十二

在故言世尊十二因緣束爲三道無明愛取
三支屬煩惱道行有二支屬業道識名色六
入觸受及生老死屬苦道此雖昏迷繫縛輪
轉而全體即是三因佛性皆不可思議隨人
觀察顯發不同故大經說下中上智觀此乃

得三乘菩提若上上智觀得佛菩提以前三
教智有思議故觀十二止得三乘唯有圓教
不思議智體無明等即是性染非佛天人脩
羅所造一一常住當處圓融方曰因中具於
果性又玄文中三道三識雖本有位與果後

三德無二無別得此意已方可分別十二別名無明謂不了六受即空假中行謂依不了心動作業行識謂業牽中陰識託母胎名色謂二滴爲色心但有名六入謂名色增長成大入根觸謂六根對外爲塵所觸受謂觸生

受

十三

三受苦樂平平愛謂迷三受故於樂染著取謂愛染纏綿四方求索有謂由取造業須有來報生謂有業既熟未來陰興老死等謂生須變滅悲惱縈纏此十二支或約三世或約二世或約一念雖三不同皆以十二而對三道即事而理一一究竟清淨自在不縱不橫而高而廣如是觀者得佛菩提略三歸者義已具也蓋三寶三德體本不異既稱南無寶勝十號豈非歸命果上三德復說甚深十二因緣乃是心依因中三德迷悟極際三德無

差一體義備三皆具足常樂我淨真是歸依三寶義究竟成當知識師意趣深妙四魚生天報恩四初魚報生天凡初生天以自業力有三種念一自知從其處死二自知今此處生三自知先作何業得來生天既知曩事故下酬恩二天酬恩下地經樓屋者重屋曰樓或作樓臺者誤也釋此爲二初事因緣十號且就能詮屬言教故同於水食名爲事也二理秖於四事而解四德故成理益以十千魚由戒緩故受鱗介身由乘急故今遇大乘真善知識故能於事深解妙理受食得命即表真常受水得樂表涅槃樂於十二棘林解自我依十號法獲天報財於世淨命解性淨德此四法益因流水得故持四萬真珠瓔珞報恩供養食等四事既表理益四萬珠瓔豈

但事供蓋表千界萬如是法一一皆具常樂
我淨即四十千真珠瓔珞非嚴而嚴嚴於法
身此乃財供而成法供若不爾者豈得名爲
有妙善根得記緣耶三時閻下王見光瑞四
長者據教定答三明第五結會古今經羅睺

漢十

十四

羅此云覆障以六年在胎因立斯號新云羅
怛羅此云障月然本迹事不可審知傍文思
之十千今昔必是所化餘皆能化此之能化
據華嚴等諸經所說皆是劫海修其實因熟
其十千今得脫若取法華久成之意皆是
迹中接此等機今今得記此宗講者內心合
知六釋捨身品二初釋題二初問捨多題少
二此從下答從要立題受者須身虎飢所逼
正須身肉壽命財位非彼所求夫行門無量
根由宿熏四種三昧逐人所尚於隨自意善

行六度樂行檀者於身命財無所吝惜自行
教他隨喜讚歎皆在於施若於善師及依實
教修檀行者體能施心及受施境所施身等
即空假中事行理觀合一而修助道正修相
資而進既稱本習故忻然而爲或因事卒行
宿緣會故或積年要誓今觀成故或顯陳所
願令物効故或密遂其心息他謗故悲重故
密慈重故顯心若真實四悉俱成心若詐欺
二利皆失然佛談本事令人効行故疏云引
昔捐軀誠今師弟勿恪法財問大論云捨身
易捨心難論欲行者捨執著心故以難歎欲
息事施故以易斥何不依論遠離執心今人
爲何好捨身命答抑揚取捨皆遵佛教悉赴
人心佛談正助不同人樂理事不等今品特
示捨於身命安得以論難易爲譏又復空說

漢十

十五

捨心而執已見膠固自體一毛不拔毀他捨命爲非既乖隨喜之心寧逃嫉善之咎願聞佛說隨力奉行二釋文二初分文二釋義四初問小人即國病者小蟲一萬枯魚魚關未來法食之誓獲成佛記例病差者定於後世爲解脫機是故皆蒙二世之益感深契極者以不二解導難行行此感至深捨身命財與後際等此契唯極衆聞獲益正當此時是故樹神乘機發問二答二初分科二釋義十段悉如科列二就本下正明捨身二初分文二釋義二初長行四初明本眷屬二初分科二釋義五段如分科列二從作下捨身方便二初分科二釋義二初述觀解二起誓願願行相扶者行即觀解非此觀解莫成其願非乎誓願行則有退疏適產七日至樹神數魚等

者此文追解前第四見產虎文也疏可見經從作是念言下述觀解觀有二種一助觀二正觀從初至甚可患厭是助道觀也以三藏教假想對治戀著依正之心從是故我今下正觀也至無諸塵累等即空觀也無量禪定至諸佛所讚即假觀也從證成如是至法樂即中觀也說乃前後修必一心二從是王子下述誓願先作方便次作誓言下正起誓六句不出四弘初二依滅諦發成佛願三四依道諦發悲智願第五依苦諦發度生願第六依集諦發斷惑願此依界外滅諦爲首驗發圓心也三正捨身二初科二釋經六種震動者謂動起涌三種是形震吼擊三種是聲今於形聲略言其二故言震動四捨身後悲戀二初科二釋如文二偈頌二初分文二釋義

三初通明昔行二我念下別頌長行二初分
文二釋義五初頌上本眷屬二頌上捨身方
便三頌上正捨身四頌上眷屬愁苦五頌上
父母愁苦私開二初經是時王子當捨下頌
見相時愁憂二初王妃憂惱二初見相二於
是下述相六初正述惡相二是時下述已迷
悶三王聞下王臣憂惱四爾時下國人驚愕
五爾時下王妃叙德六我所下驗相失子二
爾時下大王求覓二初慰諭其妃二大王下
求覓其子二先所下頌知終後悲苦三初使
者迴白二初前使慰王二須臾下後使告實
二是時下大王悶絕三復有下王迎二子三
初臣述失志二是時下王並思惟一亡二存
對並思付亡者叵尋存者宜取三爾時下迎
子慰母三從佛下結會二初科二釋三初結

七

七

會人經輸頭檀或閱頭檀此云淨飯摩耶此
云天后調達亦提婆達多此云天授父母從
天乞子天授與之是佛堂弟瞿夷此云明女
悉達有三夫人一瞿夷二耶輸三鹿野各有
二萬姝女五比丘者憍陳如頻鞞跋提十力
迦葉拘利太子陳如十力迦葉二是母親餘
三是父親舍利弗此云身子母好身形故母
名身是彼之子故名身子目捷連此云胡豆
姓也上古有仙居山常採菰豆而食因以命
族尊者是他之後也二經爾時下結會塔具
云塔婆義翻方墳或云聚相謂累木石及寶
高以爲相荼毘後分云佛塔高十三層上有
相輪支佛塔十一層羅漢四層輪王塔無復
層級以未脫三界故十二因緣經八種塔並
有露盤佛塔八重菩薩七重支佛六重四果

五重三果四二果三初果二輪王一凡僧但
蕉葉火珠而已雖兩經異說而凡僧並無層
級邇世所立雖無露盤既出四簷猶濫初果
儻循蕉葉火珠之制則免僭上聖識者宜効
之舍利此云身骨三經是時下結會誓願三
說是下大眾所益四樹神下結問意經怖據
其據切廣雅云畏懼也瘳必還切疽疾也奄
忽忽謂倏忽也鷓鴣士虞切鳥子也睭如輪切
目動也杖武粉切拭也蹕旁益切倒也慟哀
過也憊陟劣切疲也七讚佛品初解題二初
明讚之能所二初大師約因人讚果釋能讚
是三番菩薩者一是經初陳列之衆二是信
相發起之人三是樹神善女此雖衆兼道俗
形混人天既發大心咸名菩薩所讚是一佛
世尊者即釋迦教主一佛也斯欲異前讚品

添十

十八

能讚是往世金龍一人所讚是三世極果諸
佛也然准前釋題目具舍四悉今文略示
欲明其相者應云題標讚佛義舍能所即世
界歡喜也二能讚善生必托緣起緣中最勝
莫過讚佛故三菩薩能讚即爲人生善也三
所讚爲能讚乃印成三菩薩說無虛謬即破
惡對治也四如來讚樹神快說果地大體大
智大用即入理第一義也題舍四義文理一
如今疏存略不無其以蓋題讚佛實通能所
以所讚果佛友讚因人生善破惡二俱不便
然或以所讚爲能讚生他善業破他事惡斯
何不可故知略也二私謂下章安約因果互
讚釋言一佛是能讚者經云善哉善哉樹神
善女汝於今日快說是言經雖獨讚樹神意
兼前二故云三番是所讚言三番是當佛等
者釋疑也恐人疑云既讚兼能所何以獨題
讚佛故釋云佛通現未皆是讚佛爾

金光明經文句記卷第六上

金光明經文句記卷第六下

宋 四明沙門 知禮 述

二次第下明品之次第二初明諸品所歸亦是今品之來意也何者下釋諸品次第序品叙大體等者向疏釋經叙乎五章今唯叙體

第十

九

者蓋指極果所游所契而高而廣法性是佛地之所證爲今經之大體也下壽量洎諸品功德皆不出大智大用言窮源等者妙覺中理之源已窮邊際之事亦極故種智泯照萬行休息是唯一性更無異途故曰經之大體也壽量果地二智已圓故冥深廣之體起長短之用懺讚空導豈越大用諸品功德無違應體故下云皆金光明之力也如是下二示今文讚意明由上一十七品之利益故有下六十二行之歎辭也善始令終者序等三分

既皆獲利故三菩薩荷佛深恩而興讚歎故有讚佛品也今亦善也二釋文二初標科二釋義二初經家叙疏文可見經云從此至金寶蓋國者欲張大其衆滿中菩薩皆讚釋迦教主也比見有人不曉斯旨謂讚彼佛經疏非闇一何昧哉或恐後學隨他所解謬釋經文今略引疏示之原乎讚品之來者蓋三番菩薩並由上聞經得利故讚佛及教豈關他佛況疏云一佛是能讚若謂讚彼佛者能讚一佛何指釋迦定起耶經疏泠然故不繁引二正說偈二初分文別釋二初分文即智者就題分偈故合六十五行半文爲三即以如來定起三行經文合在樹神段中故云二十八行半樹神說分文可見疏不委釋故注云云應云六十五行半文爲二初六十二行半

三番菩薩說二後三行如來定起說故下章
安總釋乃云其文有四即斯義也具如下釋
二釋義三然此三番菩薩讚辭疏不分釋達
者必辭意俱明恐新學者不曉今粗科釋初
諸菩薩讚三初寄言讚三初讚能說教主自
行功德三初讚大小相海二初如來下一行
讚金色光一大相經云如來之身者標起也
金色微妙等三句者讚第十四金色光微妙
一大相也二身淨下二行半讚身清潔等三
小相經云身淨者即讚第十一身清潔一小
相也柔輭者讚第十二身柔輭小相也圓足
無垢二句讚第二十身滿足小相亦是讚容
儀滿足三其音下二行重讚梵音一大相也
亦是兼讚言音深遠小相海也梵聲者譬佛
音深遠故師子吼聲者譬佛音無畏也大雷

震聲者譬佛音破迷也云六種聲者諸文皆
云八音一極好二柔輭三和適四尊慧五不
女六不誤七深遠八不竭譯人增減不須和
會亦可先舉妙如梵聲者即八音中深遠音
也師子吼大雷震即舉不女音也以佛住首
楞嚴定常有世雄之德久離雌夷之心故所
出音聲能令一切聞者敬畏天魔外道莫不
歸伏也上既已列二種聲下但云六種聲者
即舉迦陵頻伽孔雀等六種聲也以迦陵頻
伽翻極好聲也二清淨下一行半讚尊特上
以大小相間而讚蓋顯身相大小咸遍辭意
雖含尊特未彰故今復讚身相光明俱無限
齊經云威德者巍巍堂堂之相也二智慧下
二句讚智斷功德上句讚智德下句讚斷德
三世尊下總結尊特大論云尊特身佛者巍

魏堂堂譬如須彌映臨大海所有大小相好亦巍巍堂堂然如來自行具足三身功德諸菩薩唯讚尊特者上冥下應已攝三身斯乃讚智之巧學者思之二爲諸下六行半讚所說教法化他利益二初叙說教因由在文可見新經云欲利益諸衆生故常行法施乃至令得大果證常樂故二讚所說教法二初如來下二句讚經宗體體指序品如來所游深廣無界超諸因理故稱第一深義舉深該廣即甚深無量也宗指壽量極果所得過諸菩薩亦稱第一也法報體一深義可知二讚經力用三初能令下二句讚上懺品滅惡寂滅者寂諸業行之惡滅於果報之苦二能與下二句讚上讚品生善上是如來叙昔龍尊讚佛意生今日當機之善故能與無量快樂三

讚空品雙導二初能演下一行讚能導空法妙經云甘露者即長生不死之藥也文詮中道妙空實相真諦能過二死迷變可生四德常身故斯理空即名甘露仍由染體本淨空名妙法從此而入復名法門二能入下二行讚滅惡生善深懺得斯空二死惡患之報即謝三德涅槃之宅可入言解脫者有二意若就解脫惑業之縛即破惡也若取無染自在之淨即生善也度三有等破惡生善可知三結讚人法者功德智慧結上讚能說教主尊妙人也慈悲精進結上讚所說教法宏深也法之宗用如是者皆慈悲精進所致也二絕言讚三初如是無量下一行絕言讚故不能稱計說喻二諸天世人下二行絕心讚故盡思度量不能得知大海一滴少分也三我今

略讚下一行指廣結讚可見三若我功德下一行讚已迴向迴向有三義現文有二理舍其三在文可見二信相說二初經家叙二正說偈二初世尊下一行總讚相好功德千數者舉大數也二別讚大小相海五初別讚二種光相二初色淨下四行讚色具光相色淨遠照下即第十四金色光相光明熾盛下即第十五身光相然二種光相若據生身皆有齊限如云身光面各一丈今云如日千光乃至悉能遠照無量佛土故知信相昔爲龍尊讚佛尊特發願未來得值釋迦今日讚佛豈忘其本是則大相小相皆寄尊特而讚也二能滅下一行明光具與拔昔爲龍尊讚佛身放大光滅盡三界一切諸苦令諸衆生悉受快樂今日讚佛還讚光明滅苦與樂在文可

漢十

三

見二諸根下一行總讚諸根相好如大相中有身端直皮膚薄細舌大覆面齒白齊密眼如金精睫如牛王小相中有鼻高好孔不現耳輪輻相埒成身清潔柔輭等諸根皆見者無有厭足三又比讚一小相二初髮紺下一行讚髮相孔雀項蜂王等皆比髮有紺色如八十好中有髮色青珠好等二清淨下一行半具功德清淨慈悲無量禪定久皆莊嚴故髮好柔輭四復明相好功德二初明相好具功德二初相好下一行明嚴身克果之用可見二如來下二行明攝生感讚之功若相若好隨大隨小悉能調伏令心柔輭受諸快樂故爲諸佛所讚二其光下二行明功德具光明功德高廣猶如須彌顯出大海五齒白下二行半又比讚齒毫二大相三樹神說二初

經家叙言道場菩提樹神者即如來得道之場在此樹下然樹本名畢鉢羅佛坐其下得菩提智果立此爲名故今女天依此樹住亦以爲名也西域記云昔佛在世高數百尺屢經殘伐猶高四五丈莖幹黃白枝葉青翠冬夏不凋光鮮無變每至如來涅槃之日葉皆凋落頃之復故此在中印度摩竭陀國大城西南四百餘里修苦行處不遠有此樹也二正說偈四初二句總讚南無者歸命之辭也清淨者佛性論有二種一性淨本無惑染故二相淨對治離障故今總讚如來中邊智滿法報應圓故謂無上正覺也二別讚二初廣讚能說教主三初甚深下一行半就所覺顯明讚佛法身甚深妙法者法性高廣諸法融妙圓智圓覺徧一切處衆邪染障本自離故

如來隨順斯理覺了其性一切魔外涅槃非法禪戒非道猶如大樹盤根厚地唯佛金剛大智獨拔而出成佛正覺者所謂出纏大法身也然準圓佛大智覺了本性非法非道應離三乘七方便涅槃非法戒定非道方曰遠離一切法者即所生果法也道者即能生因道也苟未離無明相分皆曰其非也二知有下二行半就能覺智行讚佛報身三初約法知有下二句讚報智也知者照也有即俗非有即真本性清淨即中以一切種智知照三諦則冥深契廣事理周極名佛無上報智也希有下二句讚佛助行功德重言希有者歎美之鄭重也下皆例然因中戒定萬行有排障敵惡之力名功助發大智成佛大果名德法華云久修業所得即無上報故謂如來功

德也二希有下一行約喻即喻上報身智行也大海喻智也須彌喻行也其智冥理窮實相底故方之大海釋論謂智度大海佛窮其底因中萬行積功累德喻彼須彌如華嚴涅槃皆云拈骨書經如彼妙高三希有下二句

漢十

十五

總合智行契理三法一如故曰無邊行也三希有下一行半就垂世形益讚佛應身優曇花者具足云優曇鉢羅此言瑞應亦云靈瑞輪王出世時感此華泥洹經云閻浮提內有尊樹王名優曇鉢羅有實無華優曇鉢樹有金華者世乃有佛故云時一現耳無量大悲者垂應本也以大悲故不住涅槃二釋迦下一行半略讚所說教法如來將欲口輪說法必須意業鑒機如日照物無所不徧爲欲利益者準金光明之力用須明十種利益方盡

垂世說法之意也三請佛出定二初讚今所入定爲請見由三初善哉下二行就果佛讚所游定諸根寂滅者以了眼等性常具無滅修諸惑死生悉已寂滅故常居寂定而復游入者將轉法輪表不妄說又三世佛說必須入定故首楞嚴經云雖知諸法常是定相而示衆生諸禪差別言善寂大城者正讚所入定也即向經初法性三昧若入此定即能善了諸法寂滅無非法性故防生死之非禦涅槃之敵即中道善寂而名大城也亦名無垢清淨三昧等既是佛之境界故受無垢清淨之名爲諸佛行處也二明三昧能空行相此經雖則結歸方等說在般若時後懺讚善惡皆推空導故空品謂無量餘經已廣說空故此經中亦譚其空爲入理門也佛游三昧亦

從空入聲聞之人雖從空入猶爲身果所纏如來空智明見聲聞身果性相皆空諸佛境界亦空如是一切無量諸法者指上自他依果國土淨穢推性推相不見差品一切衆生依正境界推求性相皆同真淨無復其異然

漢十

王夫

推乎性相者即空觀遣情顯理之要門也一家明觀諸處共論其如講學之人亦多昧之今家承用則依中論智論準理準義開拓觀門故於權教實教事觀理觀悉已明之學者須知且如性相二空本是一空觀法備遣情計故有兩番行相是知若善修一空觀者必遣二種執性如法華止云知法常無性荊谿謂應無性性無相性諸文爲辨性相寄前後說故以二諦分之乃云四句推性不見性是世諦破性四句推名不見名是真諦破相相

破即相空也荊谿釋云若有性執世而非諦破性執已世乃名諦是以名爲世諦破性性執破已但有名字名之爲假假即是相爲空相故觀理證真是名真諦破相空非前後二諦同時故知性執破已雖名世諦初軫其觀即須觀真四句推性雖不執性其如惑存轉計其名既不見理但名世諦仍觀法性真理破名字相相執破已方證其真故名真諦破相或初觀真諦四句推性便了陰界色心名字無四句相即名真諦破性破相豈待轉觀破相方用真諦耶若爾推性何故云不自他共等推相自謂不內外中間等句法既別顯理用觀自異何謂祇一四句空觀破二種執耶答向謂寄前後說對所破執相故推性則謂不自他等推相乃言不內外等考乎觀門

漢十

王夫

豈有異途故荊谿云內祇是因外祇是緣等
況止觀明性空觀畢乃引中論諸法不自生
等四句爲證洎明相空觀畢亦引斯論諸法
不自生等四句以斯照之應無別觀又止觀
但名一總空觀者即二空觀也問法華疏約
真俗假實明生法二空荊谿釋云真諦即法
空俗諦即生空俗假真實乃引玄文世諦破
性真諦破假破即相空性破即性空爲證
若以性相二空祇一空觀何引人法二空對
顯二諦耶以人空時亦未法空故性相二空
若例人法空者應二空須異何謂性空未顯
於理相空無別觀耶答小乘得人空時容有
未得法空如云見惑若破得須陀洹果名得
生空此則少顯真理進破思惑方得法空其
理究顯大乘人法境融觀道不異如大品云

色性如我性我性如色性四陰如我用觀亦
然縱有惑分麤細執破前後用觀必無異時
而法華疏約人法空名二諦者爲對所破寄
分真俗故引世諦破性名性空真諦破相名
相空爲證其如用觀委明行相須於我人生
境破性破相方得生空復於陰界入法寄俗
寄真推此二空窮斯真理名爲法空方是用
觀行相委悉故止觀云於性相中求我人知
見不可得是生空於性相中求陰界入不可
得是法空而疏以俗諦對生空者蓋此生空
漢子
體是法執故以俗諦顯此空相故云俗假假
即虛妄也法執若破妄淙究盡方名真諦故
云真實實即究竟也荊谿體斯疏意復以玄
文寄世諦顯性空等義而爲證也故云真俗
不二二空俱時問既云二諦不二二空俱時

顯是一理一空又何分二諦及明二空耶答
其實所顯理是一能觀觀亦一爲對所破執
故而分二空顯空淺深故而寄二諦是故性
相空中性空約理理既未顯但名世諦明空
空猶未盡但名性空仍於世法又觀真諦破
此執名之相相若破已理顯方名真諦觀成
方名相空故寄二諦顯二空相故知若曉性
相二空對所破而分真俗者則寄二諦明人
法二空準理亦是則人空空未實故乃寄
俗顯故云俗諦即生空也法空空既已淨而
寄真顯故云真諦即法空也矧又雖用生法
互融之觀而照真俗不二之境其如衆生無
始多於生境計我起執不二之觀亦於生境
先當其用故破人執時且名生空既法執在
復觀其法本無其執離四句相方名法空故

漢十

元

大師謂始覺人空終覺法空然此二諦顯二
空相通圓之教行相亦同但通用其觀止照
真理故寄俗寄真顯性顯相明斯二空唯在
真理而圓實之教體生體法推性推相唯是
中道法性法性無生無性名世諦破生破性
此生此性即法法體本空名真諦破法破相
雖寄二諦悉用中道而顯二空通無此觀學
者思之然委明二空推所執能人執隨法執
亡者具如前疏空品記文三狂愚下二句指
凡愚不了請現上讚佛所遊三昧空智徧了
諸有差異悉皆泯亡唯真智獨存更無滌異
樹神分曉悲愍凡迷狂亂愚癡不了性相俱
空故請佛出定二騰昔常願見正請出定四
初我常下五行正叙昔願行請現我常念佛
者念即觀照之異名也心遊法界常照三身

叙昔觀力未充欲求深證故助之以誓願跪之以合掌加乎戀慕哀泣兩淚修行大悲等並助常念之觀也言最上大悲者即無緣悲也正助合修故曰最上問樹神在會明見如來入定說經何故今方頻言欲見於佛耶答今有二意一者如來入定本爲說經說經既畢要須出定欲出其定須得其請故佛出定能印三番所說皆實既一期事畢乃樹神致請殷勤故叙昔常願見復加願行欲使未來亦得見佛故云願使我身常得見佛二者樹神久已分見如來真身欲增念佛之觀更求上證故寄請佛出定頻陳欲見苟得如來酬請現身即已心中真佛顯發更明故下結云唯願慈悲爲我現身二約定具慈悲請現三初世尊下二行明慈悲能護迷暗樹神自昧

如來上位真身故請佛加願使我身常得見佛復愍於他迷瞽所及不見佛之真體故叙世尊常護一切是故渴仰欲見者即引已及他請佛現身二聲聞下一行半約聖凡未發性明即樹神擊請今佛出定也佛雖在定明了性淨猶如瑠璃表裏通徹照機起應皆不動於寂定如來雖久已明了其如衆生未發上定故樹神頻請出現發悟斯機乃舉六喻顯乎聲聞色體非性明體所證真理闡寂無知如空之虛無亦燈之烟焰術之所幻聲之谷響神通之化水中之月皆非實性不能即寂即現也衆生之性虛妄現在如夢所見都無實相三就佛行處明見請現正明佛所入定具慈悲照故請如來出定令我及衆得安樂故三一切下一行半愍凡聖不知請現樹

神以凡夫小聖共迷佛所遊境界故請佛現身即令明見唯心佛現經五通神仙者別舉人趣中有術成仙者發得五通雖有他心宿命而不知佛所遊定照理起應不離眾生心體無漏二乘雖有三明六通亦昧佛境唯心

三十一

故曰亦不能知也四我今下一行指已信不

疑請現樹神述已於佛行處明了無滯雖知

本無隱現上舉他衆共迷佛境實有動靜故

敢請出定云惟願慈悲爲我現身問今佛入

定說法對告起禮舍利既有往來時會共見

樹神焉知如來在定未出而致請殷勤耶答

樹神大權久與佛同事昔爲流水救魚樹神

現半身示數長者旣已成佛樹神豈猶滯凡

故今一動一靜皆扶佛化何不知之有矧凡

出定入定皆有其儀佛雖起坐往來其如未

示出定之相樹神敢請至勤方現出相其相者必須先示微微動搖其身次乃甦氣頻呻徐緩而起方知如來示出定相故法華謂安詳而起此經云出微妙音故知定起皆有其相也問新經自云爾時薄伽梵於日晡時從三昧起觀察大衆而說頌曰金光明妙法最勝諸經王今之識本何故至三番讚畢方云從三昧起耶苟譯者所見不同其如集經者梵本編文安次如何耶答梵本不同豈須和會其如學者無由曉經今略試評之在理或當冀無私隱且夫此經古師謂是偏方之教即一時赴機之說也故天台結歸方等部攝斯由機分大小應赴權實赴權小者令見佛從定起說法應實大者則知佛在定而告亦如華嚴中令見女子身中入正受男子身中

起出說等當時應物既殊故集經者或言定起方說或云說畢定起然佛滅度後集經者又匪一途亦有窟內窟外所集亦云梵語有賒有切等致譯經者所觀梵本不同如識師曾遊五天必觀梵文正本見云佛在定而說

漢

王

必須信受敬譯淨師本弘小典晚接梵文或見云佛從定起方說正符所宗故編譯無改至列聲聞菩薩等衆皆云於日晡時從定而起到佛會所古師嘗推譯者未爲雅當信亦有之然聖師所爲必非徒然凡流膚學莫盡考乎厥由也求過得過附贅之尤亦已甚矣學者體而思之問大師既依識本釋經何故云入遊法性出叙經王耶答如來常在法性上定應機順物示入定相雖心遊寂理口出其言故謂出叙經王蓋寂不阻照說無妨定

非謂身出其定也四酬請起定二初爾時下一行明經家叙起定爾時者即當樹神請畢之時佛示出定之相乃云以微妙音而讚歎言即微細妙好之音而悅豫四衆也二善哉下二行明佛定起能讚佛讚樹神意合前二

以諸菩薩及妙幢能讚佛所說教皆是快言

如來序品已來明大體大宗大用是金光明

妙三法也故云快說是言若衆生聞此三法

即能發解證悟明了常住故云入甘露無生

法門耳二章安總釋二初約義釋二初約佛

漢

三十三

讚義二初約定果讚因二初正明讚因義二

初示義私謂下總釋也其文有四者前大師

分科止爲三段以如來定起三行之文合爲

樹神段中故註云云今章安開釋方爲盡理

文現可見二引證二示印成讚教三番菩薩

皆先讚佛次讚說教即讚如來從序品已來是說一經大體大智大用菩薩修因也何者序品明遊法性佛指所遊是諸經王等三番謂佛是說一經之大體也壽量明佛常果三番謂佛是說一經之大智智即宗也懺讚空品謂佛是說一經之大用也四王至捨身品皆是說菩薩修因也三番讚教既稱佛所說故如來定起印成即讚樹神等快說是言也二讚通三業章安因明今品果佛定起能讚因人快說復考經之上文亦有果身禮舍利之義舍利者翻骨分也即因身爾上懺品佛讚大懺讚品佛讚龍尊是大讚皆言大者一懺一讚等法性大體知罪福性空也四王品能請善集品能說鬼神品等能聽捨身品能行皆是快說者共能了金光明教能詮所詮

是體宗用三即一切三法故皆名快說也信相龍尊四王等並是因人故謂因口所說辱字士限切現也身口非意不行故云任運例成也二約出定義二初據起問入二答始末在定二初明住法性定問諸經先須入定定起方說今經何故一向在定而有所說耶答若論法性上定豈有出入說默之異既示其定蓋順物機物機所宜適樂不同諸經示同往佛皆先入定履歷法緣對治散心妄有所說故須入定定起方說此經首尾在定而能說者意同向理又示金光明無量甚深自在無礙寂照融徧故說畢定起印成三番快領如來所說法也二彰法性圓融言若作入法性者顯理含容不阻出入上唱法性無量甚深一出入有說有默豈逾法性故云法性自

在言四佛者即四方佛也五佛者并釋迦耳
同處各處等者信相室與靈鷲山雖異若了
唯心者見唯妙土則弟子衆一故五佛同處
共一身一智也是則四無來去一無住在其
執權教者弟子衆異謂妙幢所居共佛者山
廈隔多里故四佛五佛匪唯各處亦見異身
異智實來實去定住定在雖此殊別無離法
性故云隨人所觀皆無障礙也二約觀釋二
初明事三業境言觀心者標明觀釋也先明
諸菩薩讚具三業爲妙觀境然讚雖在口身
須恭謹心仍尊重三業齊運讚義方成二明
理三觀成二初明於事觀理言三觀心者寄
身等境示空假中能觀三觀心也近有講人
不知便謂後人妄加心字亦由向迷心爲所
觀致有踏駁斯之踈謬不可云也止如十六

頌十

三十五

觀經本明佛觀疏云心觀爲宗或不見斯意
乃妄有穿鑿今之學者切宜思之觀身不得
身者先明身觀推檢四大本無實性名身性
空但有名字即身相也名字多種且舉六度
十度等如身行布施名檀身離諸非名戒身
受所辱名忍身勤前行名進身能安靜名禪
身了體空名慧身行其巧名方便身立盟誓
名願身利及於他名力身出生死名智身乃
至身行八萬塵沙法門行者隨受名字達名
無名名身相空推檢性相雖空而色心諸法
宛然故空不定空假不定假非空非假皆真
實妙性名顯中道也觀身既然口意例解二
明事得理成三初明無觀俱失身等爲境能
發其觀觀成境現事理雙明猪措金山方之
可解二以衣物爲例三衣者僧伽梨鬱多羅

僧安陀會也六物者兼尼師壇鉢多羅漉水
 囊也是知六外無三亦如四禪八定定外無
 禪蓋衣名則局物名稍通衣者遮覆之義也
 鉢多羅等且非遮覆故通名物也亦如無色
 四處受想慮亡則無支林喜樂之名故通受
 定名也色界四處雖通靜慮受想尚行則別
 受禪名故知解之則事三理六俱明昧之則
 三六四八俱暗三得理俱成境由觀顯理觀
 若成身口意三名妙色心故亦名六觀亦名
 事理成也無六亦無三者際上例中若不解
 之文也可見

漢十

三十六

維昔先稟法智大師嘗講次撰記解釋經
 疏方終一十七品會乃歸寂其最後讚佛
 一品經旨幽邈疏科尚簡而鈎索深隱固
 亦難矣予雖不敏忝久親講授遂纂集舊

聞繫諸卷末亦冀覽者豈貽續貂之譏云

金光明經文句記卷第六下

音釋

曉即涉切目 閑苦果切也 鞋他口切 頻呻實切
 身中音 復許正切 踏踏尺準切 駁駁音 邈邈切
 遠也 貂貂下聊切 貂貂下聊切 貂貂下聊切 貂貂下聊切